

Èkwo Ógú

Agú ndu Ízurelu ogu

¹ Chipfu pfuru opfu yeru Mósisu l'ulo-ekwan-
ndzuko ndu Ízurelu le g'ephe no l'echiegu
Sayinayi l'abali mbu lonwa k'ebó l'apha, kwe
ndu Ízurelu apha labo, ephe shi l'ali Ijiputu
wufuta. O suru iya: ² "Unu gua ndu Ízurelu
g'ephe hakota ogu. Gua phe lonulo lonulo;
me l'enya-unuphu l'enya-unuphu. Unwoke be
ii-deshikota epha phe nanu nanu. ³ Ge gu le
Erónu tuko iphe, bu unwoke le Ízurelu gukota
ogu; mbu ndu nowaru ukporo apha kwaseru;
bya aburu ndu sawaru eje ogu. ⁴ Unu hotachaa
nwoke lanu l'okpa-ipfu l'okpa-ipfu g'o yetaru
unu eka. Ndu unu a-hota bu ndu-ishi l'enya-
unuphu ibe phe. ⁵ Waa epha ndu ono, unu a-
hota g'ephe yeru unu eka obu baa:

"Onye unu a-hota l'okpa-ipfu Rubenu bu
Elizuru nwa Shediyo.

⁶ "Onye unu a-hota l'okpa-ipfu Simiyonu buru
Shelumelu nwa Zurishadayi.

⁷ "Onye unu a-hota l'okpa-ipfu Jiuda buru
Nashonu nwa Aminadabu.

⁸ "Onye unu a-hota l'okpa-ipfu Isaka buru
Netanelu nwa Zuwa.

⁹ "Onye unu a-hota l'okpa-ipfu Zebulonu buru
Eliyabu nwa Helonu.

10 “A -bya l'òkpa-ipfu k'unwu Jíósefu; onye unu a-hòta l'òkpa-ipfu Ifuremu bù Elishama nwa Amihudu. Ònu ahòta Gamalèlu nwa Pedazo l'òkpa-ipfu kẹ Manásẹ.

11 “Onye unu a-hòta l'òkpa-ipfu Benjaminu bùru Abidanu nwa Gidiyoni.

12 “Onye unu a-hòta l'òkpa-ipfu Danu bùru Ahiyeza nwa Amishadayi.

13 “Onye unu a-hòta l'òkpa-ipfu Asha bùru Pagèlu nwa Òkuranu.

14 “Onye unu a-hòta l'òkpa-ipfu Gadu bùru Eliyasafu nwa Diyuwèlu.

15 “Onye unu a-hòta l'òkpa-ipfu Nafùtali bùru Ahira nwa Enanu.”

16 Ndu ono bẹ bù unwoke, a hòtaru lẹ Ízurelu l'ophu. Èphe bùkota ndu-ishi l'òkpa-ipfu, shi lẹ ndiche phẹ; bya abùchaaru ishi l'ènya-unuphu, dù lẹ Ízurelu.

17 Mòsisu yẹle Eronu bya achita ndu ono, a gùshiru èpha phẹ ono; 18 èphe kukọbe ndu Ízurelu g'èphe ha; deshia èpha phẹ l'èkwo l'abalì mbù l'ònwà k'èbo ono. Èphe deshiru èpha onyemonye l'ònulo l'ònulo; mẹ l'ènya-unuphu l'ènya-unuphu. Iphe, bùkpoo unwoke, nòwaru ùkporo apha kwaseru bẹ e dekotaru èpha phẹ nanù nanù; 19 ègube ono, Chipfu sùru Mòsisu g'ò mee ya ono. Òo ya bù; Mòsisu gùà ndu Ízurelu ògu l'èchiègu Sayinayi.

Umadzu ole, a gùtaru l'ipfu l'ipfu

20 A -bya l'òshilòkpa Rúbenu, bù òkpara Ízurelu; iphe, bùkota unwoke, nòwaru ùkporo apha kwaseru; mbù ndu sùwaru eje ògu bẹ

a gùkòtaru; deshikòta ẹ́pha phẹ́ nanù nanù l'ẹ̀kwo. E deshiru ẹ́pha phẹ́ l'ònúlo l'ònúlo; mẹ́ l'ẹ́nya-unuphu l'ẹ́nya-unuphu. ²¹ Iphe, a gùtaru l'ìpfi Rúbẹ̀nu bẹ́ bụ́ ụ̀kporo ụ̀nu nemadzụ́ mgbo ise l'ụ̀nu iri l'ishii l'ụ̀kporo ụ̀madzu ise.

²² Oshilòkpa Simiyọ̀nu bẹ́ a gùkòtaru iphe, bụ́ unwoke, nọ̀waru ụ̀kporo apha kwaseru, bụ́ ndu sùwaru eje ọ̀gu; bya edeshia ẹ́pha phẹ́ nanù nanù l'ẹ̀kwo. E deshiru ẹ́pha phẹ́ l'ònúlo l'ònúlo; mẹ́ l'ẹ́nya-unuphu l'ẹ́nya-unuphu. ²³ Iphe, a gùtaru l'ìpfi Simiyọ̀nu bẹ́ dụ́ ụ̀kporo ụ̀nu nemadzụ́ mgbo ẹ́saa l'ụ̀nu ẹ́sato l'ụ̀madzu ụ̀kporo ise.

²⁴ Oshilòkpa Gadu bẹ́ a gùkòtaru iphe, bụ́ unwoke, nọ̀waru ụ̀kporo apha kwaseru, bụ́ ndu sùwaru eje ọ̀gu; bya edeshia ẹ́pha phẹ́ nanù nanù l'ẹ̀kwo. E deshiru ẹ́pha phẹ́ l'ònúlo l'ònúlo; mẹ́ l'ẹ́nya-unuphu l'ẹ́nya-unuphu. ²⁵ Iphe, a gùtaru l'ìpfi Gadu bẹ́ dụ́ ụ̀kporo ụ̀nu nemadzụ́ mgbo ise l'ụ̀nu iri l'ẹ̀no l'ụ̀madzu ụ̀kporo labọ́ l'iri.

²⁶ Oshilòkpa Jiuda bẹ́ a gùkòtaru iphe, bụ́ unwoke, nọ̀waru ụ̀kporo apha kwaseru, bụ́ ndu sùwaru eje ọ̀gu; bya edeshia ẹ́pha phẹ́ nanù nanù l'ẹ̀kwo. E deshiru ẹ́pha phẹ́ l'ònúlo l'ònúlo; mẹ́ l'ẹ́nya-unuphu l'ẹ́nya-unuphu. ²⁷ Iphe, a gùtaru l'ìpfi Jiuda bẹ́ dụ́ ụ̀kporo ụ̀nu nemadzụ́ mgbo tete l'ụ̀nu ishii l'ụ̀madzu ụ̀kporo iri.

²⁸ Oshilòkpa Isaka bẹ́ a gùkòtaru iphe, bụ́ unwoke, nọ̀waru ụ̀kporo apha kwaseru, bụ́ ndu sùwaru eje ọ̀gu; bya edeshia ẹ́pha phẹ́ l'ẹ̀kwo. E deshiru ẹ́pha phẹ́ l'ònúlo l'ònúlo; mẹ́ l'ẹ́nya-unuphu l'ẹ́nya-unuphu. ²⁹ Iphe, a gùtaru l'ìpfi

Isaka bẹ̀ dọ̀ ọ̀kpọ̀rọ̀ ọ̀nụ̀ nẹ̀mádzụ̀ mgbo ishii l'ọ̀nụ̀ iri l'ishii.

³⁰ Oshilọ̀kpá Zebulọ̀nụ̀ bẹ̀ a gụ̀kọ̀táru iphe, bụ̀ unwoke, nọ̀wáru ọ̀kpọ̀rọ̀ apha kwasẹ̀ru, bụ̀ ndu sụ̀wáru eje ọ̀gụ̀; bya edeshia ẹ̀pha phẹ̀ l'ẹ̀kwọ̀. E deshíru ẹ̀pha phẹ̀ l'ọ̀nụ̀lọ̀ ọ̀nụ̀lọ̀; mẹ̀ l'ẹ̀nya-unuphu l'ẹ̀nya-unuphu. ³¹ Iphe, a gụ̀táru l'ipfu Zebulọ̀nụ̀ bẹ̀ dọ̀ ọ̀kpọ̀rọ̀ ọ̀nụ̀ nẹ̀mádzụ̀ mgbo ẹ̀sáa l'ọ̀nụ̀ ẹ̀tọ̀ l'ụ̀mádzụ̀ ọ̀kpọ̀rọ̀ iri.

³² A -bya l'oshilọ̀kpá Jíósefu; mbụ̀ awa Ifuremu bẹ̀ a gụ̀kọ̀táru iphe, bụ̀ unwoke, nọ̀wáru ọ̀kpọ̀rọ̀ apha kwasẹ̀ru, bụ̀ ndu sụ̀wáru eje ọ̀gụ̀; bya edeshia ẹ̀pha phẹ̀. E deshíru ẹ̀pha phẹ̀ l'ọ̀nụ̀lọ̀ ọ̀nụ̀lọ̀; mẹ̀ l'ẹ̀nya-unuphu l'ẹ̀nya-unuphu. ³³ Iphe, a gụ̀táru l'ipfu Ifuremu bẹ̀ dọ̀ ọ̀nụ̀ nẹ̀mádzụ̀ ọ̀kpọ̀rọ̀ ise l'ọ̀nụ̀ lanụ̀ l'ụ̀mádzụ̀ ọ̀kpọ̀rọ̀ ise.

³⁴ Awa Manáse bẹ̀ a gụ̀kọ̀táru iphe, bụ̀ unwoke, nọ̀wáru ọ̀kpọ̀rọ̀ apha kwasẹ̀ru, bụ̀ ndu sụ̀wáru eje ọ̀gụ̀; bya edeshia ẹ̀pha phẹ̀ l'ẹ̀kwọ̀. E deshíru ẹ̀pha phẹ̀ l'ọ̀nụ̀lọ̀ ọ̀nụ̀lọ̀; mẹ̀ l'ẹ̀nya-unuphu l'ẹ̀nya-unuphu. ³⁵ Iphe, a gụ̀táru l'ipfu Manáse bẹ̀ dọ̀ ọ̀kpọ̀rọ̀ ọ̀nụ̀ nẹ̀mádzụ̀ mgbo ẹ̀nọ̀ l'ụ̀mádzụ̀ ọ̀kpọ̀rọ̀ iri.

³⁶ A -bya l'oshilọ̀kpá Benjiamínụ̀ bẹ̀ a gụ̀kọ̀táru iphe, bụ̀ unwoke, nọ̀wáru ọ̀kpọ̀rọ̀ apha kwasẹ̀ru, bụ̀ ndu sụ̀wáru eje ọ̀gụ̀; bya edeshia ẹ̀pha phẹ̀ l'ẹ̀kwọ̀. E deshíru ẹ̀pha phẹ̀ l'ọ̀nụ̀lọ̀ ọ̀nụ̀lọ̀; mẹ̀ l'ẹ̀nya-unuphu l'ẹ̀nya-unuphu. ³⁷ Iphe, a gụ̀táru l'ipfu Benjiamínụ̀ bẹ̀ dọ̀ ọ̀kpọ̀rọ̀ ọ̀nụ̀ nẹ̀mádzụ̀ mgbo ẹ̀nọ̀ l'ọ̀nụ̀ ẹ̀sáto l'ụ̀mádzụ̀ ọ̀kpọ̀rọ̀ iri.

³⁸ Oshilọ̀kpá Danu bẹ̀ a gụ̀kọ̀táru iphe, bụ̀ unwoke, nọ̀wáru ọ̀kpọ̀rọ̀ apha kwasẹ̀ru, bụ̀ ndu

sụwaru eje ọgu; bya edeshia ẹpha phẹ l'ẹkwo. E deshiru phẹ l'ọnulo l'ọnulo; mẹ l'ẹnya-unuphu l'ẹnya-unuphu. ³⁹ Iphe, a gụtaru l'ipfu Danu bẹ dụ ụkporo ọnu nemadzu mgbo ẹsaa l'ọnu iri l'ishii l'ụmadzu ụkporo iri l'ise.

⁴⁰ Oshilọkpa Asha bẹ a gụkotaru iphe, bụ unwoke, nọwaru ụkporo apha kwasẹru, bụ ndu sụwaru eje ọgu; bya edeshia ẹpha phẹ l'ẹkwo. E deshiru ẹpha phẹ l'ọnulo l'ọnulo; mẹ l'ẹnya-unuphu l'ẹnya-unuphu. ⁴¹ Iphe, a gụtaru l'ipfu Asha bẹ dụ ụkporo ọnu nemadzu mgbo ise l'ọnu ẹto l'ụmadzu ụkporo iri l'ise.

⁴² Oshilọkpa Nafutali bẹ a gụkotaru iphe, bụ unwoke, nọwaru ụkporo apha kwasẹru, bụ ndu sụwaru eje ọgu; bya edeshia ẹpha phẹ l'ẹkwo. E deshiru ẹpha phẹ l'ọnulo l'ọnulo; mẹ l'ẹnya-unuphu l'ẹnya-unuphu. ⁴³ Iphe, a gụtaru l'ipfu Nafutali bẹ dụ ụkporo ọnu nemadzu mgbo ishii l'ọnu iri l'ẹto l'ụmadzu ụkporo iri.

⁴⁴ Ndu ono bẹ bụ ndu Mosisu yẹle Erọnu guru ọgu. Ndu yetaru phẹ ẹka gụa ọgu ono bụ ndu-ishi ndu Ízurelu ụmadzu iri l'ẹbo ono, nọ-chigbaaru ẹnya-unuphu unuphu phẹ ono.

⁴⁵ Iphe, bụ unwoke Ízurelu l'ophu, nọwaru ụkporo apha kwasẹru, bụ ndu sụwaru ejeru ndu Ízurelu ọgu bẹ a gụkotaru l'ẹnya-unuphu phẹ l'ẹnya-unuphu phẹ. ⁴⁶ Mkpako iphe, ẹphe dụ g'ẹphe ha bẹ bụ ụkporo ọnu nemadzu mgbo ụkporo ẹto l'ụmadzu ụkporo iri l'ise; l'ọnu ụmadzu ẹsato; l'ụmadzu ụkporo iri l'ẹsaa; l'ụmadzu iri.

A gụfuru ipfu Lívayi

⁴⁷ Óle ipfu Lívayi bẹ a ta gùduru teke a gùru ndu Ízurèlu ophuna. ⁴⁸ O noo kẹle Chipfu bẹ sùru Mòsisu lẹ-a: ⁴⁹ “Ndu ì tii gùdu kpoloko bụ ipfu Lívayi. Ta gùkobekwa phẹ mẹ ì guje ndu Ízurèlu ophuna. ⁵⁰ Iphe, l'ii-mechia bụ g'ì họtá ndu Lívayi ono g'ẹphe letajẹ ẹnya l'ulo-ẹkwa, eedobeje ẹkwo-ekemu Chileke; ẹphe eletajẹ ẹnya l'ivu, dù iya nù; mẹ iphemiphe, bụ iphe, aduje l'ulo-ẹkwa ono. Oo ẹphebedua bẹ a-nọduje apa ulo-ẹkwa ono; mẹ iphe, bụ ivu, dukota iya nù. O bụru phẹ a-nwuberu iya ẹnya; ẹphe egudeje ulo-ẹkwa nkepẹ kpọphee ulo-ẹkwa ono mgburugburu. ⁵¹ Iphe, bụ teke ulo-ẹkwa ono abya atugbu; g'ọ bụru ndu Lívayi bẹ a-phọ-tsutajẹ iya. Iphe, bụ teke aakpọbe ulo-ẹkwa ono; g'ọ bukwarupho ndu Lívayi bẹ a-kpọbeje iya nù. Onye ọzo mmanụ, jekuberu iya ntse bẹ ee-gbu egbugbu. ⁵² Ndu Ízurèlu a-kpọbeje ulo-ẹkwa phẹ l'ọnu-ogo l'ọnu-ogo. Iphe, bụ nwoke nọnu a-kpọbeje ulo-ẹkwa iya l'ọnu-ogo nkepẹ l'ẹka ẹphe kpọberu ẹkwa-ọhubama ipfu phẹ. ⁵³ Obenu lẹ ndu Lívayi bẹ e-gude ulo-ẹkwa nkepẹ kpọpheta ulo-ẹkwa ono, eedobeje ẹkwo-ekemu Chileke mgburugburu; k'ọphu Chileke ẹta atụ-koshidu edzudzu-ọha Ízurèlu oke ẹhu-eghu iya. Oo ndu Lívayi bẹ a-nọdu eleta ulo-ẹkwa ẹka eedobeje ẹkwo-ekemu Chileke ono ẹnya.”

⁵⁴ Tọbudu iya bụ; ndu Ízurèlu mekọtaephe iphemiphe ono ẹgube ono, Chipfu sùru Mòsisu g'ọ mee ya.

2

Ekeshi ẹka ndu ipfu nonu a-kpọbe ọlo-ẹkwa nkephe

¹ Chipfu bya epfuaru Mosisu waa Erọnu; sù phẹ: ² “Ge ndu Ízurelu kpọbeje ọlo-ẹkwa phẹ g'ọ gha iphu l'ọlo-ẹkwa-ndzuko. Ephe ebuphee ọlo-ẹkwa-ndzuko ono mgburugburu. G'onyenonu kpọbejekwa ọlo-ẹkwa nkiya l'ọnu-ogo nkephe l'ẹka ndu ẹnya-unuphu phẹ kpọberu ẹkwa-ọhubama phẹ.”

Ipfu ophu a-kpọbe ọlo-ẹkwa ebubu phẹ laaru ọzo ẹnyanwu-awawa

³ “Ndu Jiuda bụ ẹphebedua a-kpọbe ọlo-ẹkwa nkephe l'ọzo ẹnyanwu-awawa; l'ọnu-ogo l'ọnu-ogo; l'ẹka ipfu ono kpọberu ẹkwa-ọhubama phẹ. Onye a-buru ishi ndu Jiuda bụ Náshonu nwa Amínadabu. ⁴ Iphe, a gútaru l'ipfu Jiuda ono bẹ dọ ọkporo ọnu nemadzọ mgbo tete l'ọnu ishii l'ọmadzu ọkporo iri.

⁵ “Ndu a-kpọbe ọlo-ẹkwa nkephe tsota phẹ bẹ bụ ndu ipfu kẹ Isaka. Onye a-buru ishi l'oshilokpa Isaka bụ Netanelu nwa Zuwa. ⁶ Iphe, a gútaru l'ipfu Isaka bẹ dọ ọkporo ọnu nemadzọ mgbo ishii l'ọnu iri l'ishii.

⁷ “Ndu ozo, a-kpọbe nkephe tsota phẹ bẹ bụ ndu ipfu kẹ Zebulun. Onye a-buru ishi l'oshilokpa Zebulun bụ Eliyabu nwa Helonu. ⁸ Iphe, a gútaru l'ipfu Zebulun bẹ dọ ọkporo ọnu nemadzọ mgbo ẹsaa l'ọnu ẹto l'ọmadzu ọkporo iri.

⁹ “Ipfu ono, a họtaru g'ẹphe l'ipfu Jiuda kpọkuba ọlo-ẹkwa phẹ l'ọnu-ogo l'ọnu-ogo ono bẹ

tùkoru dù ùkporo ùnu nemadzù mgbo ùkporo l'ùnu ishii. Ọ búrú ẹ̀phebèdua e-vutajẹ ọ̀zọ; ndu ọ̀zọ etso phẹ.”

Ipfu ọ̀phu a-kpọ̀bẹ ọ̀lọ-ẹ̀kwa ebubu nkepẹ laaru ọ̀zọ ndọ̀hali

¹⁰ “Ndu ọ̀phu a-kpọ̀bẹ ọ̀lọ-ẹ̀kwa ebubu nkepẹ l'ọ̀zọ ndọ̀hali bẹ bụ ipfu Rúbẹnu bẹ a-kpọ̀bẹ iya l'ọ̀nu-ogo l'ọ̀nu-ogo. Onye a-búrú ishi l'oshilọ̀kpa Rúbẹnu bụ Elizuru nwa Shediyo.

¹¹ Iphe, a gùtaru l'ipfu Rúbẹnu bẹ dù ùkporo ùnu nemadzù mgbo ise l'ùnu iri l'ishii l'ùmadzu ùkporo ise.

¹² “Ndu a-kpọ̀bẹ ọ̀lọ-ẹ̀kwa nkepẹ tsota ipfu Rúbẹnu bẹ bụ ipfu kẹ Simiyọnu. Onye a-búrú ishi l'oshilọ̀kpa Simiyọnu bụ Shelumẹlu nwa Zurishadayi. ¹³ Iphe, a gùtaru l'ipfu Simiyọnu bẹ dù ùkporo ùnu nemadzù mgbo ẹ̀saa l'ùnu ẹ̀sato l'ùmadzu ùkporo ise.

¹⁴ “Ndu ọ̀phu a-kpọ̀bẹ nkepẹ tsota phẹ bẹ bụ ipfu Gadu. Onye a-búrú ishi l'oshilọ̀kpa Gadu bụ Ẹ̀iyasafu nwa Diyuwẹlu. ¹⁵ Iphe, a gùtaru l'ipfu Gadu bẹ dù ùkporo ùnu nemadzù mgbo ise l'ùnu iri l'ẹ̀no l'ùmadzu ùkporo labọ l'iri.

¹⁶ “Ipfu ono, a họtaru g'ẹ̀phe l'ipfu Rúbẹnu kpọ̀-kube ọ̀lọ-ẹ̀kwa phẹ l'ọ̀nu-ogo l'ọ̀nu-ogo ono bẹ tükoru dù ùkporo ùnu nemadzù mgbo iri l'ẹ̀sato l'ùnu iri l'ẹ̀sato; l'ùkporo ùmadzu iri l'ẹ̀bo l'ùmadzu iri. Ọ búrú ẹ̀phebèdua bụ ndu k'ẹ̀bo, a-palihuje mẹ a -gbẹ̀shi ije.

¹⁷ “Ọo ya bụ; ndu Lívayi evuta ọ̀lọ-ẹ̀kwa-ndzukọ nọdu l'echilabọ ndu ipfu ono tųgbushia.

Ọọ ẹpho g'ẹphe gude kpọo ọlo-ẹkwa phẹ l'ọnu-ogo l'ọnu-ogo ono bụ g'ẹphe e-gudeje gbẹshi ije phẹ. Ndu ọnu ẹphe apagbaaru ẹkwa-ọhubama phẹ.”

Ipfu ọphu a-kpọbe ọlo-ẹkwa ebubu nkepẹ l'uzo ẹnyanwu-ariba

¹⁸ “Ndu ọphu a-kpọbe ọlo-ẹkwa ebubu nkepẹ l'uzo ẹnyanwu-ariba bẹ bụ ipfu kẹ Ifuremu; l'ọnu-ogo l'ọnu-ogo. Onye a-buru ishi l'oshilọkpa Ifuremu bụ Elishama nwa Amihudu. ¹⁹ Iphe, a gụtaru l'ipfu Ifuremu bẹ dụ ụkporo ọnu nemadzu mgbo ise; l'ọnu nemadzu; l'umadzu ụkporo ise.

²⁰ “Ndu a-kpọbe ọlo-ẹkwa nkepẹ tsota ipfu Ifuremu bẹ bụ ipfu Manáse. Onye a-buru ishi l'oshilọkpa Manáse bụ Gamalelu nwa Pedazo.

²¹ Iphe, a gụtaru l'ipfu Manáse bẹ dụ ụkporo ọnu nemadzu mgbo ẹno; l'umadzu ụkporo iri.

²² “Ndu ọphu a-kpọbe ọlo-ẹkwa nkepẹ tsota phẹ bẹ bụ ndu ipfu kẹ Benjaminu. Onye a-buru ishi l'oshilọkpa Benjaminu bụ Abidanu nwa Gidiyoni. ²³ Iphe, a gụtaru l'ipfu Benjaminu bẹ dụ ụkporo ọnu nemadzu mgbo ẹno; l'ọnu umadzu ẹsato; l'umadzu ụkporo iri.

²⁴ “Ipfu ono, a họtaru g'ẹphe l'ipfu Ifuremu kpọ-kube ọlo-ẹkwa phẹ l'ọnu-ogo l'ọnu-ogo ono bẹ tukuru dụ ụkporo ọnu nemadzu mgbo iri l'ẹto; l'ọnu umadzu iri; l'umadzu ụkporo ise. Ọ buru ẹphebedua bụ ndu k'ẹto, a-palihuje mẹ a -gbẹshi ije.”

Ipfu ọphu a-kpọbe ọlo-ẹkwa ebubu nkepẹ l'uzo isheli

25 “Ndu ophu a-kpọbe ụlo-ẹkwa ebubu nkepẹ l'uzo isheli bẹ bụ ipfu Danu; l'ọnu-ogo l'ọnu-ogo. Onye a-buru ishi l'oshilọkpa Danu bụ Ahiyeza nwa Amishadayi. 26 Iphe, a gụtaru l'ipfu Danu bẹ dụ ụkporo ụnu nemadzu mgbo ẹsaa; l'ụnu ụmadzu iri l'ishii; l'ụmadzu ụkporo iri l'ise.

27 “Ndu l'a-kpọbe ụlo-ẹkwa nkepẹ tsota ipfu Danu bẹ bụ ipfu Asha. Onye a-buru ishi l'oshilọkpa Asha bụ Pagelu nwa Okuranu. 28 Iphe, a gụtaru l'ipfu Asha bẹ dụ ụkporo ụnu nemadzu mgbo ise; l'ụnu ụmadzu ẹto; l'ụmadzu ụkporo iri l'ise.

29 “Ndu ophu a-kpọbe ụlo-ẹkwa nkepẹ tsota pẹ bẹ bụ ndu ipfu Nafutali. Onye a-buru ishi l'oshilọkpa Nafutali bụ Ahira nwa Enanu. 30 Iphe, a gụtaru l'ipfu Nafutali bẹ dụ ụkporo ụnu nemadzu mgbo ishii; l'ụnu ụmadzu iri l'ẹto; l'ụmadzu ụkporo iri.

31 “Ipfu ono, a hotaru g'ẹpẹ l'ipfu Danu kpọkube ụlo-ẹkwa pẹ l'ọnu-ogo l'ọnu-ogo ono bẹ tukuroru dụ ụkporo ụnu nemadzu mgbo iri lẹ tete; l'ụnu ụmadzu iri l'ẹno. O buru ẹphebdua bẹ e-kpejeru azu l'ije pẹ ono; pagbaaru ẹkwa-ọhubama pẹ.”

32 Ndu ono bẹ bụ ndu Ízurelu; g'e gude gua pẹ ogu l'ẹnya-unuphu pẹ l'ẹnya-unuphu pẹ. Mkpakọ ndu nokota l'ẹka a kpọberu ụlo-ẹkwa, bụ ndu a guru ogu l'ọnu-ogo l'ọnu-ogo bẹ dụ ụkporo ụnu nemadzu mgbo ẹto; l'ụkporo ụmadzu iri l'ise; l'ụnu ụmadzu ẹsato; l'ụmadzu ụkporo iri l'ẹsaa; l'ụmadzu iri. 33 O le ndu Lívayi bẹ a ta gụkobeduru lẹ ndu Ízurelu ophu; o

buru ẹgube ono bẹ Chipfu sɔru Mósísu g'o mee ya.

³⁴ Oo ya bu; ndu Ízurelu mekoṭaephe iphemiphe, Chipfu tɔru Mósísu ekemu iya. O buru ẹgube ono bẹ ẹphe kpọbechaaru ọlo-ẹkwa phe l'ọnu-ogo l'ọnu-ogo; pfubechaa ya ẹkwa-ọhubama phe. Nokwapho g'ẹphe eshije gbeshi tɔgbua; ndu ọphu nonu ẹphe le ndu ọnu-ọlo nkephe; me ndu ẹnya-unuphu nkephe.

3

Ndu Lívayi

¹ Ọwaa bu oshilokpa Eronu yele Mósísu le teke ono, Chipfu pfuru yeru Mósísu l'úbvú Sayínayi pho: ² Ẹpha unwu Eronu bẹ bu Nadabu, bu iya bu okpara iya; waa Abihu; me Eleyaza; waa Itama. ³ Noo ẹpha unwu Eronu, bu ndu a wuru manu l'ishi; mbu ndu ono, a hotaru dobe g'ẹphe buru ndu-uke Chileke. ⁴ Ọle Nadabu yele Abihu bẹ daru l'atatiphu Chipfu nwushihu; kele ẹphe gude oku, ta adudu nsọ kpọoru Chipfu ngweja oku l'echiegu Sayínayi. Ọphu ẹphe emetaduru unwegirima; o buru Eleyaza yele Itama bẹ jeahaaru ozi ndu-uke Chileke le teke ono, nna phe, bu Eronu nokwaduro ndzu.

⁵ Oo ya bu Chipfu bya asu Mósísu: ⁶ “Chita ipfu Lívayi jeye l'eka Eronu, bu onye uke Chileke; k'ọphu ẹphe a-nodu ejebude iya ozi. ⁷ Ẹphe a-nodu ejeru Eronu ozi; bya ejeru ndu Ízurelu l'ọphu ozi l'ọlo-ẹkwa-ndzuko; mbu l'ẹphe a-nodu eje ozi, rwuberu phe nu l'ọlo Chileke. ⁸ Ẹphe a-noduje eleta ivu, du l'ọlo-ẹkwa-ndzuko

ono ẹnya; shi nno ejeru ndu Ízurelu ozi, rwu-beru phẹ nù l'ulo Chileke. ⁹ Tuko ndu Lívayi l'ophu ye Eronu yele unwu iya l'eka; mbụ l'a hofutawaru phẹ g'ephe hakota l'echilabo ndu Ízurelu l'ophu woru ye iya l'eka. ¹⁰ Lị tua Eronu me unwu iya eka g'ephe buru ndu-uke Chileke. Iphe, bu onye ozo mmanu, jekuberu mgboru ulonso ono be ee-gbu egbu.

¹¹ Chipfu byakwa epfuaru Mosisu ozo su iya: ¹² "Lenu; mu shiwaa l'echilabo ndu Ízurelu hota ndu Lívayi g'ephe nochia ẹnya iphe, bu okpara; mbụ iphe, bu nwoke, vu uzo waa ne iya ekpanwa le Ízurelu. Oo ya bu le ndu Lívayi be bu nkemu; ¹³ noo kele ndu bukota okpara bu nkemu. Mboku ono, mu gbushiru ndu bu okpara l'ali Ijiputu ono be mu wotaru iphe, bu okpara ndu Ízurelu; doberu onwomu; mbụ e shikpo le nemadzu je akpaa l'anu. Epe a-buru nkemu. Oo mbedua be bu Chipfu."

Agụ ndu Lívayi ogu.

¹⁴ No iya; Chipfu bya epfuru yeru Mosisu l'echiegu Sayinayi su iya: ¹⁵ "Gua ndu Lívayi ogu; gua phe l'anya-unuphu l'anya-unuphu; me l'onulo l'onulo. Ndu ii-gu be bu unwoke, nowaru a -gbẹ l'onwa lanu kwaseru." ¹⁶ Tobudu iya bu; Mosisu gua phe egube ono, Chipfu pfuru iya ya ono.

¹⁷ Waa epha unwu Lívayi baa: Geshonu; me Kohatu; waa Merari. ¹⁸ Owaa bu epha unwu Geshonu l'anya-unuphu phe l'anya-unuphu phe; Libuni waa Shimeyi. ¹⁹ Unwu ke Kohatu l'anya-unuphu phe l'anya-unuphu phe be bu

Amuramu; me Izuha; me Heburonu; waa Uzelu. ²⁰ Unwu ke Merari l'anya-unuphu phe l'anya-unuphu phe be bu Mahuli waa Mushi. Ndu ono tukoru buru ipfu Lívayi; egube ephe du l'anya-unuphu l'anya-unuphu phe.

²¹ Unwu Geshonu bu ndu onu-ulo Libuni waa ndu onu-ulo Shimeyi. O buru phe bu ndu onu-ulo Geshonu. ²² Unwoke, nowaru onwa lanu kwaseru l'onulo Geshonu be du unu nemadzu iri l'esato; l'umadzu ukporo iri l'ise. ²³ Ndu onu-ulo Geshonu be akpobeje ulo-ekwa ebubu phe l'uzo enyanwu-ariba; l'azu ulo-ekwa Chileke. ²⁴ Onye bu ishi l'onulo Geshonu bu Eliyasafu nwa Layelu. ²⁵ Ozi, e yeru unwu Geshonu ono l'eka g'ephe jeje l'ulo-ekwa-ndzuko ono bu eleta ulo-ekwa Chileke enya; waa ekwa, e gude kpua ya; me eleta ekwa, e gude gbobuta onu-abata ulo-ekwa-ndzuko ono enya; ²⁶ me eleta ekwa, e gude gbobuta oma-unuphu; waa ekwa, e gude gbobuta onu-abata oma-unuphu ono, nowaru ulo-ekwa Chileke ono; waa oru-ngweja mgburugburu; me eleta udo enya; waa iphe, bukpo ozi, gbaru phe nu.

²⁷ Unwu Kohatu bu ndu onu-ulo Amuramu; me ndu onu-ulo Izuha; me ndu onu-ulo Heburonu; me ndu onu-ulo Uzelu. O buru phe bu ndu onu-ulo Kohatu. ²⁸ Unwoke, nowaru onwa lanu kwaseru le ndu onu-ulo Kohatu be du ukporo unu nemadzu; l'unu umadzu lanu; l'umadzu ukporo iri. O buru phe be o duru; mbu ozi, eeje l'ulo du nsọ. ²⁹ Ndu onu-ulo Kohatu be akpobeje ulo-ekwa ebubu phe l'uzo ndohali ulo-ekwa Chileke. ³⁰ Onye bu ishi l'onulo Kohatu

bụ Elizafanu nwa Uzelu. ³¹ Ozi, duru p̄hẹ nụ bụ eleta okpoko Chileke ẹn̄ya; m̄ẹ teburu; m̄ẹ iphe, aapf̄ubeje or̄oku; m̄ẹ oru-ngweja; m̄ẹ ivu, d̄u l'ulo-ns̄o, ndu-uke egudeje eje ozi; m̄ẹ ẹkwa, e gude gbobuta ẹka-kak̄ota-adu-ns̄o; waa iphe, buk̄poo ozi ọzo, gbaru p̄hẹ nụ. ³² Onye-ishi ndu-ishi ndu Lívayi l'ophu bụ Eleyaza nwa Er̄onu, bụ onye uke Chileke. Ọo ȳebdua b̄ẹ a h̄otar̄u g'ọ b̄uru onye-ishi ndu eleta ẹn̄ya l'ulo-ns̄o ono.

³³ Ụnwu k̄ẹ Merari b̄ẹ bụ p̄hẹ bụ ndu ọnu-ulo Mahuli waa ndu ọnu-ulo Mushi. Ọ b̄uru ndu ono bụ ọnu-ulo Merari. ³⁴ Unwoke, n̄owaru ọnwa lan̄u kwaseru l̄ẹ ndu ọnu-ulo Merari d̄u unu nemadz̄u iri l'ise l'umadz̄u ụkporo iri. ³⁵ Onye bụ ishi l'onulo Merari ono bụ Zuriȳelu nwa Abihelu. Ndu ọnu-ulo Merari akp̄obeje ulo-ẹkwa ebubu p̄hẹ l'uzo isheli ulo-ẹkwa Chileke. ³⁶ Ozi, e yeru ụnwu Merari l'ẹka k'ẹjeje bụ: eleta mgbo ulo-ẹkwa Chileke ono ẹn̄ya; m̄ẹ oshi, e swebushiru l̄ẹ mgbo ono; m̄ẹ itso iya; m̄ẹ ẹn̄ya ẹka aakp̄obeje ọkpa mgbo ono; waa itso ono; m̄ẹ iphe, bụ ngwa, duk̄ota iya n̄u; waa ozi ọzo, gbaru p̄hẹ nụ. ³⁷ Ozi ọzo, e yeru p̄hẹ l'ẹka g'ẹp̄he jeje bụ: eleta ẹn̄ya l'itso, e gude kp̄o-pheta ọma-unuphu ono mgburugburu; m̄ẹ ọkpa iya; m̄ẹ nggu, a kp̄oru l'ulo-ẹkwa Chileke ono; m̄ẹ eri, e kegbaaru iya.

³⁸ Ndu bụ p̄hẹ a-kp̄obeje ulo-ẹkwa ebubu nkep̄hẹ l'uzo ẹn̄yanwu-awawa ulo-ẹkwa Chileke; mb̄u l'atatip̄hu ulo-ẹkwa-ndzuk̄o ono; b̄ẹ bụ M̄osisu; ȳele Er̄onu; m̄ẹ ụnwu Er̄onu. Ọo p̄hẹ e-jek̄otaje iphe, bụ ozi, eeje ejeje l'ulo Chipfu. Onye ọzo mman̄u, jekuberu mgboru ulo Chipfu b̄ẹ ee-gbu egbugbu. ³⁹ Iphe, bụ ndu

a gụru ọgu l'ipfu Lívayi; mbụ ndu Mósísu yẹle Eronu gụru ọgu l'ọnulo l'ọnulo, bụ gẹ Chipfu sụru g'ẹphe mee ya; mbụ unwoke, nọwaru ọnwa lanụ kwaseru bẹ dụ ụkporo ọnu nemadzu mgbo labọ l'ọnu iri l'ise.

⁴⁰ Chipfu bya asụ Mósísu: “Gụkota unwoke, bụ ọkpara l'alị Ízurelu l'ophu ọgu; mbụ unwoke, nọwaru a -gbẹ l'ọnwa lanụ kwaseru; woru ẹpha phẹ deshia. ⁴¹ L'i woru ndu Lívayi doberu mube Chipfu iche; g'ẹphe nọdu l'ugwo ndu bụ ọkpara l'ulo l'ulo lẹ Ízurelu. L'i woru anụ, bụ iphe-edobe ndu Lívayi ono doberu mu; g'ẹphe nọdu l'ugwo anụ, vuru ọzo waa ẹkpa-nwa l'iphe-edobe ndu Ízurelu l'ophu.” ⁴² Oo ya bụ; Mósísu gụa iphe, bụ ọkpara l'alị Ízurelu l'ophu ọgu; ẹgube ono, Chipfu sụru g'o mee ya. ⁴³ Mkpakọ ndu bụ ọkpara l'iphe, bụ unwoke l'alị Ízurelu l'ophu; mbụ unwoke, nọwaru a -gbẹ l'ọnwa lanụ kwaseru bẹ dụ ụkporo ọnu nemadzu mgbo labọ; l'ọnu iri l'ise; l'umadzu ụkporo iri l'eto; l'umadzu iri l'eto. A gụru phẹ ọgu; deshia ẹpha phẹ l'ekwo.

⁴⁴ Tọbudu iya bụ; Chipfu bya asụ Mósísu: ⁴⁵ “Woru ndu Lívayi doberu mu iche; g'ẹphe nọdu l'ugwo ndu bụ ọkpara l'ulo l'ulo lẹ Ízurelu. L'i woru anụ, bụ iphe-edobe ndu Lívayi ono doberu mu; g'ẹphe nọdu l'ugwo anụ, vuru ọzo waa ẹkpa-nwa l'iphe-edobe ndu Ízurelu l'ophu. O kwa mbedua bẹ bụ Chipfu. ⁴⁶ A -bya abya l'ụkporo umadzu iri l'eto l'umadzu l'iri l'eto ono, bụ iphe, ọkpara ndu Ízurelu gude ka oshilokpa

Lívayi shii ono; iphe, aa-pfũ gude gbata phẹ bẹ bu ⁴⁷ mkpọla-ọchaa, ẹrwa iya dũ shẹkelu ise, bu iphe, eegudeje atũ ẹrwa iphe l'eze-ulo Chileke bẹ e gude tũa ya. Ẹrwa shẹkelu lanũ bu ụkporo gera. Ụgwo ono bẹ aa-pfũ l'ishi onye l'onye. ⁴⁸ L'i woru okpoga ono, ee-gude gbata ụmadzu ole ono, ẹphe gude ka ndu Lívayi shi ono nũ Eronu yẹle ụnwu iya.” ⁴⁹ Oo ya bu; Mósisiu nakoo okpoga ono, ee-gude gbata ndu ono; l'ẹka ndu ono, a gũru ogu; ẹphe ka ndu Lívayi shii ono. ⁵⁰ Iphe, Mósisiu natakotaru l'ẹka ndu bu okpara l'alị Ízurelu bẹ bu mkpọla-ọchaa, ẹrwa iya dũ unu shẹkelu ẹto; l'ụkporo shẹkelu ẹsato lẹ shẹkelu ise, bu iphe, eegudeje atũ ẹrwa iphe l'eze-ulo Chileke bẹ e gude tũa ya. ⁵¹ Mósisiu wota okpoga-agbafuta ono nũ Eronu yẹle ụnwu iya; ẹgube ono, Chipfu tũru iya ya l'ekemu.

4

Awa Kohatu

¹ Chipfu bya epfuru yeru Mósisiu yẹle Eronu; sũ phẹ: ² “Unu gũa ụnwu Kohatu, bu ndu shi l'eri Lívayi ogu. Unu gũa phẹ l'ọnulo l'ọnulo; mẹ l'ẹnya-unuphu l'ẹnya-unuphu. ³ Ndu unu agũ bẹ bu iphe, bu unwoke, nọwaru ụkporo apha l'apha iri je akpaa l'ụkporo apha labo l'apha iri; mbũ ndu sũwaru eje ozi l'ulo-ẹkwa-ndzukọ.

⁴ “Ozi, ụnwu Kohatu a-nodu eje l'ulo-ẹkwa-ndzukọ ono bu: eleta iphe, kakota adũ nso ẹnya. ⁵ Ndu Ízurelu -nodu abya aphota ulo-ẹkwa phẹ tugbua; gẹ Eronu yẹle ụnwu iya bahũ l'ime ulo-ẹkwa-ndzukọ je atofuta ẹkwa,

eegudeje gbobuta ẹka-kakọta-adu-nsọ; gude iya phu-chia okpoko-ekemu. ⁶ Oo ya bu; ephe ewota akpo umoro-enyimu phu-kputa iya; gude ẹkwa, dukota urwukpu-urwukpu phu ya l'eli; bya eworu mgboro, eegudeje ẹka apa iya ye iya.

⁷ "L'eli teburu pho, eedobeje buredi ono, aduje l'iphu Chipfu ono be ee-kwebeje ẹkwa, du urwukpu-urwukpu; l'e wota gbamugbamu tu-kobe iya l'eli; me ite; me nkweka; waa okoro, ngweja-me aduje. Aatu-kobekwa iya pho buredi ono, aduje l'ataphu Chileke mkpurumkpuru ono. ⁸ Ephe abya eworu ẹkwa uswe-uswe tusa l'eli iphemiphe ono; kwechita iya akpo umoro-enyimu; wota mgboro, eegudeje ẹka apa iya ye iya.

⁹ "Ephe abya egude ẹkwa, du urwukpu-urwukpu kwechia iphe, aatukobeje oroku, e gude anwu oku; gude iya kwechia oroku l'onwiya; me iphe, apaje oghu iya; me iphe, aaguje oku; me iphemiphe, eeyeje manu, e gude anwu oku. ¹⁰ Oo ya bu; ephe egude akpo umoro-enyimu phu-kputa iphemiphe ono; me ivu, dukota iya nu; woru dobe l'eli iphe, aadobeje iya gude apa iya.

¹¹ "Ephe a-phushi ẹkwa, du urwukpu-urwukpu l'eli oru-ngweja ono, e meru le mkpola-ododo ono; gude akpo umoro-enyimu kwechia ya; woru mgboro, eegudeje apa iya ye iya.

¹² "Ephe ewotakota iphe, bu ivu, eegudeje eje ozi l'ulo Chipfu; gude ẹkwa, du urwukpu-urwukpu kekobe iya; bya egude akpo umoro-enyimu kwechita iya; woru iya tukobe l'eli iphe, eegudeje apa iya.

13 “Èp̄he e-kpofu ntụ, nọ l'ọru-ngweja ono; woru ẹkwa oruswe oruswe t̄usaa l'eli iya. 14 Noo ya; ẹp̄he ewota iphe, bụ ivu, eegudeje eje ozi l'ọru-ngweja ono; tukobe l'eli ẹkwa oruswe oruswe ono. Mbụ l'ẹp̄he a-tukobe iya iphe, aagụje ọku; m̄ẹ oji; m̄ẹ iphe, eegudeje ekpo ntụ; m̄ẹ gbamugbamu. Iphemiphe ono b̄ẹ ee-kwechita akpọ umoro ẹn̄yimu; woru mgb̄oro, eegudeje apa iya ye iya.

15 “Eronu ȳẹle ụnwu iya - kwechishigbuchaep̄ho ụlo Chipfu; m̄ẹ ivu, d̄ụ iya n̄; ndu Ízurelu -byaep̄ho aph̄ota ụlo-ẹkwa p̄h̄e t̄uḡbua; g'ọ b̄uru ụnwu Kohatu e-vuta iphe ono. Ọle ọo g'ẹp̄he te edenyikwa ẹka l'iphe, d̄ụ ns̄o; ọdumeka b̄ẹ ẹp̄he a-nw̄uhukwa. Ọo ụnwu Kohatu b̄ẹ e-vutaj̄ẹ iphe ono, d̄ụ l'ụlo-ẹkwa-ndzuko ono.

16 “Eleyaza nwa Eronu, b̄ụ onye uke Chileke b̄ẹ k̄ẹ man̄ụ, eegudeje anw̄ụ ọku d̄ụ l'ẹka; m̄ẹ ụnw̄ù-is̄ensu, an̄oduje eshi mkp̄o; m̄ẹ ngwejanri, eegweje mb̄okumboku; m̄ẹ man̄ụ, aaw̄uj̄e l'ishi. Ọo ȳẹbedua b̄ẹ a-n̄odu eleta ụlo-ẹkwa Chileke l'ophu ẹn̄ya; m̄ẹ iphemiphe, d̄ụ iya n̄; mb̄ụ ụlo Chipfu; m̄ẹ ivu, d̄ụkota iya n̄.”

17 Chipfu s̄ụ M̄osisu ȳẹle Eronu: 18 “Unu te ekwekwa g'onulo Kohatu ch̄ihu l'ipfu ndu Lívayi. 19 Waa iphe, unu e-meru p̄h̄e; k'ophu ẹp̄he a-n̄odu ndz̄u; ẹp̄he taa nw̄uhudu m'ẹp̄he jekube iphe, kak̄ota-adu-ns̄o ntse baa: G'ọ b̄uru Eronu ȳẹle ụnwu iya a-bah̄uj̄e l'ime ụlo Chipfu je akaru onyen̄onu ozi ophu oo-je; m̄ẹ ivu, oo-vuta. 20 Ọle g'oshilokpa Kohatu ta abah̄ukwa je ele ẹn̄ya

l'iphe, dụ nsọ ono; m'obeta ọ buru g'ọ chaa ya ẹnya achacha mgbo lanu; ọdumeka bẹ ẹphe a-nwushihukwa.”

Unwu Geshonu

²¹ Chipfu bya asu Mosisu: ²² “Gukwaapho unwu Geshonu ọgu. Gwa phẹ l'ọnulo l'ọnulo; mẹ l'ẹnya-unuphu l'ẹnya-unuphu. ²³ Ndu ịi-gu bu iphe, bu unwoke, nọwaru ukporo apha l'apha iri jeye l'ukporo apha labo l'apha iri; mbu ndu suwaru eje ozi l'ulo-ekwa-ndzuko.

²⁴ “Iphe, a-buru ozi ndu onu-ulo Geshonu l'ozi, eeye eeye l'ulo-ekwa-ndzuko; mẹ iphe, eevu evuvu bẹ bu: ²⁵ Ẹphe e-vutajẹ ekwa, e gude mee ulo-ekwa Chileke; mbu vuta ulo-ekwa-ndzuko ono, mẹ ekwa, e gude kpua ya; mẹ akpo umoro-enyimu, e gude kwechia ya; mẹ ekwa, eegudeje gbobuta onu-ulo-ekwa-ndzuko; ²⁶ mẹ ekwa, eekobutajẹ mgburugburu l'oma-unuphu ono, nọ-pheru ulo-ekwa Chileke ono; mẹ ọrun-ṅweja ono; waa ekwa, eekobutajẹ l'onuzo; mẹ eri, e gude gebe iya; mẹ iphe, bukota ngwa, eegudeje eje ozi, dụ iya nu. Ọo ndu Geshonu ono bẹ e-gude iphe ono g'ọ ha mee iphe, ọ gbaru g'e gude iya mee. ²⁷ Iphe, bukpo ozi, unwu Geshonu ejekpo eeye; obeta ọ buru evu ivu; ọzoo eje ozi ọzo; bẹ bu Eronu yele unwu iya bẹ e-goshije g'ẹphe e-je iya. Ọo unubedua bẹ e-goshije phẹ ivu, gbaru phẹ l'evuvu. ²⁸ Noo ozi, ndu onu-ulo Geshonu a-nọduje eje l'ulo-ekwa-ndzuko bu ono. Iphe, bu ozi phẹ bẹ bu Itama nwa Eronu, bu onye uke Chileke bẹ a-nodu egoshije phẹ g'ẹphe e-je iya.”

Ụnwu Merari

²⁹ “A -bya abya l'ụnwu Merari; gụa phẹ ọgu l'ọnulo l'ọnulo; mẹ l'ẹnya-unuphu l'ẹnya-unuphu. ³⁰ Ndu ii-gụ bụ iphe, bụ unwoke, nọwaru ụkporo apha l'apha iri jeye l'ụkporo apha labọ l'apha iri; mbụ ndu sụwaru eje ozi l'ụlo-ẹkwa-ndzukọ. ³¹ Waa iphe, gbaru ụnwu Merari l'ememe teke ẹphe eje ozi l'ụlo-ẹkwa-ndzukọ baa: Ẹphe e-vutajẹ mgbo ụlo-ẹkwa Chileke; mẹ oshi, e swebushiru lẹ mgbo ono; mẹ itso iya; mẹ ọkpa mgbo. ³² Ẹphe e-vutajẹkwapho itso, nọ-pheru ọma-unuphu mgburugburu; mẹ ọkpa itso ono; mẹ nggu, a kpọru l'ụlo-ẹkwa ono; mẹ ụdo iya; mẹwaro ivu, etsoje iya nụ g'ọ ha; waa iphemiphe, e gude eje ẹgube ozi ono. Unu ketarụ onyenọnu iphe, gbaru iya l'evuvu.

³³ “Noo ozi, ndu ọnu-ulo Merari a-nọduje eje l'ụlo-ẹkwa-ndzukọ bụ ono. O bụru Itama nwa Erọnu, bụ onye uke Chileke bẹ a-nọduje egoshi phẹ g'ẹphe e-je ozi ono.”

Iphe, ndu Lívayi kpakọru dụ

³⁴ No iya; Mosisu yele Erọnu; mẹ ndu-ishi ndu Ízurelu bya atụko ndu Kohatu gụkota ọgu; gụa phẹ l'ọnulo l'ọnulo; mẹ l'ẹnya-unuphu l'ẹnya-unuphu. ³⁵ Ndu bụ unwoke, nọwaru shita l'ụkporo apha l'apha iri jeye l'ụkporo apha labọ l'apha iri; mbụ ndu sụwaru eje ozi l'ụlo-ẹkwa-ndzukọ; ³⁶ mbụ ndu a guru l'ọnulo Kohatu bẹ dụ unu nemadzu ishii; l'ụmadzu ụkporo iri l'ẹsaa l'ụmadzu iri. ³⁷ Noo mkpakọ unwoke, a guru

ọgu l'ipfu Kohatu bu ono; mbu ndu jeru ozi l'ulo-ekwa-ndzuko. Mosisu yele Eronu guru ọgu ono egube Chipfu turu Mosisu ekemu g'ọ gua ya.

³⁸ Unwu Geshonu be a gukwarupho ọgu l'onulo l'onulo; me l'enya-unuphu l'enya-unuphu. ³⁹ Iphe, bu unwoke, nowaru shita l'ukporo apha l'apha iri jeye l'ukporo apha labo l'apha iri, bu ndu suwaru eje ozi l'ulo-ekwa-ndzuko ⁴⁰ be a guru ọgu l'onulo l'onulo; me l'enya-unuphu l'enya-unuphu phe. Iphe, a gutaru be du unu nemadzu ishii l'ukporo iri le nanu l'umadzu iri. ⁴¹ Noo mkpakọ unwoke, a guru ọgu l'onulo Geshonu; mbu ndu suru eje ozi l'ulo-ekwa-ndzuko teke Mosisu yele Eronu guru phe ọgu ge Chipfu turu phe iya l'ekemu.

⁴² Unwu Merari be a gukwarupho ọgu l'onulo l'onulo; me l'enya-unuphu l'enya-unuphu. ⁴³ Iphe, bu unwoke, nowaru shita l'ukporo apha l'apha iri jeye l'ukporo apha labo l'apha iri, bu ndu suwaru eje ozi l'ulo-ekwa-ndzuko ⁴⁴ be a guru ọgu l'onulo l'onulo; guta unu umadzu esato damu. ⁴⁵ Noo mkpakọ unwoke, a gutaru l'onulo Merari bu ono. O buerupho ge Chipfu pfuru iya Mosisu bu ge Mosisu yele Eronu guru phe ọgu ono.

⁴⁶ Oo ya bu; Mosisu yele Eronu; me ndu-ishi ndu Izurelu gukota ndu Livayi l'ophu ọgu; l'onulo l'onulo; me l'enya-unuphu l'enya-unuphu. ⁴⁷ Ndu ephe guru be bu iphe, bu unwoke, nowaru shita l'ukporo apha l'apha iri jeye l'ukporo apha labo l'apha iri, bu ndu suwaru eje ozi l'ulo-ekwa-ndzuko; me evu ivu. ⁴⁸ Iphe,

ẹphe tukuru ɖu buru ɔkporo unu nemadzu; l'unu umadzu lanu; l'umadzu ɔkporo tete. ⁴⁹ E goshichaa ndu nonu l'ehu l'ehu ozi, ẹphe a-noduje eje; me ivu, ẹphe a-noduje evu. O buerupho ge Chipfu suru Mosisu g'o mee ya bu g'o meru iya.

5

Edobe ẹka ndu Ízurelu kpoberu ọlo-ẹkwa phe nsọ

¹ Chipfu bya asu Mosisu: ² “Pfuaru ndu Ízurelu g'ẹphe chishia iphe, bu ndu ekpenta eme l'eka ono, ẹphe kpoberu ọlo-ẹkwa ebubu phe ono; ẹphe achishia ndu iphe alwashì alwashì l'ehu. Ẹphe achishikwaapho ndu denyiru ẹka l'odzu; shi nno merwua onwophe. ³ Unu chifukota phe; unwoke; me unwanyi. Unu chishia phe l'eka ono, unu kpoberu ọlo-ẹkwa unu g'ẹphe be merwu iya; mbu l'eka ono, mu bu l'echilabo unu ono.” ⁴ Ndu Ízurelu mee ya egube ono; bya achishikota ndu ono l'eka ono, ẹphe kpoberu ọlo-ẹkwa phe ono. O buru ge Chipfu pfuru iya Mosisu bu g'ẹphe meru iya.

K'apfu ugwo iphe, e mebyiru

⁵ Chipfu su Mosisu: ⁶ “Pfuaru ndu Ízurelu le-a: Teke nemadzu; mbu nwoke; ozoo nwanyi mesweru nwibe iya egube ono, ndiphe emeje; mbu shi nno meswee Chipfu; be ikpe nmaakwaru onye obu. ⁷ Onye obu be e-pfu iphe-eji ono, o meru ono. L'o pfu-dzukota ugwo ejo-iphe obu, o meru obu g'o ha; wota ọzo lanu l'uzo ise l'iphe iya yekobe iya nu onye ono, o mesweru ono.

⁸ Ọ -bùru l'onye ono, e mesweru ono te nwedu abùbu, bù onye aa-pfù ùgwò iphe ono; ọọ ya bù; ùgwò ono abùru kẹ Chipfu. Onye aa-nù iya bẹ bù onye uke Chileke. Aakpuru ebili, e gude apfù ùgwò iphe-ẹjì yekọbe iya. ⁹ Iphe, bù iphe, ndu Ízurelu doberu nsọ g'ẹphe nù Chipfu, bù iphe, ẹphe wotaru bya anù onye uke Chileke bụkota k'onye uke ono. ¹⁰ Iphe, onye doberu nsọ gẹ ya nù Chileke bẹ bù onye uke Chileke bẹ nwe iya nù. Iphe, bụkpoo iphe, a nuru onye uke Chileke buri onye uke Chileke ono nwe iya."

Kẹ nwanyi, jì iya ele ẹnya l'oori ogori

¹¹ Tọbudu iya bù; Chipfu bya asù Mosisu:
¹² "Pfiaru ndu Ízurelu; sù phẹ: Ọ -bùru lẹ nwoke bẹ nyee ya akpa njọ ọrì; shi nno emeswe jì iya;
¹³ mbù; ọ -bùru lẹ yẹle nwoke ọzo kwarù; o shi nno merwua onwiya; ọphu jì iya ta amadù; tẹme ọphu egechiduru iya teke oome iya; ọphu ọ dudu onye gbaru ekebe l'ọọ iphe, o meru bù ono; ¹⁴ mbù; ọ -bùru lẹ nwoke ono bẹ nọnyaaru; o koaharù nyee ya ono okophoo; leahaa ya ẹnya l'o merwuaru onwiya; lẹ teke nwanyi ono merwuru onwiya; ọzo l'a nọnyaaru; o koaharù nyee ya ono okophoo; leahaa ya ẹnya l'o merwuru onwiya l'ẹbe abù l'o merwuru onwiya;
¹⁵ gẹ nwoke ono duta nyee ya ono jepfu onye uke Chileke. L'o gude ọzo lanù l'ime nkweka ukpokutu balì, e keru ọzo iri, ee-gude gwee ẹja ẹhu nyee ya ono. G'o to yekwa manù l'ukpokutu balì ono; ọphu o yekwa iya ùnwù-isensu; noo kẹle ọọ ngweja-nri, e gwerù lẹ k'okophoo; mbù ngweja, e gude anyata ẹjo-iphe.

16 “G’onye uke Chileke duritaru nwanyị ono ntse g’ọ pfuru l’atathphu Chipfu. 17 Oo ya bụ; onye uke Chileke ono ekuta mini, e doberu nsọ l’ite, a kpuru l’urwa; kpota udzu eja, shi l’oma-ulo ulo-ekwa Chileke wuru ye l’ime mini ono. 18 Onye uke Chileke -pfubechaepho nwanyị ono l’atathphu Chipfu; l’ootofu iya iphe, o keberu l’ishi; pata ngweja-nri ono, e gude anyata eji- iphe ono nụ iya g’ọ parụ l’eka; mbụ ngweja-nri ono, e gwerụ lẹ k’okophoo ono. Onye uke Chileke ono l’onwiya aparụ mini, atso ilu ono, emeje gẹ nemadzụ bụru onye a turu onu ono. 19 O bụru teke ono bẹ onye uke Chileke a-nụ nwanyị ono nte g’o ria sụ: ‘O -bụru l’ọ tọ dudu nwoke ọzo, gụ l’iya kwajeru; ophu i tị kpaduru njo uri; shiwaa nno merwua onwongu l’ehu-nwoke ọzo, gbahakwa ji ngu-a; gẹ mini, atso ilu-a, emeje gẹ nemadzụ bụru onye a turu onu-a ta adukwa iphe, oo-me ngu. 20 Oloburu l’i nọ l’eka ji ngu-a; bya akpaa njo uri; gụ lẹ nwoke ọzo kwaa gbahakwa ji ngu-a; i shi nno merwua onwongu; 21 gẹ Chipfu mekwaa g’ekpa-nwa chihu ngu; mbụ g’i tị tị nwa l’utapfu; g’i bụru onye aa-noduje ephu l’iphu; bya anma l’ejo etu l’ibe unu.’ Noo nte, onye uke Chileke ono a-sụ nwanyị ono g’o ria; tịa onwiya onu bụ ono. 22 ‘Mbụ; gẹ mini, atso ilu-a, emeje gẹ nemadzụ bụru onye a turu onu-a kpobakwa ngu l’epho; k’ophu ekpa-nwa e-chihu ngu; g’i tị tị nwa l’utapfu.’

“Oo ya bụ; nwanyị ono asụ: ‘G’ọ dū nū g’i pfuru. G’ọ dū nū g’i pfuru.’

23 “Onye uke Chileke ono abya atuko ejo enwa ono, o guru ono deshikota l’ekwo; l’o bya asaru

iphe ono, o deru ono ye lẹ mini, atso ilu ono. ²⁴ L'ọ bya eworu mini, atso ilu ono, emeje nemadzu g'ọ buru onye a turu onu ono nu nwanyi ono g'ọ ngua. Ọ -ngue ya pho; mini ono anodu iya l'epho; mee g'ejo iphe-ehuka, tsohuru ilu dapfuta iya. ²⁵ Lẹ teke ono be onye uke Chileke ono a-nata nwanyi ono ngweja-nri ono, e gweru lẹ k'okophoo ono, nwanyi ono pa l'eka ono; l'obya amaa ya amama l'atatiphu Chipfu; woru iya je edobe l'oru-ngweja. ²⁶ Onye uke Chileke ono abya ahajia ngweja-nri ono mkpoji-eka; woru kpoo oku l'oru-ngweja ono. Ngweja ono a-buru ngweja, e gude anyata ejo-iphe ono. O -mechaepho nno; l'ọ bya anu nwanyi ono mini ono g'ọ ngua. ²⁷ Ọ -buru l'o merwurwu onwiya; mbu l'o mesweru ji iya; be bu teke a nueru iya pho mini ono; o ngua; o bahu iya l'epho be o-me g'ejo iphe-ehuka, atso ilu dapfuta iya. O-me g'ekpa-nwa chihu iya; g'ọ to tu nwa l'utapfu; temanu o buru onye vu onu l'ibe phe. ²⁸ Teke o bu lẹ nwanyi ono be te emerwuduru onwiya; mbu-a; o -buru lẹ nwanyi ono du ree; be o to dudu iphe, bya l'e-me iya nu; oo-nodu anwushi unwegirima.

²⁹ "Noo ekemu, a turu swiberu nwanyi, ji iya ekoru okophoo; mbu nwanyi, no l'eka ji iya; o nodu akpaje njo uri; emerwushi onwiya; ³⁰ ozoo l'a nonyaaru nwoke koaharu nyee ya okophoo; leahaa ya njo enya. G'onye uke Chileke pfube nwanyi obu l'iphu Chipfu mekota iya iphemiphe ono, a turu l'ekemu ono. ³¹ Nwoke ono l'onwiya be ta adukwa ejo-iphe, a-tukoru iya l'ishi. Oo nwanyi ono e-vuru ejo-iphe, o metaru kpua

onwiya.”

6

Onye woru onwiya doberu Chipfu iche

¹ Chipfu sù Mósísi: ² “Pfurú yeru ndu Ízurèlu sù phè-a: O -nweru nwoke; òzoo nwanyị, kweru ukwe, gbaru iche sù lẹ ya a-duru Chipfu iche; mbụ lẹ ya e-dobe onwiya gẹ ya bụru onye gbaru iche l'ènya Chipfu; ³ g'onye ọbu ta ngụjekwa mēe; òzoo iphe, aangụ angungu, atsụ atsutsu. Ọphu ọ ngụjekwa mēe-venịga; òzoo ọphu e meru l'iphe, aangụ angungu ọzo, atsụ atsutsu. G'ọ tọ ngụjekwa mini akpuru vayinu; ọphu o rijekwa akpuru vayinu oyii; òzoo ọphu e gheru egheghe. ⁴ G'o to rijekwa iphe, shi l'oshi vayinu; m'ọ bụ akpuru vayinu ọbu l'onwiya; òzoo ẹgbo vayinu jeye teke ọo-bụ-beru onye duru Chipfu iche.

⁵ “Akwo ta abyadu e-rwu iya l'ishi jeye g'oo-bụ-beru onye doberu onwiya iche ono. Ọo-duepho iche g'ọ dụ iya jasụ; teke ono, o doberu onwiya Chipfu iche ono edzua. Egbushi, nọ iya l'ishi bẹ ọo-ha g'o rwuchia erwuchi. ⁶ L'ògè teke ono, ọ duru Chipfu iche ono bẹ ọ tọ byadu e-je lẹ mgboru ẹka odzu nọ. ⁷ Mbụ; obeta ọ bụru l'ọo nna iya nwuhuru; òzoo l'ọo ne iya nwuhuru; òzoo l'ọo nwune iya kẹ nwoke; òzoo nwune iya kẹ nwanyị bẹ ọ tọ bụdu iya e-me g'ọ tūrwa onwiya; kẹle abubu, ọ bụ onye duru Chileke iche; tukoru iya l'ishi. ⁸ Lẹ teke ono ọo-nọkotakpo bụru onye doberu onwiya iche ono bẹ ọ bụ onye duru Chipfu nsọ.

9 “Teke o nweru onye gbabuhuru nwùhu lẹ mgboru ẹka ọ nọ; o shi nno turwua onwiya l'abubu ono, ọ bu onye duru Chileke iche ono, bu ọphu tukoru iya l'ishi ono; g'ọ nọ abali ẹsaa; o -rwuepho lẹ mbọku k'ẹsaa; l'ọ kpushia ishi; shi nno rọo onwiya ẹhu ọzo. ¹⁰ O -be lẹ mbọku k'ẹsato; l'ọ wota ndo labọ; ọzoo unwu kparaka labọ wojeru onye uke Chileke l'ọnu ọlo-ẹkwa-ndzukọ. ¹¹ Ọo ya bu; onye uke Chileke ono abya ewota nanu gwee ngweja-iphe-ẹji; l'ọ wota nanu ọphuu gwee ngweja-akpo-ọku gude pfula ugwo iphe-ẹji ono, o meru ono; mbu l'ọ nọru lẹ mgboru ẹka nemadzu nwuhuru. O buru mbọku onokwapho be oo-me g'ishi iya du-phu nsọ azu. ¹² L'ọ byakwa aburu onye duru Chipfu iche g'ọ shi buru iya. O -nọ-dzua ya; l'ọ kputa ebili, gbaru apha je anu g'e gude gweeru iya ngweja-apfu-ugwo. Ophu, ọ nọhawaru pho be a taa gukwa eye iya; kele ọ nọ iya turwua onwiya.

¹³ “Qwaa bu ekemu, duru onye woru onwiya doberu Chipfu iche; nọ ya nọ-dzua. Ee-duru onye obu bya l'ọnu ọlo-ẹkwa-ndzukọ. ¹⁴ O buru l'ẹka ono be ọo-nọdu woru iphe, ọonu Chipfu nu iya. Ọo-nu iya ebili, gbaru apha, te nwedu ẹka iphe mebyiru iya g'e gude gwee ngweja-akpo-ọku; l'ọ bya anu nwada aturu, gbawaru apha, te enwedu ẹka iphe mebyiru iya g'e gude gwee ngweja-iphe-ẹji; l'ọ nu ebili, te enwedu ẹka iphe mebyiru iya g'e gude gwee ngweja-ẹhu-guu. ¹⁵ Iphe ọzo, oo-yekobe iya bu nkata buredi, e te yeduru iphe ekoje buredi; waa akara, e meru l'ukpokutu witi, gwọo lẹ manu; me ẹchambekee, a wuru manu l'eli; waa ngweja-nri;

yele ngweja-mẹe, ayijeru iya nù.

¹⁶ “Iphe ono g'ò ha bẹ onye uke Chileke e-gweru nù Chipfu. L'o gwee ngweja-iphe-ẹji ono; waa ngweja-akpo-ọku ono. ¹⁷ Onye uke Chileke ono bẹ e-woru nkata buredi ono, ekoduru ekoko ono nù Chipfu; bya egbua ebili pho gude gwee ngweja-ẹhu-guu nù Chipfu; bya eyekobekwa iya pho ngweja-nri; yee ngweja-mẹe, etsoje iya nù tuko gwee. ¹⁸ O buru l'onu ulo-ekwa-ndzuko bẹ onye ono, woru onwiya doberu Chipfu iche ono a-nodu kpushia ishi ono, o shi doberu Chileke iche ono. L'o kpota egbushi iya ono ye l'oku, nọ le mkpula ẹka iphe, e gude gwee ngweja-ẹhu-guu nọ.

¹⁹ “Onye ono, duru Chipfu iche ono - kpushichaepho ishi ono, o doberu iche ono; g'onye uke Chileke wota ẹka ebili ono ophu e shiru eshishi dee ya l'ẹka; l'ọ bya ewotafua akara lanu, te koduru ekoko le nkata ono; waa ẹchambekee lanu, te koduru ekoko nu iya. ²⁰ Oo ya bu; onye uke Chileke ono abya amaa ya amama l'iphu Chipfu g'ọ buru ngweja amama. Iphe ono bẹ du nsọ; o buru onye uke Chileke bẹ nwe iya nu; yele ndu ebili ono, a maru amama; me utapfu iya ono, a nuru Chipfu ono. E -mechaa nno; onye ono, duru Chipfu iche ono angwaro me.

²¹ “Ono bu ekemu duru onye woru onwiya doberu Chipfu iche; mbu onye kwetaru ukwe le ya e-woru onwiya doberu Chipfu iche; wak-wapho iphe, oo-nuje Chipfu me o no-dzue ya pho; a -gufukwa iphe ozo, oo-du ike gbatafua.

Ọle o medzufutaje iphe, o kweru ukwe iya; le g'ekemu onye duru Chipfu iche gude du.”

Ọnu-ọma ndu-uke Chileke l'ẹhu ndu Ízurelu

²² Chipfu bya asu Mosisu: ²³ “Pfuaru Eronu yele unwu iya su phe g'ephe gojeru ndu Ízurelu ọnu-ọma. Waa g'ephe epfuje iya baa:

²⁴ “ ‘Gẹ Chipfu goru ọnu-ọma nu unu; chee unu.

²⁵ Gẹ Chipfu mee g'ataphu iya gbuaru unu nwiiinwii;

l'o meeru unu eze-iphe-ọma.

²⁶ Gẹ Chipfu ghaaru unu iphu;

mee g'ẹhu du unu guu.’

²⁷ “Oo ya bu; ephe -gude epha mu goru ọnu-ọma nu ndu Ízurelu; mu agoru ọnu-ọma nu phe.”

7

Ngweja, e gude edobe ọlo-ekwa Chipfu iche

¹ Tọbudu iya bu; Mosisu bvubechaepho ọlo-ekwa Chipfu ono; o wua ya manu; bya edobe iya iche; bya edobekwapho iphe, bu ivu no iya nu g'o ha iche. Nokwapho g'o wuru manu l'oru-ngweja; dobe iya iche; bya edobekwapho iphe, bu ivu oru-ngweja ono g'o ha iche. ² Oo ya bu; ndu-ishi ndu Ízurelu, bu ndu-ishi l'anya-unuphu l'anya-unuphu; mbu ndu-ishi l'ipfu l'ipfu, bu iya bu ndu ono, bu ishi ndu ophu a guru ogo ono bya eworu iphe nu. ³ Iphe, ephe nuru Chipfu be bu ogba-kperekpere ishii, e kpuchiru iphe; me oke-eswi iri l'ebo. Ndu-ishi ono be nuchaaru oke-eswi lanu oke-eswi lanu l'ehu l'ehu. Ephe du ebo

ẹbo nucha ọgba-kperekpere lanu. Noo iphe, ẹphe wotaru bya anu l'iphu ulo-ekwa Chipfu bu ono.

⁴ Chipfu su Mosisu: ⁵ “Natakota phe iphe ono, ẹphe nuru; k'ophu ee-gude iya eje ozi l'ulo-ekwa-ndzuko. Li woru iya nu ndu Lívayi. Onyenonu be ii-nucha ya le g'ozu iya gbaru.”

⁶ Oo ya bu; Mosisu bya ewota ọgba-kperekpere ono; me oke-eswi ono nu ndu Lívayi. ⁷ Unwu Geshonu be o nuru ọgba-kperekpere labo; waa oke-eswi eno g'ẹphe gude jeje ozi, gbaru phe nu. ⁸ O nu unwu Merari ọgba-kperekpere eno; waa oke-eswi esato g'ẹphe gude jeje ozi, gbaru phe nu. G'ẹphe ha be nokota l'eka Itama nwa Eronu, bu onye uke Chileke eje ozi phe. ⁹ Obenu l'o to dudu ophu o nuru unwu Kohatu; kele oo ẹphebedua be evu iphe, du nsọ ono l'ukuvu duru.

¹⁰ Mboku, a wuru manu l'oru-ngweja Chileke g'e gude woru iya ye Chileke l'eka be ndu-ishi ono wotagbaaru iphe bya anu Chileke l'iphu oru-ngweja ono. ¹¹ Chipfu bya asu Mosisu: “Ge ndu-ishi ono byaje nanu nanu le mboku le mboku bya anu iphe ngweja phe g'e gwee l'oru-ngweja ono; shi nno woru iya ye Chileke l'eka.”

¹² Onye wotaru iphe nkiya bya anu le mboku ke mbu be bu Nashonu nwa Aminadabu, bu onye-ishi ndu Jiuda. ¹³ Iphe, o nuru bu gbamugbamu mkpola-ochaa lanu, ẹrwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, ẹrwa iya du ukporo shekelu eto le shekelu iri.

G'ò ha bú iphe, eegudeje atụ ẹrwa iphe l'eze-ulo Chileke bẹ e gude tua ya. Ọphu nonu bẹ e yejishikotaru ukpokutu ereshi, a gwọru lẹ manụ; g'e gude gwee ngweja-nri. ¹⁴ Iphe ọzo, ọ nuru bẹ bú agọ lanụ, e meru lẹ mkpọla-ododo, ẹrwa iya dụ shẹkelu iri; iphe, jiru iya nụ bú ùnwù-isensu; ¹⁵ bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpọ-ọku; ¹⁶ waa mkpi lanụ, ee-gude gwee ngweja-iphe-ẹji; ¹⁷ mẹ oke-eswi labọ; waa ebili ise; mẹ mkpi ise; mẹ unwu ebili ise, gbachaaru apha, ee-gude gwee ngweja-ẹhu-guu. Noo iphe, Nášọnu nwa Amínadabu wotaru bya anụ bú ono.

¹⁸ O be lẹ mbọku k'ẹbo; Netanelu nwa Zuwa, bú onye-ishi l'ipfu Isaka wota iphe nkiya bya anụ. ¹⁹ Iphe, ọ nuru bú gbamugbamu mkpọla-ọchaa lanụ, ẹrwa iya dụ ukporo shẹkelu ishii lẹ shẹkelu iri; bya anụkwapho ochi lanụ, e meru lẹ mkpọla-ọchaa, ẹrwa iya dụ ukporo shẹkelu ẹto lẹ shẹkelu iri. G'ò ha bú iphe, eegudeje atụ ẹrwa iphe l'eze-ulo Chileke bẹ e gude tua ya. Ọphu nonu bẹ e yejishikotaru ukpokutu ereshi, a gwọru lẹ manụ; g'e gude gwee ngweja-nri. ²⁰ Iphe ọzo, ọ nuru bẹ bú agọ lanụ, e meru lẹ mkpọla-ododo, ẹrwa iya dụ shẹkelu iri; iphe, jiru iya nụ bú ùnwù-isensu; ²¹ bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpọ-ọku; ²² waa mkpi lanụ, ee-gude gwee ngweja-iphe-ẹji; ²³ mẹ oke-eswi labọ; waa ebili ise; waa mkpi ise; mẹ unwu ebili ise, gbachaaru apha, ee-gude gwee ngweja-ẹhu-guu. Noo iphe, Netanelu

nwa Zuwa wotaru bya anụ bu ono.

²⁴ O be lẹ mbọku k'eto; Eliyabu nwa Helonu, bu onye-ishi ndu kẹ Zebulun wota iphe nkiya bya anụ. ²⁵ Iphe, ọ nuru bu gbamugbamu mkpọla-ọchaa lanụ, ẹrwa iya dụ ụkporo shẹkelu ishii lẹ shẹkelu iri; bya anụkwapho ochi lanụ, e meru lẹ mkpọla-ọchaa, ẹrwa iya dụ ụkporo shẹkelu ẹto lẹ shẹkelu iri. G'ọ ha bu iphe, eegudeje atụ ẹrwa iphe l'eze-ulo Chileke bẹ e gude tụa ya. Ophu nonu bẹ e yejishikotaru ukpokutu ereshi, a gwọru lẹ manụ; g'e gude gwee ngweja-nri. ²⁶ Iphe ọzo, ọ nuru bẹ bu agọ lanụ, e meru lẹ mkpọla-ododo, ẹrwa iya dụ shẹkelu iri; iphe, jiru iya nụ bu ụnwù-isensu; ²⁷ O bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpo-ọku; ²⁸ waa mkpi lanụ, ee-gude gwee ngweja-iphe-ẹji; ²⁹ waa oke-eswi labọ; mẹ ebili ise; waa mkpi ise; mẹ ụnwu ebili ise, gbachaa apha, ee-gude gwee ngweja-ẹhu-guu. Noo iphe, Eliyabu nwa Helonu wotaru bya anụ bu ono.

³⁰ O be lẹ mbọku k'eno; Elizuru nwa Shediyo, bu onye-ishi, ụnwu Rúbenu wota iphe nkiya bya anụ. ³¹ Iphe, ọ nuru bu gbamugbamu mkpọla-ọchaa lanụ, ẹrwa iya dụ ụkporo shẹkelu ishii lẹ shẹkelu iri; bya anụkwapho ochi lanụ, e meru lẹ mkpọla-ọchaa, ẹrwa iya dụ ụkporo shẹkelu ẹto lẹ shẹkelu iri. G'ọ ha bu iphe, eegudeje atụ ẹrwa iphe l'eze-ulo Chileke bẹ e gude tụa ya. Ophu nonu bẹ e yejishikotaru ukpokutu ereshi, a gwọru lẹ manụ; g'e gude gwee ngweja-nri. ³² Iphe ọzo, ọ nuru bẹ bu agọ lanụ, e meru lẹ

mkpọla-ododo, ẹrwa iya dọ shẹkelu iri; iphe, jiru iya nọ bọ ùnwù-isẹnsu; ³³ Ọ bya anọ nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ³⁴ waa mkpi lanu, ee-gude gwee ngweja-iphe-ẹji; ³⁵ waa oke-eswi labo; mẹ ebili ise; waa mkpi ise; waa unwu ebili ise, gbachaaru apha, ee-gude gwee ngweja-ẹhu-guu. Noo iphe, Elizuru nwa Shediyo wotaru bya anọ bọ ono.

³⁶ O be ẹ mbọku k'ise; Shelumẹlu nwa Zurishadayi, bọ onye-ishi unwu Simiyonu wota iphe nkiya bya anọ. ³⁷ Iphe, ọ nuru bọ gbamugbamu mkpọla-ọchaa lanu, ẹrwa iya dọ ukporo shẹkelu ishii ẹ shẹkelu iri; bya anukwapho ochi lanu, e meru ẹ mkpọla-ọchaa, ẹrwa iya dọ ukporo shẹkelu ẹto ẹ shẹkelu iri. G'ọ ha bọ iphe, eegudeje atọ ẹrwa iphe l'eze-ulo Chileke bẹ e gude tọ ya. Ophu nonu bẹ e yejishikotaru ukpokutu ereshi, a gwọru ẹ manu; g'e gude gwee ngweja-nri. ³⁸ Iphe ọzo, ọ nuru bẹ bọ agọ lanu, e meru ẹ mkpọla-ododo, ẹrwa iya dọ shẹkelu iri; iphe, jiru iya nọ bọ ùnwù-isẹnsu; ³⁹ Ọ bya anọ nwa oke-eswi lanu; waa ebili lanu; mẹ nwa ebili lanu, gbaru apha, ee-gude gwee ngweja-akpo-oku; ⁴⁰ waa mkpi lanu, ee-gude gwee ngweja-iphe-ẹji; ⁴¹ waa oke-eswi labo; mẹ ebili ise; waa mkpi ise; waa unwu ebili ise, gbachaaru apha, ee-gude gwee ngweja-ẹhu-guu. Noo iphe, Shelumẹlu nwa Zurishadayi wotaru bya anọ bọ ono.

⁴² O be ẹ mbọku k'ishii; Eliyasafu nwa Diyuwẹlu, bọ onye-ishi unwu Gadu wota iphe nkiya bya anọ. ⁴³ Iphe, ọ nuru bọ gbamugbamu

mkpọla-ọchaa lanu, ẹrwa iya du ọkporo shekelu ishii le shekelu iri; bya anukwapho ochi lanu, e meru le mkpọla-ọchaa, ẹrwa iya du ọkporo shekelu ẹto le shekelu iri. G'ọ ha bu iphe, eegudeje atu ẹrwa iphe l'eze-ulo Chileke be e gude tu ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁴⁴ Iphe ozo, o nuru be bu ago lanu, e meru le mkpọla-ododo, ẹrwa iya du shekelu iri; iphe, jiru iya nu bu unwu-isensu; ⁴⁵ O bya anu nwa oke-eswi lanu; waa ebili lanu; me nwa ebili lanu, gbaru apha, ee-gude gwee ngweja-akpo-oku; ⁴⁶ waa mkpi lanu, ee-gude gwee ngweja-iphe-eji; ⁴⁷ waa oke-eswi labo; me ebili ise; waa mkpi ise; waa unwu ebili ise, gbacharu apha, ee-gude gwee ngweja-ehu-guu. Noo iphe, Eliyasafu nwa Diyuwelu wotaru bya anu bu ono.

⁴⁸ O be le mboku k'esa; Elishama nwa Amihudu, bu onye-ishi ndu Ifuremu wota iphe nkiya bya anu. ⁴⁹ Iphe, o nuru bu gbamugbamu mkpọla-ọchaa lanu, ẹrwa iya du ọkporo shekelu ishii le shekelu iri; bya anukwapho ochi lanu, e meru le mkpọla-ọchaa, ẹrwa iya du ọkporo shekelu ẹto le shekelu iri. G'ọ ha bu iphe, eegudeje atu ẹrwa iphe l'eze-ulo Chileke be e gude tu ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁵⁰ Iphe ozo, o nuru be bu ago lanu, e meru le mkpọla-ododo, ẹrwa iya du shekelu iri; iphe, jiru iya nu bu unwu-isensu; ⁵¹ O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee

ngweja-akpo-oku; ⁵² waa mkpi lanu, ee-gude gwee ngweja-iphe-eji; ⁵³ waa oke-eswi labo; me ebili ise; waa mkpi ise; waa unwu ebili ise, gbacharu apha, ee-gude gwee ngweja-ehu-guu. Noo iphe, Elishama nwa Amihudu wotaru bya anu bu ono.

⁵⁴ O be le mboku k'esato; Gamalelu nwa Pedazo, bu onye-ishi ndu ipfu Manase wota iphe nkiya bya anu. ⁵⁵ Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁵⁶ Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁵⁷ O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁵⁸ waa mkpi lanu, ee-gude gwee ngweja-iphe-eji; ⁵⁹ waa oke-eswi labo; me ebili ise, waa mkpi ise; waa unwu ebili ise, gbacharu apha, ee-gude gwee ngweja-ehu-guu. Noo iphe, Gamalelu nwa Pedazo wotaru bya anu bu ono.

⁶⁰ O be le mboku ke tete; Abidanu nwa Gidiyoni, bu onye-ishi ndu Benjaminu wota iphe nkiya bya anu. ⁶¹ Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo

shẹkelu ẹto lẹ shẹkelu iri. G'ọ ha bụ iphe, eegudeje atụ ẹrwa iphe l'eze-ulo Chileke bẹ e gude tụa ya. Ọphu nonu bẹ e yejishikotaru ukpokutu ereshi, a gwọru lẹ manụ; g'e gude gwee ngweja-nri. ⁶² Iphe ọzo, ọ nuru bẹ bụ agọ lanụ, e meru lẹ mkpọla-ododo, ẹrwa iya dụ shẹkelu iri; iphe, jiru iya nụ bụ ùnwù-isensu; ⁶³ Ọ bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpo-ọku; ⁶⁴ waa mkpi lanụ, ee-gude gwee ngweja-iphe-ẹji; ⁶⁵ waa oke-eswi labo; mẹ ebili ise; waa mkpi ise; waa unwu ebili ise, gbachaaru apha, ee-gude gwee ngweja-ẹhu-guu. Noo iphe, Abidanu nwa Gidiyoni wotaru bya anụ bụ ono.

⁶⁶ O be lẹ mbọku k'iri; Ahiyeza nwa Amishadayi, bụ onye-ishi ndu ipfu Danu wota iphe nkiya bya anụ. ⁶⁷ Iphe, ọ nuru bụ gbanugbamu mkpọla-ọchaa lanụ, ẹrwa iya dụ ukporo shẹkelu ishii lẹ shẹkelu iri; bya anukwapho ochi lanụ, e meru lẹ mkpọla-ọchaa, ẹrwa iya dụ ukporo shẹkelu ẹto lẹ shẹkelu iri. G'ọ ha bụ iphe, eegudeje atụ ẹrwa iphe l'eze-ulo Chileke bẹ e gude tụa ya. Ọphu nonu bẹ e yejishikotaru ukpokutu ereshi, a gwọru lẹ manụ; g'e gude gwee ngweja-nri. ⁶⁸ Iphe ọzo, ọ nuru bẹ bụ agọ lanụ, e meru lẹ mkpọla-ododo, ẹrwa iya dụ shẹkelu iri; iphe, jiru iya nụ bụ ùnwù-isensu; ⁶⁹ Ọ bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpo-ọku; ⁷⁰ waa mkpi lanụ, ee-gude gwee ngweja-iphe-ẹji; ⁷¹ waa oke-eswi labo; mẹ

ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Ahiyeza nwa Amishadayi wotaru bya anu bu ono.

⁷² O be le mboku k'iri le nanu; Pagelu nwa Okurano, bu onye-ishi ndu ipfu Asha wota iphe nkiya bya anu. ⁷³ Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁷⁴ Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁷⁵ O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁷⁶ waa mkpi lanu, ee-gude gwee ngweja-iphe-eji; ⁷⁷ waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Pagelu nwa Okurano wotaru bya anu bu ono.

⁷⁸ O be le mboku k'iri l'ebo; Ahira nwa Enanu, bu onye-ishi unwu Nafutali wota iphe nkiya bya anu. ⁷⁹ Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya.

Ọphu nonu bẹ e yejishikotaru ukpokutu ereshi, a gworu lẹ manụ; g'e gude gwee ngweja-nri. ⁸⁰ Iphe ọzo, ọ nuru bẹ bu agọ lanụ, e meru lẹ mkpọla-ododo, ẹrwa iya dụ shẹkelu iri; iphe, jiru iya nụ bu ụnwù-isensu; ⁸¹ Ọ bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpo-ọku; ⁸² waa mkpi lanụ, ee-gude gwee ngweja-iphe-ẹji; ⁸³ waa oke-eswi labọ; mẹ ebili ise; waa mkpi ise; waa unwu ebili ise, gbachaa apha, ee-gude gwee ngweja-ẹhu-guu. Noo iphe, Ahira nwa Enanu wotaru bya anụ bu ono.

⁸⁴ Iphe ono bẹ bu iphe, ndu-ishi ndu Ízurelu wotaru bya anụ g'e gude woru ọru-ngweja ono ye Chileke l'ẹka; mbụ teke ono, a wuru iya manụ ono. Iphe, ẹphe nuru bẹ bu: gbamugbamu mkpọla-ọchaa iri l'ẹbo; waa ochi mkpọla-ọchaa iri l'ẹbo; waa agọ mkpọla-ododo iri l'ẹbo. ⁸⁵ Gbamugbamu lanụ bẹ ẹrwa iya aduje ukporo shẹkelu mkpọla-ọchaa ishii lẹ shẹkelu iri. Ẹrwa ochi lanụ nọdu aduje ukporo shẹkelu mkpọla-ọchaa ẹto lẹ shẹkelu iri. G'ọ ha bu iphe, eegudeje atụ ẹrwa iphe l'eze-ulo Chileke bẹ e gude tụa ya. ⁸⁶ Agọ mkpọla-ododo ono dụ iri l'ẹbo; tẹme e yejishichaa ya ụnwù-isensu. Ẹrwa iya nọdu abujeru shẹkelu mkpọla-ododo iri iri. G'ọ ha bu iphe, eegudeje atụ ẹrwa iphe l'eze-ulo Chileke bẹ e gude tụa ya. Mkpọla-ododo, e gude mee agọ ono bẹ ẹrwa iya tuko dụ ukporo shẹkelu mkpọla-ododo ishii. ⁸⁷ Iphe mkpakọ anụ, ee-gude gwee ngweja-akpo-ọku ono dukota bẹ bu; unwu oke-eswi iri l'ẹbo; waa ebili iri l'ẹbo;

waa ụnwu ebili iri l'ẹbo, gbachaaru apha; yẹle ngweja-nri tso iya nụ; waa mkpi iri l'ẹbo, ee-gude gwee ngweja iphe-ẹji. ⁸⁸ Anụ, ee-gude gwee ngweja-ẹhu-guu bẹ tukuru dụ oke-eswi ụkporo l'eno; waa ebili ụkporo ẹto; mę mkpi ụkporo ẹto; waa ụnwu ebili ụkporo ẹto, gbachaaru apha. Noo iphe, a nuru g'e gude woru ọrun-gweja ono ye Chileke l'ẹka; mbụ teke ono, a wuru iya manụ ono.

⁸⁹ O be teke Mosisu bahuru gę yẹle Chipfu bogba l'ime ụlo-ẹkwa-ndzukọ ono; ọ numa olu-opfu, a nọ l'eli opfu okpoko ono; ẹka aapfufe ụgwo iphe-ẹji ono epfu, bụ iya bụ ẹka ono, e doberu ekemu Chipfu ono. Opfu ono bẹ a nọ lẹ mgbaka chierobu labọ phọ epfu eyeru Mosisu.

8

Edobe orọku

¹ Chipfu bya asụ Mosisu: ² “Pfuaru Erọnu sụ iya l'ọ -bya adọbe orọku; g'ọ dọbe orọku ẹsaa ono k'ọphu ìphóró iya a-nga atatiphu iphe ono, a tukoberu iya ono.” ³ Erọnu mee ya ẹgube ono, a sụru g'o mee ya ono; mbụ dọbe orọku ono; k'ọphu ìphóró iya ngakotaru atatiphu iphe ono, a tų-koberu iya ono, bụ iya bụ gę Chipfu karụ Mosisu g'e mee ya. ⁴ Waa g'e gude mee iphe ono, aatukobeje orọku ono baa: Ọo mkpọla-ododo, e tsusaru etsusa bẹ e gude mekọta iya shita l'ike iya jeye lẹ nchị iya. Iphe ono, aatukobeje orọku ono bẹ e meerupho ẹgube Chipfu goshiru iya Mosisu.

Edobe ndu Lívayi iche

5 Chipfu byakwa asu Mósisu: 6 “Hóta ndu Lívayi l'echilabọ ndu Ízurelu; mee phẹ g'ẹphe dẹbe ree. 7 Waa g'ii-shi mee phẹ g'ẹphe dẹbe ree baa: Wota mini nturwu phee phẹ l'ẹhu; ẹphe akpushikota iphe, bu ẹji, du phẹ l'ẹhu; bya asashikota uwe phẹ shi nno sachaa onwophe ree. 8 Ẹphe ewota nwa oke-eswi; yẹle ngweja-nri, ayiru iya nu, bu iya bu ukpokutu ereshi, a gwọru lẹ manu. L'i wota nwa oke-eswi ozo, ee-gude gwee ngweja-iphe-ẹji. 9 L'i duru ndu Lívayi obu je l'iphu ulo-ẹkwa-ndzuko; kukọbe iphe, bu ndu Ízurelu l'ophu g'ẹphe dzukota l'ẹka ono. 10 L'i duru ndu Lívayi ono bya l'atatiphu Chipfu. Ndu Ízurelu ebyibe phẹ ẹka l'ishi. 11 O buru Eronu e-woru ndu Lívayi ono ye Chipfu l'ẹka; ẹphe aburu ngweja-amama, shi l'ẹka ndu Ízurelu; k'ophu ẹphe a-nodu ejeru Chipfu ozi. 12 Oo ya bu; ndu Lívayi ono abya ebyibegbaa oke-eswi ono ẹka l'ishi. L'i gude nanu gwee ngweja-iphe-ẹji; gude nanu gwee ngweja-akpo-oku nu Chipfu; shi nno pfa ugwo iphe-ẹji ndu Lívayi.

13 “L'i mee; ndu Lívayi ono abya atuko pfuru l'iphu Eronu yẹle unwu iya. L'i woru phẹ ye l'ẹka Chipfu g'ẹphe aburu iya ngweja-amama. 14 Noo g'ii-shi dobe ndu Lívayi iche l'ẹka ndu Ízurelu ophuna no bu ono; mee ndu Lívayi ono g'ẹphe buru nkemu. 15 I -sachaepo ndu Lívayi ono; bya eworu phẹ dobe g'ẹphe du gẹ ngweja-amama; ẹphe ejeahaa ozi l'ulo-ẹkwa-ndzuko. 16 Oo ẹphebedua g'ẹphe hakota be e shi lẹ ndu Ízurelu hota ye mu l'ẹka. Mu nata phẹ; mee phẹ; ẹphe buru nkemu; nochia ẹnya

ndu bu ọkpara l'alì Ízurèlu; mbu iphe, bukota unwoke mbu, vu ọzo waa ẹkpa-nwa l'alì Ízurèlu. ¹⁷ Iphe, bu ọkpara l'ophu l'alì Ízurèlu; nemadzu-o; me anu be bukota nkemu. Le teke ono, mu gbushikotaru iphe, bu ọkpara l'alì Ijiputu be mu doberu phe iche g'ephe buru nkemu. ¹⁸ Nta-a be mu wowaru ndu Lívayi mee; ephe nochia enya ndu bu ọkpara l'alì Ízurèlu l'ophu. ¹⁹ Mbu le mu shiwaa l'echilabo ndu Ízurèlu l'ophu hota ndu Lívayi woru ye Eronu yele unwu iya l'eka; g'ephe jejeru ndu Ízurèlu ozi l'ulo-ekwa-ndzuko; ephe apfuje ugwo iphe-eji unwu Ízurèlu; k'ophu mgbu-onwu ete egbudu phe m'ephe jekube ulo Chipfu ono ntse."

²⁰ Mosisu; waa Eronu; me iphe, bu ndu Ízurèlu l'ophu bya emeeru ndu Lívayi egube ono, Chipfu turu iya Mosisu l'ekemu su g'e mee ndu Lívayi. O buru ge ndu Ízurèlu meru phe iya bu ono. ²¹ Ndu Lívayi be safuru onwophe nturuwu; bya asaa uwe phe asasa. Oo ya bu; Eronu woru phe nu Chipfu g'ephe du ge ngweja amama; bya apfu ugwo iphe-eji phe shi nno safu phe nturuwu. ²² E mechaa; ndu Lívayi nodu Eronu yele unwu iya l'eka wata eje ozi l'ulo-ekwa-ndzuko. O buru ge Chipfu gude tularu iya Mosisu l'ekemu bu g'ephe meru ndu Lívayi ono.

²³ Chipfu bya asu Mosisu: ²⁴ "Iphe-a be bu ndu Lívayi be o duru: Unwoke nowaru a -gbẹ l'ukporo apha l'apha ise kwaseru be a-wataje eje ozi l'ulo-ekwa-ndzuko. ²⁵ Ephe -nowa ukporo apha labo l'apha iri; ephe ahaa eje ozi l'ulo-

ẹkwa-ndzuko ono; ẹphe te ejebaedu iya. ²⁶ Ọle ọ -buru l'ọ dụ phẹ g'ẹphe yejeru unwunna phẹ ẹka l'ozi ọlo-ẹkwa-ndzuko ono; g'ẹphe yekpọoro ẹka. Obenu l'ẹphebedua l'onwophe bẹ l'e-jebuhu ozi. Noo g'ii-shi nụ ndu Lívayi ozi, ẹphe a-nọduje eje bụ ono."

9

Ọbo Ojeghata

¹ L'onwa mbụ l'apha, kwe ndu Ízurelu apha labọ, ẹphe shi l'alì Ijiputu lufuta bẹ Chipfu pfuru yeru Mósísu l'echiegu Sayinayi sụ iya: ² "Gẹ ndu Ízurelu bọkwaa ọbo Ojeghata teke a bọje iya. ³ Onwa-a -dụepho l'abalì iri l'eno; unu bọo ọbo Ojeghata ono teke a bọje iya. Teke unu a-wata iya abọbo bẹ bụ mẹ ẹnyanwu ribajeepho. Unu bọo iphe ono g'ekemu iya gude dụ waa gẹ nsọ iya gude dụ." ⁴ Ọo ya bụ; Mósísu bya epfuaru ndu Ízurelu g'ẹphe bọo ọbo Ojeghata ono. ⁵ Ẹphe woru ọbo Ojeghata ono bọo l'echiegu Sayinayi g'onwa mbụ ono dụ l'abalì iri l'eno; g'ẹnyanwu abyawaa ariba. Ẹphe tuko iphemiphe mekọta gẹ Chipfu sụru Mósísu g'emeje iya.

⁶ Ọle o nwekwanuru ndu ọphu ayidu lẹ ndu bọru ọbo Ojeghata ono mbọku ono. Ishi iya bụ l'ẹphe tūruru onwophe kele ẹphe denyiru onye nwuhuru anwuhu ẹka. Ndu ono byapfuta Mósísu yẹle Erọnu lẹ mbọku ono; ⁷ bya asụ Mósísu: "Nta-a bẹ nturwu dụ anyi l'ẹhu kele anyi denyiru onye nwuhuru anwuhu ẹka. Ọle-a; ?denu g'o gude ọphu e te ekwedu g'anyi tsoru

ndu Ízureḷu ọphuna nḡ Chipfu ngweja teke a nḡje iya?”

⁸ Mósísu sḡ pḡe: “Unu ngabe; gḡ mu maru iphe, Chipfu l'e-pfu l'opfu ẹhu unu.”

⁹ Tọbudu iya bḡ; Chipfu sḡ Mósísu: ¹⁰ “Pfuaru ndu Ízureḷu sḡ pḡe: O -nweru onye shi l'ime unu; ọzoo l'onye ọbu bḡ oshilọkpa unu, denyiru ẹka l'odzu; shi nno tḡrwua onwiya; ọzoo l'onye ọbu jeru ẹka dḡ ẹnya ẹnya; g'onye ono bọlekwa-a ọbo Ojeghata kḡ Chipfu ono. ¹¹ Teke ẹphe a-bọ iya bḡ bḡ l'abalı iri l'eno l'onwa k'ẹbo iya; mḡ ẹnyanwu ribajeepḡo. Iphe, ẹphe e-gude bọo ya bḡ: buredi, ekoduru ekoko; waa mkpḡekwo, atsoḡbaa ilu. ¹² G'ọ tọ dḡkwa iphe ono ọphu ẹphe a-ha g'ọ bọo nchi; ọphu ọ dḡkwa ọkpu iya, ẹphe a-nyakwo anyakwo. Ọo g'ekemu ọbo Ojeghata ono dḡkota bḡ g'ẹphe e-gude bọo ya. ¹³ Ọle onye ntḡrwu adḡdu l'ẹhu; ọphu o jeduru iphe; ọphu onye ọbu abọduru ọbo Ojeghata ono bḡ ee-bufu l'echilabọ ndibe pḡe; noo keḡe ọ tọ nḡduru Chipfu ngweja iya teke a tḡru ọnu iya. Onye ono bḡ iphe-ẹji, o meru a-tukoru l'ishi.

¹⁴ “Onye lwarḡ alwalwa; unu l'iya buru; ọ -dḡ iya g'ọ tḡoru unu bọo ọbo Ojeghata kḡ Chipfu ono; g'onye ọbu mekwaa ya g'ekemu iya; waa nsọ iya gude dḡ. Ọo nsọ lanḡ bḡ dḡru onye a nwḡru anwḡnwu l'alı-a waa onye lwarḡ alwalwa.”

*Urwukpu asọ-kputa
ulo-ekwa Chileke
(Awu 40:34-38)*

¹⁵ Mbọku ono, a kpọberu ọlo-ẹkwa Chipfu, bu iya bu ọlo-ẹkwa, ẹka eedobeje ẹkwo ekemu Chipfu ono; be urwukpu so-kputeru iya. L'uzenyashi be urwukpu ono duẹpho g'ọku l'eli ọlo-ẹkwa ono; duẹpho nno jasụ l'utsu. ¹⁶ Ọ buerupho g'ọ du kwaseru bu ono. L'eswe be urwukpu ono aso-kputaje ọlo-ẹkwa Chipfu ono; o -be l'enyashi; l'o nwua ke phoo g'ọku. ¹⁷ Ọ nođu abujeru teke urwukpu ono shi l'eli ọlo-ẹkwa ono palihu imeli imeli; ndu Ízurelu awụlihu tugbua ije phe. Eka ephe jeberu; urwukpu ono keshiru; ephe akpọbe ọlo-ẹkwa phe l'eka ono; nohia. ¹⁸ Ọ nođu abujeru Chipfu -su ndu Ízurelu g'ephe wụlihu tugbua; ephe awufu tugbua. Teke ọ bu l'ọ suru phe g'ephe nođu; ephe akpọbe ọlo-ẹkwa phe nohia. Ọ buru g'urwukpu ono no-beru l'eli ọlo-ẹkwa Chipfu ono bu g'ephe anọ-bejeru l'eka ephe kpọberu ọlo-ẹkwa phe ono. ¹⁹ Teke urwukpu ono nođu ọdu l'eli ọlo-ẹkwa Chileke ono; ndu Ízurelu emeepho ge Chipfu pfuru phe; noyabe; ephe ta atugbudu. ²⁰ Teke ọ bu l'urwukpu ono nođu l'eli ọlo-ẹkwa Chipfu ono; nođu ya nwujiku olemole; be bu Chipfu -su g'ephe nođu; ephe akpọbe ọlo-ẹkwa phe nohia. Teke ọ suru phe g'ephe wụlihu tugbua; ephe awufu tugbua. ²¹ Teke ọ bu l'urwukpu ono nođu shita l'uzenyashi jasụ l'utsu; o -rwua l'utsu ọ palihu imeli imeli; ephe awufu tugbua. Obetakpọo ọ buru l'eswe be urwukpu ono palihuru imeli; ọzoo l'enyashi; be buẹpho teke ọ palihuru be ndu Ízurelu awufuje tugbua. ²² Obetakpọo urwukpu ono nođu l'eli

ulo-ekwa Chipfu ono nọo ya abali labo; ozoo nọo ya onwa ophu; ozoo l'oo apha ophu; be ndu Ízurelu a-nọdujeepho l'eka ephe kpoberu ulo-ekwa phe g'ephe nọ iya; ophu ephe ta abyadu atugbu atugbu. Obenu le teke a nonyaaru urwukpu ono palihu imeli; ephe awufu tugbua. ²³ O nọdu abujeru; Chipfu -su phe g'ephe nọdu; ephe akpobe ulo-ekwa phe noshia. Teke o suru phe g'ephe tugbua; ephe awufu tugbua. Iphemiphe, Chipfu pfuru phe be ephe mekotaru egube o turu iya Mosisu l'ekemu.

10

Opu labo, e meru le mkpola-ochaa

¹ Chipfu su Mosisu: ² “Gude mkpola-ochaa, e tsusaru etsusa meta opu labo; k'ophu ii-gudeje iya eku ndu Ízurelu g'ephe dzukobe; gudejekwa iya pho karu phe teke ephe a-phutaje ulo-ekwa phe tugbua. ³ Teke a tukoru opu labo ono gbua be bu iphe, oopfu bu g'iphe, bu ndu Ízurelu l'ophu dzukobe l'iphu ngu l'onu ulo-ekwa-ndzukọ. ⁴ O -buru l'oo opu lanu kpoloko be e gburu; iphe, oopfu bu g'iphe, bu ndu-ishi dzukobekota l'atatiphu ngu; mbu ndu bugbaa ishi ipfu ipfu ndu Ízurelu. ⁵ Teke opu ono daru ugbo lanu; iphe, oopfu bu g'iphe, bu ipfu, kpoberu ulo-ekwa phe l'uzo enyanwu-awawa wulihu tugbua. ⁶ Teke i gburu opu ono k'ugbo ebo; ge ndu ophu kpoberu ulo-ekwa nkephe l'uzo ndohali wulihu tugbua. Ee-gbuje opu ono g'ọ gbaje ama teke ephe a-wufu tugbua. ⁷ Unu -byaepho eku edzudzu-oha g'ephe dzukobe; unu

egbua opu ono; ọle ọọ g'ọ tọ dashi g'ọphu e gude agba ama. ⁸ Ọọ unwu Erọnu, bu iya bu ndu-uke Chileke be e-gbuje opu ono. Ọọ-buru omelali, a-duru unu jasuru asuru; e -shi l'ogbo sweru ogbo. ⁹ Teke ọ bu l'unu eje etso ndu ohogu unu ogu l'ali unu; mbu ndu akpa unu ehu; unu gbua opu ono g'ọ dashia ọda ike; k'ọphu Chipfu, bu Chileke unu a-nyata unu; bya adzota unu l'eka ndu ohogu unu ono. ¹⁰ Nokwapho g'unu e-gbuje opu me ehu nodu atso unu; me teke unu abo obo-iphe, unu abojegbaa; me teke unu abo iphe k'onwa ophuu* unu; unu -gwechaepho ngweja-akpo-oku; me ngweja-ehu-guu ono, unu egweje ono; unu egburu opu ye iya; k'ọphu Chileke e-gude iya nyata unu. Ọọ mbedua bu Chipfu, bu Chileke unu."

Ndu Ízurelu awufu l'echiegu Sayinayi

¹¹ O be le g'onwa k'ebo du l'ukporo abali; l'apha k'ebo iya; urwukpu ono shi l'eli ulo-ekwa Chipfu ono, bu eka ekwo ekemu aduje ono palia imeli imeli. ¹² Tobudu iya bu; ndu Ízurelu bya eshi l'echiegu Sayinayi ono; ọ buru phe atugbu. Epe jee jasú l'echiegu Paranu, bu eka urwukpu ono jeburu keshiru.

¹³ Onoya bu ke mbu, epe tugburu ije phe ono; egube ono, Chipfu turu iya Mosisu l'ekemu. ¹⁴ Ọ buru ipfu Jiuda be vutaru uzo ije ono. Epe dzebe l'okpa l'okpa; paru ekwa-ohubama ipfu phe wuru tugbua. Ọ buru Nashonu nwa

* **10:10** 10:10 Obo-iphe-a be ndu Ízurelu aboje ujiku ophu teke onwa ophuu furu. Huma g'ephe emeje iya le Ógú 28:18.

Amínadabu bẹ̀ bụ̀ onye-ishi ipfu Jiuda ono.
¹⁵ Netanelu nwa Zuwa buru onye-ishi ipfu Isaka;
¹⁶ Eliyabu nwa Helonu buru onye-ishi ipfu Zebulun.

¹⁷ Oo ya bụ̀; a phọ-tsuta ụ̀lo-ẹ̀kwa Chipfu ono; oshilokpa Geshonu; mẹ̀ oshilokpa Merari pata iya; o buru phẹ̀ atugbu.

¹⁸ Ipfu ozo, l'etsota l'atugbu ono bẹ̀ bụ̀ ndu ipfu ke Rúbenu. Ephe dzebekwapho l'okpa l'okpa; gude ẹ̀kwa-ohubama ipfu phẹ̀ wuru tugbua. O buru Elizuru nwa Shediyo bụ̀ onye-ishi ipfu Rúbenu ono. ¹⁹ Shelumelu nwa Zurishadayi buru onye-ishi ndu ipfu Simiyonu; ²⁰ Eliyasafu nwa Diyuwelu buru onye-ishi ipfu Gadu.

²¹ Tobudu iya bụ̀; ndu Kohatu vuta iphe, du nsọ̀ ono gude tugbushia. Ephe jerwushia; a kpobewa nu ụ̀lo-ẹ̀kwa Chipfu.

²² Ipfu ozo, l'etsota phẹ̀ nu buru ndu Ifuremu. Ipfu ozo, l'etsota l'atugbu ono bẹ̀ bụ̀ ndu ipfu ke Rúbenu. Ephe dzebekwapho l'okpa l'okpa; gude ẹ̀kwa-ohubama ipfu phẹ̀ wuru tugbua. O buru Elishama nwa Amihudu bụ̀ onye-ishi ndu ipfu Ifuremu ono. ²³ Gamalelu nwa Pedazo buru onye-ishi ndu ipfu Manase; ²⁴ Abidanu nwa Gidiyoni buru onye-ishi ndu ipfu Benjiaminu.

²⁵ Ipfu ozo, l'etsota nu; bya aburu ipfu ophu ekpejeru azu l'ije ono buru ndu Danu. Ipfu ozo, l'etsota l'atugbu ono bẹ̀ bụ̀ ndu ipfu ke Rúbenu. Ephebedua dzebekwapho l'okpa l'okpa; gude ẹ̀kwa-ohubama ipfu phẹ̀ wuru tugbua. O buru Ahiyeza nwa Amishadayi bụ̀ onye-ishi ipfu Danu ono. ²⁶ Pagelu nwa Okuranu buru onye-ishi ipfu

Asha. ²⁷ Ahira nwa Enanu b́uru onye-ishi ipfu Nafutali. ²⁸ Noo gę ndu Ízurelu edzebeje l'okpa l'okpa wufu m'ęphe gbęshi ije pęę bu ono.

²⁹ Ḿosisu bya epfuaru Hobabu nwa Ruwelu, bu onye Midiyanu; bya aburu ogo iya su iya: "Nta-a bę anyi atugbuwa ala ali ęka ono, Chipfu pfuru anyi l'oo-nu anyi ono. Tsonuru anyi g'anyi je. Anyi e-mekwaru ngu ree; kele Chipfu kweshikwaru ndu Ízurelu ukwe-iphe, dugbaa ree."

³⁰ Hobabu su iya waawaa; le ya te etsoduru pęę; le ya alaphuwa azu l'ali iya; lapfu ndu ephe l'iya bu.

³¹ Obenu le Ḿosisu suru iya: "Jiko ta ahashinu anyi. Eshinu obu ngu maru ęka anyi a-kpobeje ulo-ękwa anyi l'echięgu-a; nodunu gi b́uru ęnya, anyi gude aphu uzo. ³² I -tsoru anyi bę anyi le ngu a-gbaru mgba l'iphe, bukpuo iphe-oma, Chipfu e-mekotaru anyi."

Okpoko Chileke waa urwukpu

³³ Noo ya; ephe shi l'ubvu Chipfu ono tugbuwa; jee ije abali eto. Okpoko ogbandzu Chipfu vuta uzo l'ime abali eto ono; go chotaru pęę ęka ephe a-nodu tuta unme. ³⁴ O nodu abujeru; o -beephó l'eswe; urwukpu, shi l'ęka Chipfu no abya atukoru pęę l'ishi; mbu teke ono, ephe shi l'ęka ephe kpoberu ulo-ękwa pęę tugbuwa ono.

³⁵ Teke e vutaerupho okpoko ono tugbuwa; Ḿosisu asu: "Zilihunu gube Chipfu. Gę ndu ohogu ngu gbakashihukwa nanu nanu. Gę ndu ono, i du ashı shikwa ngu l'iphu gbalachaa."

³⁶ Teke a pazetaru okpoko ono; Ḿosisu asu:

“Lwaphuta azụ gùbe Chipfu; lwapfuta ụnu-
kuru-ụnu ndu Ízurelu-a.”

11

Ọku, shi l'ẹka Chipfu

¹ Tọbudu iya bụ; ndu Ízurelu wata akụ photophoto epfu l'ẹphe eje iphe-ẹhuka. Photophoto ono, ẹphe akụ ono bya erwua Chipfu lẹ nchị; ẹhu ghuahaa ya ẹghu. Ọku shinu l'ẹka Chipfu bya ekegbushikọta ndu Ízurelu ndu ọpflu kpọberu ụlo-ẹkwa pẹ l'ụzo ishi ishi. ² Ndu Ízurelu bya araku Mosisu; o pfuru nụ Chipfu; ọku ono nyishihu. ³ Ọo ya bụ; e kuahaa ẹpha ẹka ono Tabera, bụ iya bụ “ọku-ekeke”; kele ọku, shi l'ẹka Chipfu bya ekegbushia pẹ.

Nri, bụ Mana

⁴ Ikpoto ndu ono, ẹphe lẹ ndu Ízurelu gwarụ ọgwaramogwa, bụ ndu tsoru pẹ nụ g'ẹphe gbeshiru ije ono; wata eze nzeri nri. Ndu Ízurelu watanụ ara ẹkwa ọzo sụ: “?Bụ onye a-nụkpo anyi anụ g'anyi taa? ⁵ Anyi nyatarụ teke anyi shi anọduje ata anụ ẹma l'alị Ijiputu; anyi ta apfudu ụgwo; teke ono bẹ anyi shi anọduje eri ata kukumba; bya eri ashị; eri liku; mẹ alibasa; waa galiku. ⁶ Ọle nta-a bẹ ọ tọ duedu iphe, agụkwadu anyi ẹgu; ọpflu ọ dudu iphe, anyi ahụmaje ria; gbahaa mana-a!”

⁷ Nri ono, bụ mana bẹ ụgbugba iya dū g'akpuru koriyanda. I -lee ya ẹnya; l'ọ nyakụ anyakụ; eshi mkpọ g'etse bedelomu. ⁸ Ndu

Ízurelu nọdu ejeje ekpokọo ya; gwee ya egwegwe; ọzoo tsua ya etsutsu l'ikwe. Ẹphe ahajeru shia ya eshishi; haru ghee ya egheghe. Ọonoduje atso g'iphe, e gude manu olivu ghee. ⁹ Teke mana ono adajeru phe bu teke iji daahaerupho l'eka epe kpoberu ulo-ekwa phe l'enyashi.

Mosisu edoru Chipfu edo

¹⁰ Mosisu bya anuma ge ndu Ízurelu wushigbaaru l'onu ulo-ekwa phe aragbaa ekwa; onyenonu tuko nodugbaa l'onulo l'onulo akwa ntumatu; ehu nọdu eghe Chipfu eghe eghushikpoo ya ya ike. O tsuaha Mosisu l'ehu. ¹¹ Noo ya; Mosisu jahaa Chipfu su iya: “?Denu g'o gude o buru mube onye-ozu ngu be i meru g'egube iphe-ehuka owa-a dapfuta? ?Bu le mu ta adudu ngu l'obu meru g'o gude i paru ivu ehu ndu-a l'ophu bo mu? ¹² ?Bu mbedua be yeru ime ndu-a g'ephe ha; too mu nwushiru phe; meru g'o gude i su ge mu heru phe l'utapfu ge nna he nwa iya, angukwadu era. Ge mu heru phe nno jashe l'ali ono, i riburu nna phe oche nte l'ii-nu phe ono. ¹³ ?Bu awe be mu a-huma anu, mu anugbabe ndu-a; g'ephe echiru mu mkpu owa-a, epe echi-a; su g'a nu phe anu g'ephe taa! ¹⁴ Mu taa dukwa ike ehekota ndu-a nwekinyi mu; ivu ehu phe anyi-gbukwa mu anyi-gbu. ¹⁵ O -buru l'oo egube-a be ii-mee mu iya; gbuchikwa mu egbugbu nta; m'o -buru le mu du ngu-a l'obu; ge mu ta anodukwanu ndzu gude enya huma ejo onodu mu.”

16 Chipfu bya eyeeru Mósísisu ọnu sụ iya: “Chịta ndu bụ ọgerenya Ízurelu ụmadzu ụkporo ẹto l'iri g'ẹphe byapfuta mu; mbụ ndu ị hụberu ama l'ẹphe bupho ndu bụ ọgerenya; bụru ndu-ishi phẹ. Chịta phẹ gẹ gu l'ẹphe tuko bya apfuru l'ulo-ẹkwa-ndzuko. 17 Mu e-nyizeta byapfuta ngu l'ẹka ono; mu lẹ ngu epfugba opfu; mu aharu unme, dụ ngu l'ẹhu habọta woru ye ndu ono l'ẹhu nkephe; k'ọphu ẹphe e-yeta ẹka vubude ngu ivu ono; g'i ti vuhẹ iya nwẹkinyi ngu. 18 Pfuaru ndu Ízurelu g'ẹphe dobe onwophẹ iche kwabẹru echele; l'o -rwua echele bẹ ẹphe a-ta anụ; kele mụbe Chipfu nūmawaru ẹkwa ono, ẹphe ara sụ: ‘?Bụ onye a-nụ anyi anụ g'anyi taa? Teke anyi shi nọdu lẹ Ijiputu bẹ shikwa karu anyi lẹ ree.’ Nta-a bẹ Chipfu a-nụ unu anụ g'unu taa. 19 Anụ ono bẹ unu ta atagbudu l'ujiku lanụ; ọphu unu atagbudu iya l'ujiku labọ; ọzoo l'ime ujiku ise; ọzoo l'ime ujiku iri; ọzoo l'ime ujiku ụkporo. 20 Unu a-ta anụ ono ọnwa ophu; taa ya jasụ l'o bushihu unu l'imi; mbụ jasụ ọo-tushihu unu ayi; noo kele unu jikaru Chipfu, bụ onye swiru unu; mbụ rarụ ẹkwa kpua ya sụ: ‘?Bụ g'ọnu meru g'ọ gude anyi shi l'alị Ijiputu futa?’ ”

21 Tọbudu iya bụ; Mósísisu sụ Chipfu: “Ị hụmanuaru-a l'ọo ụkporo unu nemadzu mgbo ụkporo ẹto; l'ụkporo unu nemadzu iri l'ise bẹ mu l'ẹphe gude ọkpa eje ẹgube-a. Ọ bụru phẹ bẹ ị sụru l'ii-nụ anụ, ẹphe a-ta ọnwa ophu. 22 E -gbushigbua aturu mẹ eswi; ?bụ g'ọ dzuru phẹ? Mbụ-a; ?bụ g'ọ dzuru phẹ obetakpọo e gbushikotaru phẹ ẹma, nọkota l'eze-enyimu?”

²³ Chipfu sù Mósísu: “?Bù l'èka mu ta asùdu iya ememe tọ? Nta-a bẹ ìi-hùma; iphe, mu sùru l'oo-meru ngu; ?oo-me tọ too medu?”

Ndu bù ọgerenya Ízurelu epfuchiru Chileke

²⁴ Noo ya; Mósísu bya alufu je akaru ndu Ízurelu iphe, Chipfu pfuru. Ọ chíta ndu bù ọgerenya ụkporo ẹto l'iri ono; ẹphe bya apfuphee ụlo-ẹkwa Chileke mgburugburu. ²⁵ Ọo ya bù; Chipfu gude urwukpu nyizeta bya epfuru yeru Mósísu; haru unme, dù Mósísu l'ẹhu habọta woru ye ndu bù ọgerenya ụkporo ẹto l'iri ono l'ẹhu. Unme ono byaẹ phẹ phọ l'ẹhu; ẹphe wata epfuchiru Chileke teke ono; obenu l'ẹphe te epfuchibaeduru iya ọzobaa.

²⁶ Ọle o nweru umadzu labọ ọzo, nọpyaberu l'ụlo-ẹkwa phẹ. Ẹpha onye lanu bù Ẹludadu; ẹpha onye ọphuu buru Medadu. Ẹphe yi lẹ ndu bù ọgerenya ono, e deru ẹpha phẹ ono; ọle ẹphe te ejeduru l'ụlo-ẹkwa Chileke ono. Obenu lẹ Unme Chileke byalẹru-a bya eji ẹphebedua ẹhu; ẹphe nọdu l'ụlo-ẹkwa phẹ ono; pfuchiahaaru Chileke. ²⁷ Nwata nwokoro lanu gbagbua je asu Mósísu: “Ẹludadu yele Medadu nọkwa l'èka a kọberu ụlo-ẹkwa epfuchiru Chileke.”

²⁸ Jioshuwa nwa Nunu, bù onye shi teke ọ bù nwata jetaru Mósísu ozi tufuekwapho ọnu sù: “Nnajiuphu mu, bù Mósísu; pfunuru phẹ g'ẹphe dobe ọnu doo.”

²⁹ Mósísu sù iya: “?Bù ọdzori bẹ ìigbaru mu ẹgube ono tọ? Ọ gege adu mu ree; ọ -bù l'ọo gẹ ndu kẹ Chipfu g'ẹphe ha gbẹ bukotaru ndu mpfuchiru; mbu gẹ Chipfu gbẹ yekọta phẹ

Unme nkiya l'èhu.” ³⁰ E mechaa; Mósísu mę ndu bu ọgerenya Ízurelu ono laphu azu l'eka ephe kpoberu ọlo-ekwa phe.

Chipfu woru òkwà mee anụ atata

³¹ Noo ya; pherephere bya eshi l'eka Chipfu nọ ziahaa; o shi l'eze-enyimu chikashia òkwà; ephe bya adabyigbaaru lę mgboru eka ephe kpoberu ọlo-ekwa phe ono. Ephe tuko eka ono g'ọ ha dzuru rwua iphe, ha g'eka nemadzu a-du ike jee l'okpa ujiku ophu. G'ephe epheberu l'eli be bu iphe, rwuru ntụ-okpa eto mę a -gbe l'omali. ³² Mboku ono l'ophu; mę enyashi ono l'ophu; mekwapho nchitabohu iya be ephe tsoru je anwuko òkwà ono. Onye nwutanukaru nwan-shii be nwu-jiru gbamugbamu-nkweka ukporo ise. Ephe woru iya kpasaaru onwophe; o tuko eka ono, ephe kpoberu ọlo-ekwa phe ono dzuru mgburugburu. ³³ Ephe kpukwaduru-a anụ òkwà ono l'onu ata; mbu l'ephe teke atagbudu iya; Chipfu watawaa phe atu-koshi oke ehu-eghu iya. O loru ejo mgbu-onwu tu phe. ³⁴ Oo ya bu; e kuahaa eka ono Kiburotu-Hatava, bu iya bu “ochieja ndu ekpiri”; kele oo l'eka ono be e liru iphe, bu ndu ono, meru ekpiri ono.

³⁵ Ephe shi lę Kiburotu-Hatava l'eka ono wufu; je adoru lę Hazerotu.

12

Miriyamu yele Eronu etso Mósísu opfu

¹ Tobudu iya bu; Miriyamu yele Eronu wata epfubyishi Mósísu lę ke nwanyi Kushi, o luru. Noo kele Mósísu lutakwanuru onye Kushi.

² Èphe sù: “?Bù Mòsisu kpoloko bẹ Chipfu eshije l'ònu iya pfua opfu? ?To shijedu l'ònu k'anyìbedua pfukwaphọ opfu?” Chipfu nùmanu iphe ono, èphe pfuru ono. ³ Sù-a; nwoke ono, bù Mòsisu bẹ b̀nukaru onye eme odo. Oo ya kachakpọo eme odo l'iphe, bù ndu mgboko l'ophu.

⁴ G'e jia epfu; Chipfu pfiaru Mòsisu; waa Erònu; mẹ Miriyamu sù phẹ: “Unu n'eto tũko futa byakọta l'ulo-ekwa-ndzukọ.” Èphe n'eto ono bya afuta tugbua jeshia. ⁵ Oo ya bù; Chipfu nõdu l'urwukpu, kpuru oronmono nyizeta bya apfuru l'ònu ulo-ekwa-ndzukọ ono; bya ekua Erònu yele Miriyamu oku; èphe kpìritaru. ⁶ Chipfu sù phẹ: “Unu ngabẹ nchì nùma iphe, mu epfuru unu: Qobujeru; onye mpfuchiru Chipfu -nõdu l'echilabọ unu; m̀be Chipfu egoshi iya onwomu l'ophulenyà; bya epfuru yeru iya lẹ nrwọ. ⁷ Obenu l'ọ tọ dudu nno l'èhu onye-ozì mu, bù Mòsisu. Yẹbedua bẹ mu yekọtaru ndibe mu l'ophu l'eka. ⁸ Teme mu l'iya nõdu abogbaje ̀ja l'iphu l'iphu; mb̀ l'anyi l'epfujẹ opfu doru ẹnà yeru onwanyì; ọ tọ b̀du ẹtu-opfu. Oohumajẹ gẹ m̀be Chipfu gbaru ̀gbugba. Oo ya bù; ?b̀ g̀nu meru g'ọ gude ophu unu atsudu ebvu; unu nõdu epfutọshi onye-ozì mu ono, bù Mòsisu?”

⁹ Chipfu tukoshi phẹ ẹhu-eghu iya; bya aburu iya atugbu. ¹⁰ Urwukpu ono shiẹpho l'eli ulo-ekwa ono palia imeli imeli; a bya l'amaru; ekpenta nmawaa Miriyamu swokoswoko. Ẹhu chahụe ya phọ kẹ roboo. Erònu bya elee Miriyamu ẹnà bya ahuma g'ekpenta tukoru

iya ẹhu sweta. ¹¹ Erọnu sù Mósísu: “Oowaa nnajìuphu mu; ba nùshinu anyi aphi l'ọo l'anyi gude eme eswe mee iphe-ẹjì. ¹² Te ekweshinu gẹ nwanyi-a chahu roboo gẹ nwata, byaru l'afuta l'ẹpho ne iya; ọ nwuhuwaa anwuhu; ibe ẹhu iya rekashihuwa erekashi.”

¹³ Tọbudu iya bụ; Mósísu bya araku Chipfu sù: “Jiko gube Chileke; menaa ya g'o wekorohu!”

¹⁴ Chipfu sù Mósísu: “Ọ -bù lẹ nna nwanyi-a vuru ọnu-mini kpua ya l'iphu; ?iphere iya tege adudu abali ẹsaa ọo? Nwuru iya ye l'azu ẹka ono, a kporu ọlo-ẹkwa gu-buru iya ye g'ọ nọo ujiku ẹsaa; ọ -nọ-chaepho ujiku ẹsaa ono; l'e duphuta iya azu.” ¹⁵ Tọbudu iya bụ; a bya enwufu Miriyamu gu-buru iya ye l'azu ẹka ono, ẹphe kporu ọlo-ẹkwa phe ono; ọ nọo ujiku ẹsaa. Ophu ndu Ízurelu agbeshiduru ije jeye teke e duphutaru iya azu. ¹⁶ E mechaa; ẹphe shi lẹ Hazerotu l'ẹka ono lufu je akpobe ọlo-ẹkwa phe l'echiegu Paranu.

13

Anwu ngge l'ali Kėnanu (Dit 1:19-33)

¹ Chipfu sù Mósísu: ² “Yefu ndu e-je ali Kėnanu je anwua ya ngge; mbu ali ono, mu eme gẹ mu nu ndu Ízurelu ono. Shi l'ipfu l'ipfu, bu ipfu ndiche phe hotachaa onye lanu, e-je nu. Ndu ii-hota be bu unwoke, bugbaa ishi l'ipfu, nonu.” ³ Mósísu bya aho phe egube ono, Chipfu pfuru ono; bya ezia phe sù g'ẹphe shi l'echiegu Paranu tugbua

jeshia. Ndu ono, o ziru ozi ono bukotaerupho ndu-ishi ndu Ízurelu.

⁴ Owaa bẹ bu ẹpha phẹ:

Onye shi l'ipfu Rúbenu bu Shamuwa nwa Zaku;

⁵ onye shi l'ipfu Simiyonu buru Shafatu nwa Hõru;

⁶ onye shi l'ipfu Jiuda buru Kalẹbu nwa Jiefune;

⁷ onye shi l'ipfu Isaka buru Igalu nwa Jiósẹfu;

⁸ onye shi l'ipfu Ifuremu buru Hosiya nwa Nunu;

⁹ onye shi l'ipfu Benjaminu buru Paliti nwa Rafu;

¹⁰ onye shi l'ipfu Zebulun buru Gadiyẹlu nwa Sodi;

¹¹ onye shi l'ipfu Manáse, bu iya bu ipfu Jiósẹfu bẹ bu Gadi nwa Susi;

¹² onye shi l'ipfu Danu buru Amiyẹlu nwa Gemali;

¹³ onye shi l'ipfu Asha buru Seturu nwa Mayikelu;

¹⁴ onye shi l'ipfu Nafutali buru Nahubi nwa Vofusi;

¹⁵ onye shi l'ipfu Gadu buru Geyuwẹlu nwa Maki.

¹⁶ Noo ẹpha unwoke ono, Mósisu yeru g'ẹphe je anwua ngge l'alì Kénanu bu ono. Mósisu woru Hosiya nwa Nunu gube Jioshuwa.

¹⁷ Mósisu bya ezia phẹ g'ẹphe jeshia ngge l'alì Kénanu sụ phẹ: “Unu tsoru echiẹgu ndohali bahụ l'alì úbvú úbvú ẹka ono. ¹⁸ Unu je ahuma g'alì ono gbaru; mẹ gẹ ndu bu iya nụ dụ. Unu

maru ?ókpehu dù phe; tọ ?ẹphe rwùhuru arwùhu? ?Epe ha l'otu; tọ ?ẹphe habe ahabe?
¹⁹ Unu maru ?bù alì, dù ree; tọ alì, dù ẹjì? Unu maru mkpùkpù, ẹphe bugbaa: ?bù mkpùkpù, a ta kpù-pheduru igbulọ mgburugburu; tọ mkpùkpù, a kpùshiru ike? ²⁰ Unu amaru g'alì phe dù. Unu maru ?bù alì emehuje iphe, e meberu iya; tọ ẹjọ alì? Unu amaru ?oshi dù iya; tọ ?oshi ta adùdu iya? G'obu shihukwa unu ike. Unu egude akpùru oshi, shi l'alì ono lwa." Teke ono bẹ bù teke akpùru vayìnu mbù anọduje achashìgbaa.

²¹ Noo ya; ẹphe tųgbua jeshia je anwùkota alì ono ngge; shita l'echiẹgu Zinu je akpaa lẹ Rehobu; mẹ a -nọdu eje Hamatu. ²² Ẹphe tsoru echiegu ndohali ono jeye ẹphe rwua mkpùkpù Hẹburonu, bù ẹka Ahimanu; mẹ Sheshayi; mẹ Talumayi, bù ndu shi l'eri Anaku bu ebubu. (A kpùru mkpùkpù Hẹburonu; ọ nọo apha ẹsaa; tẹmanu a kpua mkpùkpù Zowanu ophu dù l'alì Ijiputu.) ²³ Ẹphe jerwuepho lẹ nsuda Ẹshukolu; ẹphe gbukwota ẹkali vayìnu lanù, akpùru wọpfuru awọpfuru. Umadzu labọ l'ime phe pyokafu iya l'oshi, dù ogologo parù; onye lanù parù iya l'ishi lanù; onye ophuu parù iya l'ishi lanù. Ẹphe wọkokwaapho akpùru itorokuma; mẹ akpùru oshi figu wolata. ²⁴ A gube ẹka ono nsuda Ẹshukolu, bù iya bù "wọpfulaa"; kele ọ l'ẹka ono bẹ ndu Ízurelu gbukwotaru ẹkali vayìnu, akpùru wọpfuru awọpfuru vulata.

²⁵ Ẹphe nọru ụkporo abalì ugbo labọ g'ẹphe jeru anwù ngge l'alì ono; tẹmanu ẹphe lwa.

²⁶ Ẹphe bya alwapfuta Mósíṣu mẹ Erọnu; waa ndu Ízureḷu l'ophu l'echiegu Paranu, dụ lẹ mkpụkpu Kadeshi. Ẹphe bya edooru Mósíṣu; mẹ Erọnu; waa ndu Ízureḷu l'ophu g'ẹphe jeru; bya egoshi pẹ akpuru oshi, shi l'alì ono. ²⁷ Waa iphe, ẹphe pfuru Mósíṣu baa: “Anyi jewaru je ahuma alì ono, ì sùru g'anyi je ahuma. Alì ono bu alì, mini ẹra-eswi yẹe manụ-ẹnwu asọ gborogboro. Waa akpuru oshi, shi l'alì ono baa. ²⁸ Oḷe ndu bu l'alì ono bẹ ọkpehu dụ; mkpụkpu, dụ iya nụ hagbaa shii; bya aburu mkpụkpu, e gude igbulọ kpụ-pee mgburugburu. Anyi humacharuro ndu shi l'eri Anaku l'ẹka ono. ²⁹ Ndu Amalẹku bẹ bu l'echiegu ndọhali. Ndu Hetu; mẹ ndu Jiebusu; mẹ ndu Amọru buru l'alì úbvú úbvú ẹka ono; ndu kẹ Kėnanu bua kẹbe ẹhu l'eze-ẹnyimu; bukwarupho l'aguga ẹnyimu Jíódanu.”

³⁰ Tọbudu iya bu; Kalẹbu bya emee ndu Ízureḷu daa jii l'iphu Mósíṣu; bya asụ pẹ: “Unu g'anyi je alwuta alì ono g'ọ buru nkanyi; noo kẹle anyi a-dụ ike lwuta iya.”

³¹ Obenu lẹ ndu ono, ẹphe lẹ Kalẹbu swi je ije ono bẹ sùru: “Anyi ta adukwa ike eje adatso ndu ono ọgu; noo kẹle ẹphe kakwa anyibedua ọkpehu.” ³² O buru ẹjo nzi bẹ ẹphe byaru ezia ndu Ízureḷu lẹ k'alì ono, ẹphe jeru anwua ngge ono sụ: “Alì ono, anyi jeru anwua ngge ono bẹ egbukwa ndu bu iya nụ mgbu-ọnwu. Teme ndu anyi humakotaru l'ẹka ono bukotaru ndu hagbaa kẹ phengara phengara. ³³ Anyi humaru ndu gbaru oke mkparawa l'ẹka

ono. (Oshilokpa Anaku ono bu l'ehu ndu ono, gbaru oke mkparawa ono be ephe shi futu.) Anyi dehucharu onwanyi edehu l'enya dugbaa g'unwu ogu; o buru g'anyi du ephebedua bu ono."

14

Jioshuwa yele Kalebu be epfu l'ali Kénanu du ree

¹ Tɔbudu iya bu; ndu Ízurelu l'ophu rakota ekwa l'enyashi ono rashia ya ike. ² Ephe tuko g'ephe ha guru aphu kpua Mosisu yele Eronu. Ephe nodu epfugbaa su: "O gege akakwaru anyi ree l'anyi nwushihuru l'ali Ijiputu; ozoo l'echiegu-a! ³ ?Bu gunu meru g'o gude Chipfu nodu eme g'o duru anyi je edobe l'ali ono g'ephe gbushia anyi? Unyomu anyi phe; me unwegirima anyi phe be a-bya aburu ndu a kputacharu le ndzu. ?To gege akaduru anyi ree g'anyi laphu azu l'ali Ijiputu?" ⁴ Ephe pfuaharu nwibe phe asuje: "G'anyi hota onye lanu; mee ya ishi g'o duru anyi laphu azu l'ali Ijiputu."

⁵ Mosisu yele Eronu daa kpurumu l'atatiphu igwe-oha ndu Ízurelu ono l'ophu. ⁶ Jioshuwa nwa Nunu; ye Kalebu nwa Jiefune, bu ndu yi le ndu jeru ngge l'ali Kénanu ono gude ehu-eghu lajashia uwe, ephe yeru l'ehu; ⁷ aku opfu ekpu edzudzu-oha Ízurelu ono su phe: "Ali ono, anyi jeru aghaphee bya anwua ya ngge ono be bukwa ali, dushikpoo ree ike. ⁸ O -buru l'anyi du Chipfu ree be oo-duru anyi bahu l'ali ono; nu iya anyi;

kele alì ono bu alì, mini ẹra-eswi waa manụ-
 ẹnwu asọ gborogboro. ⁹ Iphe, du iya nu kpoloko
 buẹpho g'unu te kwefuru Chipfu ike. Iphe ọzo
 buru g'unu ba tsushi ndu alì ono ebvu. Noo
 kele anyi e-ri phe ge nri. Ephe te nwedu onye
 egbobuta phe nu; obenu l'anyibedua be Chipfu
 swiru eswiru. G'anyi ba tsushinu phe ebvu.”
¹⁰ Obenu l'iphe, bu ndu Izurelu ono g'ephe ha
 be suru g'a tu-gbushia phe le mkpuma. Tobudu
 iya bu; odu-biribiri ke Chipfu bya enwuaru ndu
 Izurelu g'ephe ha ke phoo l'ulo-ekwa-ndzuko
 ono.

Mosisu arwo Chipfu l'iswi ehu ndu Izurelu

¹¹ Chipfu bya asu Mosisu: “?Bu teke ole be
 ndu-a a-kpo-beru mu ebo l'afu-a? ?Bukpoo teke
 ole be ephe a-jika-beru ekweta nkemu; yekwaru
 iphe-ohumalenya ono, mu meshigbaberu l'eka
 ephe no ono? ¹² Mu e-gude ejo iphe-ememe
 gbushia phe; mee phe; ephe aburu mkpurupy-
 ata. Mu eworu gubedua mee l'i buru oha
 l'ophu; oha, paru eka apaa; bya aka okpehu eme
 l'ephebedua.”

¹³ Mosisu su Chipfu: “Oowaa! Ndu Ijiputu be
 a-numakwa iya me i -mee ya nno. Nyatakwa
 l'i gude okpehu ngu dufuta ndu-a l'eka ndu
 Ijiputu ono. ¹⁴ Ephe e-pfukwaru iya ndu bu
 l'alì-a; kele ephe numakotawaru le gube Chipfu
 swiru phe eswiru; numawa l'ephe egudeje enya
 phe huma gube Chipfu; teme l'urwukpu nkengu
 be anoduje phe l'eli; teme l'obujeru; o -rwua
 l'eswe; l'i gude urwukpu, kpuru oronmono edu
 phe; o -rwua l'enyashi l'i gude oku, kpuru

oronmono edukwa phẹ phọ. ¹⁵ Ọ -buru l'i gbushiru ndu-a l'ugbo lanu nta-a bẹ ọha ono, numajewaru údù ngu ono bẹ a-sukwa: ¹⁶ 'Lẹ gube Chipfu ta aduedu ike durwua phẹ l'alì ono, i kweru phẹ ukwe iya; ribua lẹ nte l'ìi-nu phẹ ono; i woru phẹ gbushia l'echiegu.' ¹⁷ Ọo ya bu; gube Nnajiuphu; mu arwo ngu g'i goshinu l'ì bu onye ike paru ẹka apaa; mbu egube ono, i pfujehawaru su: ¹⁸ 'Chipfu bu onye ẹhu te eghujedu eghu egwegwa; bya aburu onye nyemobu iya nyiberu anyibe; bya aburu onye aguje nvu l'iphe-ẹji; mẹ l'emeswe, e mesweru iya. Obenu l'ọ bukwapho onye ta ahajedu onye-ikpe nmaru kẹ mmanu. Ọogwaje unwegirima ọchi iphe-ẹji, ndu nwuru phẹ nu meru jasụ l'ogbo k'eto rwua lẹ k'eno.' ¹⁹ Iphe, mu arwo ngu bu g'i gudenu obu-imemini ngu ono, nyiberu anyibe ono guaru ndu-a nvu l'ejo-iphe, ẹphe meru ngu; mbu egube ono, i shiro l'alì Ijiputu gutaru phẹ nvu byasu nta-a ono."

²⁰ Chipfu bya asu Mosisu: "Mu guwaru phẹ nvu egube ono, i rworu. ²¹ Ọle; eshinu mu no ndzu gẹ mu no iya-a; ọdu-biribiri nkemu sweta mgboko g'o swetaru iya-a; ²² bẹ ndu-a, gudewaa ẹnya phẹ huma ọdu-biribiri mu-a; mẹ iphe-ohumalenya ono, mu meshiru l'alì Ijiputu ono; mẹ ọphu mu meshiru l'echiegu; mbu ndu ono, mecharu dale mu adale mgbo iri ono; ọphu ẹphe angaduru mu nchi ono; ²³ bẹ ọ to dudu onye ọphu byaru egude ẹnya huma alì ono, mu riburu lẹ nte kwe nna phẹ ukwe iya ono. Ọphu ọ to dudu iphe, bu ndu ono, kporu mu ẹbo ẹbo l'afu ono, byaru ahuma iya nu. ²⁴ Ọle a -bya l'ẹhu

k'onye-ozì mu onò, bú Kalèbu; eshi òphu ò bú onye obu iya gbaru iche; tème ò búru onye gude obu iya g'ò ha etso ọzo nkemu bè mu e-duru iya bahù l'alì onò, ò bahuru je anwua ngge onò; ò búru oshilòkpa iya bè e-nweru alì onò. ²⁵ Ọo ya bú; eshinu ndu Amalèku; mề ndu Kénanu bu lẹ nsuda nsuda; o -rwuèpho echele; unu dakòbe shia ọzo echiègu onò, dù l'ọzo, e shi eje Eze-nyimu Uswe-uswe.”

Chipfu anu ndu Ízurelu aphu
(Dit 1:34-40)

²⁶ Chipfu bya asù Mòsisu yẹle Erònu: ²⁷ “? Bú teke ole bè ndu èjo-ememe-a a-gunyaaru mu aphù gu-buhu? Mu nùmakotawaru aphù, ndu Ízurelu nọ gushia kpua mu. ²⁸ Unu karù phẹ lẹ mube Chipfu sùru-a: ‘Eshinu mu nọ-a ndzù gẹ mu nọ iya-a; bè mu a-tùkokpoo iphemiphe onò, mu nùmaru, unu pfushiru onò; mee unu. ²⁹ Ọo l'echiègu-a bè odzu unu a-wùshiru; mbù iphe, bú ndu onò, nọwaru a -gbẹ l'ùkporo apha kwaseru onò; mbù ndu a gùru ọgu teke aagù ọgu, bú ndu onò, yì lẹ ndu onò, gùru èjo aphù kpua mu onò. ³⁰ Ọ tọ dùdu m'onye lanù l'ime unu bya a-bahù l'alì onò, mu woliru èka mu imeli kweta lẹ mu a-nù unu g'unu buru onò; gbahaèpho Kalèbu nwa Jiefune; waa Jioshuwa nwa Nunu. ³¹ Ọ búru ùnwegirima unu onò, unu sùru l'aa-kpù lẹ ndzù onò bè mu e-duru bahù l'alì onò; g'èphe je amaru alì onò, unu jìkaru onò. ³² A -bya l'unubèdua; ọo l'ọma echiègu-a bè odzu unu a-wùshiru. ³³ Ùnwegirima unu bè a-nọdu awù-phe l'ọma echiègu-a gẹ ndu eche aturu;

ghaphee nno nọ ụkporo apha labọ sụgba ishi; jee iphe-ẹhuka k'ekwegekwe unu ono; gbiriri jasụ odzu unu akwashia l'oma echięgu ono. ³⁴ Iphe, unu nọru teke unu jeru anwụ ngge l'alị ono bụ ụkporo abalị labọ. O bụru ụkporo apha labọ bẹ unu e-je iphe-ẹhuka ejo-ememe, unu meru ye iya. Ujiku lanụ anwutaru unu apha ophu. Oo ya bụ g'unu a-makwanuru iphe, bụ lẹ mu bụ onye opfu unu. ³⁵ Mụbe Chipfu bẹ pfuakwaru nkemu; mu mefutajekwa iphemiphe ono l'ẹhu ndu ejo-ememe ono; mbụ ndu ono, dọkoberu etso mu opfu ono. Ẹphe a-tụko bụru mkpurupyata l'echięgu-a; mbụ l'ọo l'ẹka-a bẹ ẹphe a-tụko nwushihukota.' ”

³⁶ Noo ya; iphe, bụ ndu ono, Mosisu yeru; ẹphe je anwua ngge l'alị ono, lwaru nụ bya atua onu alị ono lẹ njo ono; mbụ shi nno mee ndu Ízurelu guru aphụ kpua Mosisu ono; ³⁷ ndu ono, bụ pẹ turu onu alị ẹji ẹji ono bẹ ejo iphe-ememe gbushikotaru l'iphu Chipfu. ³⁸ O bụru Jioshuwa nwa Nunu yẹle Kalẹbu nwa Jiefune bẹ bụ ndu phoduru nụ l'iphe, bụ ndu ono, jeru anwua ngge l'alị ono.

*Aalwụ-gbu ndu Ízurelu lẹ Homa
(Dit 1:41-46)*

³⁹ Mosisu bya eworu iphe ono pfiaru ndu Ízurelu l'ophu; o rwua pẹ l'ẹhu; ẹphe kwatakpoọ raa ẹkwa onwophẹ. ⁴⁰ O -rwua l'onmewa utsu ophu etsota mbọku ono; ẹphe tųgbua jeshia l'alị úbvú úbvú Kėnanu je anọdu asuje: “Anyi mewaru iphe-ẹji. Unu g'anyi

wufukwa jeshia ẹka ono, Chipfu kweru anyi ukwe iya ono.”

⁴¹ Mósísu sù: “?Bù ǵunu meru iphe unu e-me g'unu mebyia iphe, ekemu Chipfu pfuru? Ọ tọo dukwaru unu lẹ ree! ⁴² Unu te ejekwa; kẹle Chipfu ta nọkwa swiru unu. Unu -jee bẹ ndu ọhogu unu e-chigbushikwa unu; ⁴³ noo kẹle ndu Amaleku mẹ ndu Kėnanu bẹ nọ unu l'uzo atatiphu l'ẹka ono. Ẹphe e-gudekwa ogu-echi gbushikọta unu. Chipfu te eswikwaru unu; kẹle unu gbakutawaru iya azu.”

⁴⁴ Obenu l'ẹphe ta akpadururo ishi; ẹphe tųgbua jeshia l'alì úbvú úbvú ono; ọle Mósísu waa okpoko ọgbandzu Chipfu te tsodu pẹ lufu l'ẹka ono, ẹphe kpọberu ọlo-ẹkwa pẹ. ⁴⁵ Tọbudu iya bú; ndu Amaleku mẹ ndu Kėnanu, bu l'alì úbvú úbvú ono datso pẹ ọgu; lwu-kpee; chia pẹ jeye lẹ mkpukpu Homa.

15

Ekemu, du lẹ ngweja, du iche iche

¹ Chipfu bya asù Mósísu: ² “Waa iphe, ii-pfuru ndu Ízurelu baa: Unu -laẹpho alì ono, unu eje eburu ono, bú alì ono, mu a-nu unu ono; ³ unu -gwejeẹpho ngweja nu Chipfu; unu shi l'ikpoto ẹku unu họta anu gbua kpọo ọku gude gwee ngweja ọbu g'ọ buru ngweja, mkpọ iya du Chipfu ree. Unu e-meje iya nno lẹ ngweja-akpọ-ọku; mẹ ngweja, e gude apfu ukwe-iphe e kweru; mẹ teke unu anu iphe, shi unu l'obu; ọzoo teke unu egwe ngweja ọbo-iphe. ⁴ Onye wotaru ngweja ono e-yekọbeje iya ngweja-nri bya anu Chipfu; mbu

wota uzi lanụ l'ime nkweka ukpokutu ereshi, e keru ụzo iri; gwọọ lẹ manụ, jiru eze ekpemu.

⁵ “Iphe, bụ nwaturu, e gude egwe ngweja-akpo-oku; ozoo ngweja mmanụ bẹ unu e-yekobeje ngweja-mee; mbụ mee, jiru nkeru-eno otu-lupfu otumu.

⁶ “A bya l'iphe, bụ ebili, e gude egwe ngweja; unu yekobeje iya ngweja-nri; mbụ ụzo labo l'ime nkweka ukpokutu ereshi, e keru ụzo iri; gwọọ lẹ manụ, jiru eze ekpemu lanụ l'ubvù iya. ⁷ Ngweja-mee ono bẹ unu e-gude mee, jiru nkereto otu-lupfu otumu gwee. Unu meje iya g'ọ buru ngweja, mkpo iya dụ Chipfu ree.

⁸ “Teke o bụ l'oo nwa oke-eswi bẹ unu gude abya egweru Chipfu ngweja-akpo-oku; ozoo ngweja, e gude apfu ukwe-iphe; ozoo ophu e gude egwe ngweja-ehuguu; ⁹ g'onye egwe ngweja ono yekobekwa iya ngweja-nri; mbụ ụzo eto l'ime nkweka ukpokutu ereshi, e keru ụzo iri; gwọọ lẹ manụ, jiru eze ekpemu labo. ¹⁰ Nokwapho g'unu e-wota mee, jiru nkeru-ebo otu-lupfu otumu gude gwee ngweja-mee. Ngweja ono bẹ a-buru ngweja, a kpọru oku, mkpo iya dụ Chipfu ree.

¹¹ “O buru egube ono bụ g'unu e-medzujeru iya l'iphe, bụ oke-eswi; ozoo ebili; ozoo nwaturu; m'ọ bụ nweghu, unu gude egwe ngweja. ¹² Noo g'unu e-medzujeru iya bụ ono l'iphe, bụ ngweja, unu egwekpo egwegwe; g'ọ hahabe igwerigwe. ¹³ Iphe, bụ onye a nwuru anwunwu lẹ Izurelu bẹ bụ egube ono bẹ oo-meje ngweja, oogwe anụ Chipfu; mbụ ngweja, a kpọru oku shi nno mee

gẹ mkpọ iya dọ Chipfu ree. ¹⁴ Shita l'ogbo k'unu-a je akpaa l'ogbo ọp̄hu abya l'ataphu; onye bụ onye lwaru alwalwa, bu ebubu l'echilabo unu - wota ngweja bya gẹ ya gweru nu Chipfu; mbu ngweja, a kpuru oku; shi nno mee gẹ mkpọ iya dọ Chipfu ree; g'ọ bukwaru egube unu emeje be oo-me. ¹⁵ Oo omelali lanu ono duru unube ndu Izurelu l'ophu; me iphe, bu ndu lwaru alwalwa, bu l'echilabo unu. Omelali ono a-nopho shita l'ogbo unu sweru ogbo ọp̄hu abya nu jasuru asuru. Oo g'unu dọ l'ataphu Chipfu bu gẹ ndu lwaru alwalwa dukwapho. ¹⁶ O buru ekemu lanu; waa omelali lanu be duru unu le ndu lwaru alwalwa; unu l'ephe buru."

Anu Chipfu iphe-mbu

¹⁷ Chipfu bya asu Mosisu: ¹⁸ "Waa iphe, iipfuru ndu Izurelu baa: Unu -rwuepho ali ono, mu edu unu eje ono; ¹⁹ unu -rijeepho nri, shi l'ali ono; unu ketakwa oke iya bya anu Chipfu. ²⁰ Unu gude ukpokutu-iphe, shi l'akpuru-iphe-mbu, unu metaru l'ali ono gheta buredi nu Chipfu g'ọ buru ngweja, shi l'eka eechije bali. ²¹ Ngweja ukpokutu iphe-mbu, unu metaru l'ali ono be unu a-nuje Chipfu jasuru asuru; mbu e -shi l'ogbo sweru ogbo."

Ngweja k'iphe-eji, e lekebeduru enya mee

²² "Su-a; o -buru l'o nweru onye elekebuduru enya darwua ekemu-a, Chipfu tushiru ye Mosisu l'eka-a; ²³ mbu ekemu ono, Chipfu shi l'eka Mosisu nukota unu ono; g'ọ ha; mbu e -shi le mboku, Chipfu turu iya nu unu jaswaruroya;

e -shi l'ogbo sweru ogbo; ²⁴ bẹ ọ -buru lẹ ndu Ízurelu te elekebeduru ẹnya darwua ekemu ono; mbu l'oha Ízurelu l'ophu ta amadu teke ephe meru iphe-ẹji ono; gẹ ndu Ízurelu l'ophu kpata nwa oke-eswi gude gwee ngweja-akpo-oku; mbu ngweja, e meru; mkpo iya du Chipfu ree. L'e yekobekwa iya pho ngweja-nri; me ngweja-mee, ayikwaru iya pho; waa mkpi, ee-gude gwee ngweja-iphe-ẹji. ²⁵ G'onye uke Chileke gwee ngweja ono gude pfua ugwo iphe-ẹji ndu Ízurelu ono l'ophu; g'aa-guaru phe nvu l'iphe-ẹji ono, ephe meru ono; kele ephe te elekebeduru ẹnya mee ya; teme ephe bya egwewaru ngweja nu Chipfu le k'emeswe ono, ephe mesweru ono; mbu ngweja, a kporu oku; me ngweja-iphe-ẹji. ²⁶ Ndu Ízurelu l'ophu; me ndu lwaru alwalwa, bu l'echilabo phe be aa-gukotaru nvu; noo kele ephe tukoru mee iphe-ẹji ono; ole ephe te elekebeduru ẹnya mee ya.

²⁷ "Ole-a; ọ -buru l'oo onye lanu be meru iphe-ẹji ono; ophu o lekebeduru ẹnya mee ya; g'onye obu wota nwada egwu, gbaru apha g'e gude gwee ngweja-iphe-ẹji ono, o meru ono. ²⁸ Onye uke Chileke be a-nodu l'iphu Chipfu pfua ugwo iphe-ẹji ono, onye ono elekebeduru ẹnya mee ono. A -pfuwa ugwo iphe-ẹji ono, onye ono meru ono; be a guwaru iya nvu. ²⁹ Oo ekemu lanu ono be duru iphe, bu onye meru iphe-ẹji, o lekebeduru ẹnya mee; m'o bu onye a nwuru anwunwu le Ízurelu; m'o bu onye lwaru alwalwa."

Ngweja k'iphe-ẹji, e lekeberu ẹnya mee

³⁰ “O bekwanụ l'onye lekeberu ẹnya mee iphe-
 ẹji; mę a nwuru onye ọbu anwunwu lę Ízurelụ;
 ọzo l'ọ bụ onye lwarụ alwalwa; bę onye ọbu
 pfubiyakwaru ẹpha Chipfu. Onye dụ nno bę ee-
 bufu ebufu l'echilabọ ndibe phę. ³¹ Eshi ọphu
 onye ono ta adudu iphe, ọ guberu Opfu Chipfu;
 bya emebiywaa ekemu Chipfu; bę ee-bufuje onye
 ọbu ebufu; iphe-ẹji, o meru atụ-koru iya l'ishi.”

Nwoke, darwuru nsọ eswe-atuta-unme

³² Lę teke ndu Ízurelụ nọkwadu l'echięgu bę o
 nweru nwoke lanụ, e guderu g'ọokpa nkụ l'eswe-
 atuta-unme. ³³ Ndu humaru iya l'ẹka ọokpa nkụ
 ono kpụta iya kpụ-pfushiaru Mósisu yęle Eronu;
 mę ndu Ízurelụ l'ophu. ³⁴ Ẹphe kpụta iya tų-
 chia atụ-chi; kele e teke pfukahadu iphe, ee-me
 iya. ³⁵ Ọo ya bụ; Chipfu sụ Mósisu: “Nwoke ono
 bę ee-gbukwa egbugbu. Gę ndu Ízurelụ l'ophu
 kpufukwa iya azụ ẹka ẹphe kọberu ọlo-ẹkwa
 phę je atugbua ya lę mkpuma.” ³⁶ Tọbudu iya
 bụ; ndu Ízurelụ bya akpụta iya kpufu azụ ẹka
 ono, ẹphe kọberu ọlo-ẹkwa phę ono; je eworu
 iya tugbua lę mkpuma, bụ gę Chipfu suru Mósisu
 g'e mee ya.

*Iphe, a kparụ akpakpa gude mengashia onu
 uwe*

³⁷ Chipfu bya asụ Mósisu: ³⁸ “Waa iphe,
 ii-pfuru ndu Ízurelụ baa: Unu kpajeru
 iyanguyangu ye lę mgburęku uwe mgbalanụ
 unu ishi ẹno. Iphe, unu e-gudeje kpaa
 iyanguyangu ono aburu oghu, dụ urwukpu-
 urwukpu. Noo g'unu e-meje iya bụ ono; e -shi

l'ogbo sweru ogbo. ³⁹ Iyanguyangu ono be unu e-leje enya gude nyatakota ekemu mube Chipfu; k'ophu unu a-noduje eme iya ememe; haa egu ejo-iphe ono, anoduje agugbaa obu unu; me ophu enya unu ahumagbabe ono; mbu ejo-iphe ono, unu shi anoduje emegbaa ono. ⁴⁰ Oo ya bu; k'ophu unu a-nyataje ekemu; bya eme iya ememe; shi nno duru Chileke unu nsọ. ⁴¹ Oo mbedua bu Chipfu; buru Chileke unu; mbu onye ono, dufutaru unu l'alı Ijiputu; ge mu buru Chileke unu ono. Oo mu bu Chipfu, bu Chileke unu."

16

Kora; Detanu; waa Abiramu

¹ O be teke ono; Kora nwa Izuha, bu nwanwa Kohatu; onye eri Livayi; waa Detanu; me Abiramu, bu unwu Eliyabu; me Onu nwa Peleti, bu ndu ipfu Rubenu bya achita nemadzu yeru onwophe; ² ephe wulihu tsoahaa Mosisu opfu. Ndu ono, tso phe nu ono bugbaa ndu a hotaru g'ephe buru ndu-ishi ndu Izurelu; bya aburu ndu a maru epha phe le Izurelu l'ophu. Iphe, ephe du bu ukporo umadzu iri l'ebo l'umadzu iri. ³ Ephe kpako onwophe byapfutashia Mosisu yele Eronu bya asu phe: "Unu metawaru iphe obu; o tso be paa! Ndu Izurelu l'ophu be unu maru l'ephe du nsọ l'ehu l'ehu; teme Chipfu swiru phe eswiru. ?Bu gunu meru g'o gude unu palia onwunu eli eli do be doghata ndu ke Chipfu l'ophu?"

⁴ Mósísu nùmaep̄ho ip̄he ono, ep̄he pfuru ono; o daa kpupyabẹ ip̄hu l'alì.

⁵ O sù Kora yẹle ndu ep̄he l'iya swì: “O -rwua l'ùtsu echele bẹ Chipfu e-goshiwaro onye ophu bụ nkiya; waa onye dụ nsọ; onye o họtaru bẹ oo-me g'ọ byakube iya ntse. ⁶ Waa ip̄he, unu l'e-me baa: Gẹ gubedua, bụ Kora; gụ lẹ ndu etso ngu nù; wota ip̄he, aaguje oku; ⁷ o -be echele; unu aguru oku ye iya; bya eye iya ùnwù-isensu l'ataphu Chipfu. Onye bụ onye Chipfu họtaru bẹ a-buru onye dụ nsọ. Unubẹ eri Lívayi metawaru ip̄he obu; o tsoke paa!”

⁸ Mósísu bya asukwapho Kora: “Unu ngabẹ nchì; unubẹ eri Lívayi! ⁹ Chileke kẹ Ízurelu họtaru unu doke iche lẹ Ízurelu l'ophu; mee g'unu nọdu iya ntse; eje ozi, dụ l'ulo-ekwa kẹ Chipfu; mẹ g'unu pfujeru l'ataphu ndu Ízurelu l'ophu jeru phẹ ozi; ophu ono asudu unu. ¹⁰ O meru gẹ gubedua; mẹ ndu Lívayi ibe ngu phẹ nọdu iya ntse; nta-a bẹ unu achofua ụzo, unu e-shi buru ndu-uke Chileke. ¹¹ O kwa Chipfu bẹ gụ lẹ ndu etso ngu nù g'ep̄he ha tukuroru etso op̄fu. ?Bụ onye bẹ Eronu bụ kẹ g'unu tanyiru iya ntanyi?”

¹² Oo ya bụ; Mósísu bya ezia g'e je ekua Detanu; mẹ Abiramu, bụ unwu Eliyabu. Ep̄he sù l'ep̄he ta abyadu. ¹³ Sù: “?I rwutaru anyi rwufuta l'alì ono, era-eswi waa manụ-enuw aso gborogboro ono; ophu ono asudu ngu. I nọdu emefua g'i woru anyi gbushia l'echiegu l'eka-a; bya emefukwapho g'i mee onwongu onye-ishi anyi. ¹⁴ Ophu ka njọ bụ l'i ti dubaduru anyi l'alì,

era-eswi waa manụ-ẹnwu asọ gborogboro; mbụ alì ẹka anyi a-kobeje iphe; waa ẹka anyi e-me opfu-vayinu. ?Iime g'i mee ndu-a mkpurukpuru- ẹnya tọ? Waawaa! Anyi ta abyadu!”

¹⁵ Oo ya bụ; ẹhu ghushiahaa Mosisu egbu ike; o sụ Chipfu: “G’o tọ dukwa ngweja, ndu-a gweru nu ngu, ii-nata. Mu ta natajekwaru phẹ g’o ka mma l’oo nkapfu-igara phẹ mẹ nanu; ophu mu emekajeduru phẹ iphe mẹ onye lanu.”

¹⁶ Mosisu sụ Kora: “Gẹ gubedua yẹ ndu etso ngu nu g’ephẹ ha tuko bya l’iphu Chipfu echele. Gẹ gubedua; waa ephebedua; waa Eronu tuko byakota. ¹⁷ G’onyenonu gudekwa iphe, aaguje oku; ye iya unwu-isensu gude bya l’ataphu Chipfu. Iphe, oo-du; mbụ iphe ono, aaguje oku ono bụ ukporo iri l’ebo l’iri. Gubedua, bụ Kora l’onwongu e-gudekwapho nkengu; Eronu egude nkiya bya.” ¹⁸ Tobudu iya bụ; onyenonu wota iphe ono, aaguje oku ono; bya aguru oku ye iya; ye iya unwu-isensu je apfugbaaru l’onu ulo-ekwa-ndzuko ono. Ephe lẹ Mosisu mẹ Eronu tuko pfuru l’eka ono. ¹⁹ Kora bya achikobe oha Izurelu ono l’ophu; l’onu ulo-ekwa-ndzuko ono g’ephẹ tso Mosisu yẹ Eronu opfu. No iya; odu-biribiri kẹ Chipfu sopyabe oha Izurelu ono l’ophu. ²⁰ Chipfu sụ Mosisu yẹ Eronu: ²¹ “Unu shi l’echilabo igwe oha ono futa gẹ mu bya atuko phẹ mebyishikota lẹ ntabu ẹnya lanu.”

²² Mosisu yẹ Eronu daa; kpube iphu l’alì chishia sụ: “Oowaa! Gube Chileke; mbụ Chileke bụ ishi ndzụ iphe, bụ nemadzụ l’ophu; ?ii-gude

k'iphe-ẹji, onye lanu metaru tu-koshi oha l'ophu oke ehu-eghu ngu to?"

²³ Chipfu bya asu Mosisu: ²⁴ "Pfuaru oha Izurelu ono l'ophu g'ephe kpuriberu l'ibiya ophu ulo-ekwa Kora; me Detanu; waa Abiramu no."

²⁵ Mosisu gbalihu; yele ndu bu ogerenya Izurelu swiru jepfushia Detanu waa Abiramu. ²⁶ O su igwe oha ono: "Unu lufutakwa l'ulo-ekwa ndu ejo-ememe ono! Unu te edenyikwa eka l'iphe, bu nkephe; odumeka be Chipfu egudekwa k'iphe-ẹji, ephe meru woru unu megbushia." ²⁷ Oo ya bu; onyemonye buru ubara yeru ulo-ekwa Kora; me ke Detanu; waa ke Abiramu.

Detanu yele Abiramu bya afuta pfuru l'onu ulo-ekwa phe; ephe l'unyomu phe; me unwu phe unwoke; waa unwegirima phe. ²⁸ Mosisu su: "Oo iphe-a be unu e-gude maru l'oo Chipfu ziru mu ge mu mee iphemiphe ono; l'o to budu iphe, gbataru mu l'uche be mu emeje. ²⁹ O -buru le ndu-a be nwuhuru ge nemadzu mmanu anwuhuje; mbu-a; o -buru l'oo g'onwujeru nemadzu l'ophu be o nwuru phe; oo ya bu l'o to budu Chipfu ziru mu iphe ono, mu eme ono. ³⁰ Ole o -buru le Chipfu meru g'iphe te emejeduru nu mee; mbu; ali -saa onu lwegbushia phe; me iphemiphe, ephe nweru enweru; mbu; ephe buru ndu wubaru l'ali-maa le ndu; oo ya bu; unu amaru l'o to dudu iphe, ephe guberu Chipfu."

³¹ Epfughe, Mosisu epfughe opfu ono; ali ono, Detanu phe pfuru ono kejaha ebo; ³² ali ono saa

onu lwekọta phe; me ndibe phe; me ndu ke Kora; me ivu phe. ³³ Ephe wubakota l'ali-maa le ndzu; me iphemiphe, ephe nweru enweru; ali kpupyabe phe; ephe tuko g'ephe ha lakota l'iyi l'echilabo ndu Izurelu. ³⁴ O buru mkpu, ephe chishiru be meru; ndu Izurelu, no-pheru eka ono mgburugburu ye okpa l'oso; araje su: "Ali abyakwa anyi elwelwe-o!"

³⁵ Noo ya; oku, shi l'eka Chipfu bya ekegbushikota umadzu ukporo iri l'ebo l'umadzu iri pho, shi akpo unwu-isensu oku pho.

Gbamugbamu, du nsọ, aagujeru oku ye

³⁶ Chipfu su Mosisu: ³⁷ "Pfuru Eleyaza, bu nwa Eronu; bya aburu onye uke Chileke g'o loshia iphe ono, aaguje oku l'ime oku ono; voshia icheku-oku, du iya nu tukaa nanu nanu; noo kele iphe ono du nsọ; ³⁸ mbu iphe ono, aaguje oku ono, bu ke ndu ono, meru iphe-aji shi nno tuphaa ndzu phe ono. O -loshichaa ya; g'a kusaa ya akusa g'o chisaa echisa g'e kpubeje iya l'eli oru-ngweja Chipfu. Noo kele a nuwaru iya Chipfu; o buru iya bu l'o duwaa nsọ. Iphe ono be a-buru iphe-ohubama l'eka ndu Izurelu no."

³⁹ Oo ya bu; Eleyaza, bu onye uke Chileke bya achikoo iphe ono, aaguje oku ono, bu onyirubvu be e gude mee ya ono; mbu iphe ono, ndu ono, oku kegbushiru gude bya akpo unwu-isensu oku ono. A kusaa ya osa k'ophu ee-kpubeje iya l'eli oru-ngweja Chipfu; ⁴⁰ g'o buru iphe, ndu Izurelu e-gudeje nyata l'o to dudu onye ozo, bu onye ta abudu oshilokpa Eronu, a-kpuritajeru

bya g'ọ kpọ ùnwù-isensu ọku l'atatiphu Chipfu; ọdumeka bẹ ọo-dùkwaru onye ono ẹgube ono, ọ duru Kora yẹle ndu ttoru iya nù; mbụ ẹgube ono, Chipfu shi l'ẹka Mósísu pfua ya ono.

Ọnwu egbushi ndu Ízurelu

⁴¹ O -rwuẹpho nchitabọhu iya; ndu Ízurelu l'ophu wata aguru Mósísu yẹle Erọnu aphụ asuje: “Ọ kwa ùnwu Chipfu bẹ unu gbushiru ẹgube ono.” ⁴² Tọbudu iya bụ; ọha Ízurelu ono l'ophu bya akpakọbe onwophẹ g'ẹphe wata etso Mósísu yẹ Erọnu opfu. Ẹphe jeshia ele ẹnya l'ulo-ẹkwa-ndzukọ; urwukpu sọ-kputewa iya; ọdu-biribiri kẹ Chipfu bya enwua kẹ phoo. ⁴³ Mósísu yẹle Erọnu bya ejeshia l'atatiphu ulo-ẹkwa-ndzukọ ono; ⁴⁴ Chipfu sụ Mósísu: ⁴⁵ “Unu shi l'echilabọ igwe ọha ono lufuta gẹ mu bya atuko phẹ mebyishikọta lẹ ntabu ẹnya lanu.” Ẹphe daẹpho kpurumu l'iphu Chipfu.

⁴⁶ Tọbudu iya bụ; Mósísu sụ Erọnu: “Wota iphe, ìiguje ọku; shi l'ọru-ngweja Chipfu guta ọku ye iya. Li woru ùnwù-isensu ye iya mee ẹgwegwa gude jepfu igwe ọha ono g'ì pfua ụgwo iphe-ẹji phẹ. Noo kẹle oke ẹhu-eghu, shi l'ẹka Chipfu bẹ talihuru nù; ẹjo iphe-ememe dapfutawa phẹ.” ⁴⁷ Ọo ya bụ; Erọnu wota iphe ono ẹgube Mósísu pfuru iya ono; bya agbagbua bahụ l'echilabọ igwe ọha ono. O jerwushia; ẹjo iphe-ememe ono nọdu egbushiwaa ndu ono. Ọ bya akpọoru Chipfu ùnwù-isensu ono ọku; bya apfua ụgwo iphe-ẹji ndu ono. ⁴⁸ Ọ pfuru l'echilabọ ndu ọphu nwụhuwaru anwuhu; waa ndu ọphu nọ ndzụ; ẹjo iphe-ememe ono bụru

bugemu. ⁴⁹ Ndu ejo iphe-ememe ono gbushiru be du ụkporo unu ụmadzu; l'unu ụmadzu iri l'ishii; l'ụkporo ụmadzu iri l'ise; a -gufukwa ndu ophu nwuhuru l'opfu ehu Kora. ⁵⁰ Eronu mechaa bya ejepfushia Mosisu l'onu ụlo-ekwa-ndzukọ; noo kele ejo iphe-ememe ono mebuhuwaru.

17

Mgboro Eronu be rwutaru irwu

¹ Chipfu su Mosisu: ² “Pfuaru ndu Ízurelu g'ephe chie ngu mgboro iri l'ẹbo. Ge ndu-ishi l'ipfu, nonu nuchaa ngu mgboro nanu nanu. Li deshia epha onyemonye le mgboro nkiya. ³ Onye ii-de epha iya le mgboro k'ipfu Lívayi bu Eronu. Kele onyenonu le ndu-ishi l'ipfu l'ipfu enweru mgboro lanu. ⁴ L'i chita mgboro ono je awushi l'ulo-ekwa-ndzukọ l'iphu okpoko-ekemu, bu eka ono, mu abyapfutaje unu ono. ⁵ Mgboro k'onye ophu mu hotaru be a-kpofuta ome. Oo ya bu ge mu e-shi nno mee ge ndu Ízurelu wofu mube Chipfu onu l'ehu l'aphu ono, ephe anoduje agushi ekpu unu tekenteke ono.” ⁶ Tɔbudu iya bu; Mosisu bya epfuaru iya ndu Ízurelu. Ndu-ishi l'ipfu nonu bya anugbaa ya mgboro nanu nanu; o tuko du mgboro iri l'ẹbo. Mgboro ke Eronu yikwaru iya pho. ⁷ Mosisu chita iya je edobe l'atatiphu Chipfu l'ulo-ekwa l'eka ono, okpoko-ekemu Chileke no ono. ⁸ O -rwua nchitabohu iya; Mosisu bahu l'ulo-ekwa eka ono, okpoko-ekemu Chileke no ono; bya ahuma ge mgboro ke Eronu, bukwanu onye no-chiru enya ipfu ke Lívayi kpofushiru ome; rwushia

irwu; tushikwapho ige; bya amishia akpuru alumundu. ⁹ Oo ya bu; Mosisu bya achifuta mgboro ono g'ọ ha l'ataphu Chipfu chijeru ndu Ízurelu. Epe lee ya enya; onyenonu wotachaa mgboro ophu bu nkiya.

¹⁰ Chipfu su Mosisu: “Woru mgboro ke Eronu dobephu azu l'iphu okpoko-ekemu ono; g'ọ du l'eka ono buru iphe-ohubama noduru ndu ono, ekwefuje ike ono; g'ọ buru iphe, a-noduje alo phe eka le nchi g'ephe haa agu-phe aphu ekpu mube Chipfu; a -nonyaa epe nwushihu.” ¹¹ O buerupho ge Chipfu suru ge Mosisu mee ya bu g'o meru iya.

¹² Ndu Ízurelu su Mosisu: “Anyi anwushihuchaakwa! Anyi laakwaru maa! Anyi lakotaakwaru maa g'anyi ha! ¹³ Onyemonye, jekubekporu ulo-ekwa Chipfu ntse be anwuhukwa nu. ?Anwuhu a-tuko anyi gbuębe to?”

18

Ozi, duru ndu-uke Chileke waa ndu Lívayi

¹ Chipfu su Eronu: “Gubedua l'onwongu; waa unwu ngu; me iphe, bu onu-ulo nna ngu l'ophu be o tu-koru l'ishi; mbu ejo-iphe, e meru l'ulo mu; o buru gubedua l'onwongu kwapho; me unwu ngu be o tu-kokwarupho l'ishi; mbu ejo-iphe, e meru meswee k'abu uke. ² Duta unwunna ngu phe, bu iya bu eri Lívayi, bu ipfu nna ngu g'ephe yejeru ngu eka; gubedua waa unwu ngu phe be a-nodu l'ataphu ulo-ekwa eka okpoko-ekemu Chileke no eje ozi. ³ Epe a-nodu

eje ozi, i ziru phe; me ozi, dukota l'ulo-ekwa. Ole o o epho g'ephe te jekubekwa mgboru ulo Chipfu; waa mgboru oru-ngweja Chileke; o -dudu be gu l'ephe a-tukokwa nwushihu. ⁴ Gu l'ephe a-tugba nanu; ephe eje ozi, du l'ulo-ekwa-ndzuko; mbu iphe, bukota ozi, du l'ulo-ekwa ono. G'onye abudu onye Lívayi ta abyakubejekwa unu ntse. ⁵ Oo unubedua a-nodu eje ozi, du l'ulo Chipfu; me ozi k'oru-ngweja Chileke; k'ophu Chileke ata atu-koshiedu ndu Ízurelu oke ehu-eghu iya ozo. ⁶ Su-a; mu hotawaru ndu Lívayi, bu unwunna unu l'echilabo ndu Ízurelu. Ephe bu ndu e woru nu unu; buru ndu e doberu mube Chipfu iche g'ephe jeje ozi, du l'ulo-ekwa-ndzuko. ⁷ Gubedua waa unwu ngu be a-nodu eje ozi k'egweru Chileke eja; mbu l'unu a-nodu ejekota ozi k'oru-ngweja Chileke; waa ozi, du l'ime eka ekwa-mgbochi no. Noo ozi, unu a-nodu eje bu ono. Mu yeru unu k'egwe ngweja ono l'eka g'o buru iphe-oma, mu meru unu. Onye ozo, abudu oshilokpa Lívayi -byaru le mgboru ulo Chipfu be a-nwuhukwanu."

Oke, rwuberu ndu-uke Chileke

⁸ No iya; Chipfu su Eronu: "Nta-a be mu woakwaru iphemiphe, bu iphe, aanuje mu anunu ye ngu l'eka. Iphemiphe, bu iphe, ndu Ízurelu doberu mu nsu; buwaa ngu be mu nukotaru iya g'o buru okiphe ngu; buru okiphe unwu ngu jasuru asuru. ⁹ Owaa be a-bufuaru okiphe unu l'iphe, kakota adu nsu ono, bu ophu a ta kpoduru oku: Iphe, ephe gudekota bya egwe ngweja nu mu; mbu iphe, shi le ngweja-nri; me iphe, shi

lẹ ngweja-iphe-eji; mẹ ọphu shi lẹ ngweja-apfụ-
 ụgwo; mbụ iphemiphe ono, ẹphe nuru mu g'ọ
 bụru ngweja, kakọta adu nsọ ono. Ndu k'ono bẹ
 bụkota okiphe, rwuberu gube Eronu; waa unwu
 ngu phe. ¹⁰ Unu nọduje l'ẹka kakọta adu nsọ ria
 ya. Ọ bụru unwoke kpoloko bẹ e-rije iya nụ. G'ọ
 bụkwaru unu iphe, du nsọ.

¹¹ “Iphe, bu iphe, ndu Ízurelu doberu mu
 iche; mbụ iphe, shikọta lẹ ngweja-amama bẹ
 bu nkengu. Mu wowaru iya nụ gu l'unwu ngu
 unwoke; mẹ unwada ngu jasuru asuru. Iphe,
 bu ndibe ngu, nturuwu adudu l'ẹhu bẹ e-tsojeru
 ria ya. ¹² Iphe, ndu Ízurelu nuru Chipfu l'ọo
 iphe-mbụ, shi l'iphe, ẹphe metaru l'alì bẹ bu
 ngu nwe iya; mbụ iphe, bu manu olivu, kakọta
 ree; mẹ iphe, bu mẹe ọphúú, kakọta ree; waa
 iphe, bu ereshi, kakọta ree. ¹³ Iphe, bụkota iphe,
 ẹphe wotaru Chipfu l'ọo akpuru-iphe-mbụ, ẹphe
 metaru l'alì phe bu nkengu. Iphe, bu ndibe ngu,
 nturuwu adudu l'ẹhu bẹ l'e-tsojeru ria ya.

¹⁴ “Iphe, bu iphe, e yeru Chipfu l'ẹka l'alì
 Ízurelu bẹ bụkota nkengu.

¹⁵ “Iphe, bu iphe, vuchakpọo ụzo waa ẹkpa-
 nwa ne iya; anu mẹ nemadzụ; mbụ ọphu e woru
 nụ mube Chipfu a-bụkotajeru nkengu. Obenu
 l'aa-pfufe ụgwo gude gbata iphe, bu ọkpara, shi
 l'ẹhu nemadzụ; nokwaphọ g'aa-pfufe ụgwo gude
 gbata iphe, bu anu mbụ, shi l'ẹhu anu, aaso
 nsọ futa. ¹⁶ Ẹphe -nọwaa ọnwa ophu bẹ aa-
 pfufe mkpọla-ọchaa, ẹrwa iya du shekelu ise
 gude gbata phe; mbụ mkpọla-ọchaa, bu iphe,
 eegudeje atụ ẹrwa iphe l'eze-ulo Chileke bẹ e

gude t̄a ya. ¹⁷ Obenu l̄e nweswi, ne iya vuru ̄zo nw̄a; m̄e nwaturu, ne iya vuru ̄zo nw̄a; m̄e nweghu, ne iya vuru ̄zo nw̄a b̄e aa-haj̄e agbata. Ndu k'ono b̄e d̄u ns̄o. Unu gbuje iya; phee mee ya l'eli ̄ru-ngwēja ono; unu akpoje ̄ba iya ̄ku gude gwee ngwēja-akpo-̄ku; mb̄u ngwēja, mkpo iya d̄u Chipfu ree. ¹⁸ An̄u iya a-b̄uru nkengu; ̄gube ono, ñd̄u-iph̄e, e gude gwee ngwēja-amama; m̄e ̄tapfu ̄kpa ̄kutara an̄u b̄u nkengu ono.

¹⁹ “Iphemiphe, Ízurēlu doberu ns̄o g'̄ephe n̄u Chipfu b̄e mu n̄waru ḡu l'̄unwu ngu unwoke; m̄e ̄nwada ngu ph̄e g'̄o b̄uru nkunu jeye l̄e gbururu. Ono b̄u nrakunraku ōgbandzu mu l̄e ngu; m̄e awa ngu l'ophu. Ōgbandzu ono a-n̄o jas̄uru as̄uru. O to nwēdu echihu.”

²⁰ Chipfu bya as̄u Er̄onu: “Ḡe ndu Ízurēlu te emejekwa al̄i gbaa unu; ̄phu ̄phe ahejekwa unu okiphe. O kwa m̄b̄ēdua b̄u okiphe, unu hatar̄u. Oo mu b̄u okiphe, unu ketar̄u l'̄eka ndu Ízurēlu.”

Oke-lan̄u-l'̄uzo-iri b̄u oke, d̄uru ndu Lívayi

²¹ “A bya abya l'̄ehu ndu Lívayi; eshinu ̄phe eje ozi, d̄u l'̄ulo-̄ekwa-ndzuk̄o b̄e mu n̄kotawaru ph̄e iphe, shi l'oke-lan̄u-l'̄uzo-iri, ndu Ízurēlu an̄uje mu. Ono b̄uwaa okiphe ph̄e. ²² Shita nta-a kwas̄eru b̄e ̄o t̄o d̄udu onye Ízurēlu ̄zo, e-jekube mgboru ̄ulo-̄ekwa-ndzuk̄o; ̄dumeka b̄e iphe-eji onye ̄bu a-tukokwaru iya l'ishi; onye ono a-nw̄uhukwa. ²³ Oo ndu Lívayi b̄e eje ozi, d̄u l'̄ulo-̄ekwa-ndzuk̄o d̄u l'̄eka; ̄o b̄uru

phẹ bẹ ẹjo-iphe, e meru l'ẹka ono tukoru l'ishi. Iphe ono, a-buru nsọ, a-dù jasuru asuru; mbu jasú l'ogbo sweru ogbo. Ọ tọ dùdu iphe, ẹphe eketa l'ẹka ndu Ízurelu. ²⁴ Oke-lanù-l'ùzo-iri, ndu Ízurelu anuje mu; bẹ mu nùwaru ndu Lívayi g'ọ buru okiphe phẹ. Ọo ya meru g'o gude mu pfua opfu ẹhu phẹ sù: 'Ẹphe ta ahatadu okiphe l'ẹka ndu Ízurelu.' "

Oke-lanù-l'ùzo-iri kẹ ndu Lívayi

²⁵ Chipfu sù Mósisu: ²⁶ "Pfuaru ndu Lívayi sù phẹ lẹ-a: Ọ -buru l'unu nataru ndu Ízurelu oke-lanù-l'ùzo-iri ono, mu nuru unu g'ọ buru okiphe unu ono; unu shije l'ime iya woru oke-lanù-l'ùzo-iri nùkwapho Chipfu. ²⁷ Iphe, unu nuru bẹ aa-nọduje aguru unu g'ọ bu ereshi, shi l'ẹka l'eechije ereshi; a gùkwaa ya phọ gẹ mẹe, shi l'ẹka aakuje mẹe. ²⁸ Ọo ya bu l'unu e-shije l'oke-lanù-l'ùzo-iri ono, unu anatajẹ l'ẹka ndu Ízurelu ono woru oke-lanù-l'ùzo-iri iya nùkwapho Chipfu. Ọ buru l'oke-lanù-l'ùzo-iri ono bẹ unu e-shi woru kẹ Chipfu nù Erọnu, bu onye uke Chileke. ²⁹ Unu wojeru iphe, gbaru Chipfu nù iya l'iphemiphe, a nuru unu; unu shije l'ọphu bu iya kakọta ree nù iya ya; mẹ l'ọphu kakọta adu nsọ. ³⁰ Ọo ya bu; pfuaru ndu Lívayi sù phẹ lẹ teke ẹphe woru iphe, kakọta ree nù Chipfu ono bẹ aa-guru phẹ iya g'iphe, shi l'ẹka eechije balì; a gùkwaa ya phọ gẹ mẹe, shi l'ẹka aakuje mẹe. ³¹ Unu lẹ ndibe unu a-nọduje l'ẹka dù unu ree ria ndu ọphuu; kẹle ọo obunggo ozi, unu eje l'ùlo-ẹkwa-ndzukọ. ³² Ọ tọ dùdu iphe-ẹji, bya a-tukoru unu l'ishi m'ọ

bùru l'unu wotaru iphe ono ọ́phu kachaa ree nù mu. Tẹ́me ọ́phu unu e-merwudu iphe, ndu Ízurèlu doberu nsọ́ g'ẹ̀phe nù mu; k'ọ́phu unu ta anwùshihudu.”

19

Mini, e gude asafu nturwu

¹ Chipfu bya asù Mósìsù yẹ̀le Erọ̀nu: ² “Waa ekemu, Chipfu tũru sù: Pfuaru ndu Ízurèlu g'ẹ̀phe kpùtaru ngu nwada eswi, eke uswe-uswe; ọ́phu ọ́ dudu ẹ̀ka iphe mebyiru iya; ọ́phu ọ́ dudu ntùji, dù iya nù; tẹ́me ọ́phu e gudejeada ya jee ozi. ³ Unu kpùta nwada eswi ono kpẹ̀e Eleyaza, bù onye uke Chileke; g'a kpufu iya l'azù ẹ̀ka a kpọ̀beru ọ̀lo-ẹ̀kwa je egbua l'ẹ̀ka Eleyaza nọ. ⁴ Gẹ̀ Eleyaza, bù onye uke Chileke tsee mkpùshì-ẹ̀ka lẹ̀ mee ya phee l'uzo atatiphu ọ̀lo-ẹ̀kwa-ndzukọ́ ugbo ẹ̀saa. ⁵ Nwada eswi ono bẹ̀ aa-kpọ́ ọ̀ku l'iphu Eleyaza; kpọ́ akpọ́ iya ọ̀ku; mẹ̀ anù iya; waa mee ya; mẹ̀ nshì iya. ⁶ Onye uke Chileke ono bẹ̀ e-wota oshi sida; mẹ̀ ẹ̀swa isopu; mẹ̀ oghu uswe-uswe chìru ye l'echilabọ́ ọ̀ku ono, e gude akpọ́ nwada eswi ono ọ̀ku ono. ⁷ Teke ono bẹ̀ onye uke Chileke ono e-gude mini saa uwe iya; gude mini wuà ẹ̀hu. O -megheẹ̀ ya phọ́ nno; l'ọ́ batawarọ́ l'ime ẹ̀ka ono, a kpọ̀beru ọ̀lo-ẹ̀kwa ono. Ọ̀le ọ̀o-bùru onye aasọ́ nsọ́ nọ́ jasù l'uzenyashi mbọ̀ku ono. ⁸ Onye bù iya kpọ̀ru nwada eswi ono ọ̀ku bẹ̀ e-gudekwaphọ́ mini saa uwe iya; gude mini wuà ẹ̀hu; l'ọ́ bukwarupho onye aasọ́ nsọ́ nọ́ jasù l'uzenyashi mbọ̀ku ono. ⁹ Onye a ta sọ̀du nsọ́ bẹ̀ e-kpota ntù, shì l'ọ̀ku

ono, e gude kpoo nwada eswi ono oku. Oo-kpota iya je awushi l'eka nturwu ta adudu; l'azu eka a kpoberu ulo-ekwa. O buru l'eka ono be awushiru iya ndu Izurelu g'ephe gude meje ke mini, eegudeje asafu nemadzu nturwu; gude iya eme k'asafu iphe-aji. ¹⁰ Onye bu iya kpotaru ntu ono be a-sa uwe iya asasa. L'o buru onye aaso nsọ nọ jasụ l'uzenyashi mboku ono. Omelali ono be a-du gbururu jeye le gbururu. Oo-duru ndu Izurelu; duru ndu lwaru alwalwa; ephe l'ephe buru."

Edenyi odzu eka

¹¹ "Onye denyiru odzu onye nwuhuru anwuhu eka be a-buru onye aaso nsọ nọ ujiku esaa. ¹² Onye obu be e-gude mini ono, eegudeje asafu nturwu saa onwiya le mboku k'eto iya; waa le mboku k'esaa ya; teme l'oo-du ree. Ole o - buru l'o to sachaduru onwiya le mboku k'eto iya ono; me le mboku k'esaa ya ono be o to du du ree. ¹³ Iphe, bu onye meru odzu onye nwuhuru anwuhu eka; ophu onye obu ta sachaduru onwiya be bukwa ulo-ekwa Chipfu be ooturwu. Onye obu be ee-bufu l'eka ndu Izurelu nọ. Oo-buru onye aaso nsọ; noo kele e te pheduru iya mini, eegudeje asafu nturwu; emeswe ono be dukwadu iya l'ehu g'o du iya.

¹⁴ "Qwaa bu ekemu, du le k'onye nọ l'ime ulo nwuhu. Iphe, bu onye bahuru l'ime ulo ono teke ono; me iphe, bu onye nọ iya l'ime teke ono be a-buru onye aaso nsọ abali esaa. ¹⁵ Iphe, bu ivu, du l'ulo ono, e gheberu onu; ophu e kpubeduru iya iphe be aa-sokwapho nsọ. ¹⁶ Iphe, bu onye nọ

l'oma ẹgu denyi ẹka l'odzu onye e gburu ẹ mma; ọzoo odzu onye nwuhuru anwuhu mmanu; ọzoo l'o denyiru ẹka l'okpu onye nwuhuru anwuhu; m'o bu l'ilu; be a-buru onye aaso nsọ nọ abali ẹsaa.

¹⁷ “A -bya ẹ ke ndu aaso nsọ; g'ẹphe kpota ntu ono, shi l'oku, e gude kpoo ngweja-iphe-ẹji oku ono ye l'iphe; ẹphe eje l'ẹka mini, doru risaa du; kuta mini ye iya. ¹⁸ Oo ya bu; onye a ta sọdu nsọ ewota ẹsua isopu tsee l'ime mini ono; phee ya l'eli ulo-ekwa ono; me l'eli ivu, du l'ulo-ekwa ono; me l'ehu ndu nọ l'ime ulo-ekwa ono. Nokwapho g'oo-phe iya iphe, bukpo onye denyiru ẹka l'okpu onye nwuhuru anwuhu; me onye denyiru ẹka l'odzu onye e gburu ẹ mma; ọzoo onye denyiru onye nwuhuru anwuhu mmanu ẹka; me onye denyiru ẹka l'ilu.

¹⁹ Onye obu, a ta sọdu nsọ obu be e-phe onye ono, aaso nsọ ono mini ono ẹ mboku k'eto; waa ẹ mboku k'ẹsaa. O -rwua ẹ mboku k'ẹsaa ono; l'o safu iya nturuwuu ono. Onye ono, a saru ono asaa uwe iya asasa; gude mini wua ẹhu; l'o bya adu ree l'uzenyashi mboku ono.

²⁰ “Obenu l'onye aaso nsọ; ophu o sachaduru onwiya asacha be ee-bufu l'echilabo ndu Izurelu; kele o merwuwaru ulo Chipfu. Eshinu e te pheaduru iya mini, eegudeje asafu nemadzu nturuwuu be o bu onye aaso nsọ. ²¹ Ono bu ekemu, a-duru phe nu jasuru asuru. Onye ono, bu iya epheje mini ono, eegudeje asafu nemadzu nturuwuu ono be a-sakwapho uwe iya asasa. Onye meru ẹka ẹ mini ono, eegudeje asafu nturuwuu ono be a-buru onye aaso nsọ jeye l'uzenyashi mboku

ono. ²² Iphe, onye aasọ nsọ denyiru ẹka bẹ a tūrwwaru atūrwu; onye denyiru ẹka l'iphe ọbu bẹ aa-nọdu asọ nsọ jasụ l'ụzenyashi mbọku ono.”

20

Anwuhu Miriyamu

¹ Tobudu iya bụ; o rwua l'ọnwa mbụ l'apha; ndu Ízurelu l'ophu jerwua echięgu Zinu. Ẹphe nọshia lẹ Kadęshi. Miriyamu nọdu l'ẹka ono nwuhu; e lia ya l'ẹka onokwaphọ.

Mini, shi lẹ mkpuma

² Teke ono bẹ mini ta adudu k'ophu ndu Ízurelu a-ngụ; ẹphe kpakọ onwophẹ tsoahaa Mosisu yẹle Erọnu opfu. ³ Ẹphe wata abarụ Mosisu mba sụ: “O gege akaru anyi ree; ọ bụ l'anyi nwushihuru teke phọ ndibe anyi phẹ nwushihuru l'iphu Chipfu phọ. ⁴ ?Bụ gụnu meru g'o gude i chita anyibe ndu kẹ Chipfu bya awushi l'echięgu l'ẹka-a g'anyi l'iphe-edobe anyi nwushihu? ⁵ ?Bụ gụnu meru g'o gude i dufuta anyi l'alị Ijiputu bya eduru dobe lẹ mkpọkoro ẹka-a, ta adudu ereshi, dụ iya nụ; ophu oshi figu adudu iya; ophu vayinu adudu iya; ophu oshi itorokuma adudu iya; ophu ọ dudu mini, anyi a-ngụ, dụ iya nụ?” ⁶ Tobudu iya bụ; Mosisu yẹle Erọnu lufu l'ẹka ono, ndu Ízurelu dọru ono tųgbua jeshia l'ọnu ụlo-ẹkwa-ndzuko je adaa; kpupyabęchaa iphu l'alị. O-gbu-nwịinwii kẹ Chipfu nwuaru phẹ kẹ phoo.

7 Chipfu sù Mósísu: 8 “Wota mgboro phọ gẹ gu lẹ nwune ngu Erọnu chikobe ndu Ízurelu. Pfulu yeru mkpuma ono l'eka ephe ele ngu enya gẹ mini shi iya sofuta. Noo uto, ii-shi mee gẹ mkpuma ono sofutaru phe mini bu ono; k'ophu ndu Ízurelu me iphe-edobe phe a-ngu mini.” 9 Tọbudu iya bu; Mósísu bya ewota mgboro ono l'ataphu Chipfu l'eka ono gude tugbua; gẹ Chipfu suru iya g'o mee ya.

10 Mósísu yele Erọnu bya achikobe ndu Ízurelu l'iphu mkpuma ono. Mósísu su phe: “Unu ngabe nchi nta-a unube ndu okwefurike ono. ?Bu g'anyi kuta mini le mkpuma-a nu unu to?” 11 Oo ya bu; Mósísu halia eka iya imeli byia mgboro ono ugbo labo l'eli mkpuma ono. Mini shi le mkpuma ono nwushihu; ndu Ízurelu; me iphe-edobe phe nga ya.

12 Tọbudu iya bu; Chipfu su Mósísu yele Erọnu: “Eshi ophu unu te kwetaduru nkemu; ophu unu emeduru mu gẹ mu du nsọ l'enya ndu Ízurelu be unu te edurwuakwa ndu-a ali ono, mu nuru phe ono.”

13 Owana bu mini Meriba, bu iya bu “uswo”; kele oo l'eka ono be ndu Ízurelu no tsoo Chipfu uswo; Chipfu goshi phe le ya du nsọ.

Ndu Edomu ajika gẹ ndu Ízurelu ta aghatashi l'ali phe

14 Mósísu bya eshi le Kadashi zia ozi g'e je zia eze ndu Edomu su: “Owaa bu iphe, Ízurelu, bu nwune ngu pfuru: Unu mawaru egube iphe-ehuka, byapfutaru anyi g'o ha. 15 Unu

mawaru gẹ nna anyi oche pẹ gude chiru anyi laa alì Ijiputu; je ebua ẹka ono nọo ọdu. Ndu Ijiputu kpa a nna anyi pẹ ono ẹhu shii; bya akpakwaapho anyibedua. ¹⁶ Obenu lẹ teke anyi rakuru Chipfu bẹ ọ nọmaru olu anyi; bya ezia ojozi; ọ bya edufuta anyi lẹ Ijiputu. Nta-a bẹ anyi nọwa lẹ Kadeshi, bu mkpukpu, unu l'ephe maru oke alì. ¹⁷ Jiko unu hanaa g'anyi shia alì unu ghata. Anyi te eshidu ẹgu unu aghata; ọzoo ẹka unu gbaru opfu-vayinu; ọphu ọ dudu welu unu, anyi bya l'e-kuta mini ngua. Anyi e-tsoerupho oma oji unu ogologo ghata. Anyi ta abyadu a-swiba aswiba l'uzo ẹkutara; ọzoo l'uzo ẹkicha jasụ anyi aghatakota l'alì unu."

¹⁸ Ọle eze ndu Edomu yeri iya ọnu sụ: "Unu ta aghatakwa l'alì anyi; ọ dudu bẹ mu e-gudekwa ogu-echi byapfuta unu ogu."

¹⁹ Ndu Ízurelu sụ iya: "Anyi e-tsoerupho oma oji ghata. Ọ -buru l'anyi nguru mini unu; ọzoo l'ọo iphe-edobe anyi nguru mini unu; anyi apfua unu ugwo iya. Unu haarọ g'anyi gude ọkpa ghata; ọ tọ dukwa iphe ọzo."

²⁰ Ọle eze ndu Edomu bẹ suru g'ephe ta aghatashi. Ọo ya bu; ndu Edomu chita ikpoto unwoke pẹ, bu ndu ọkphehu du jepfushia ndu Ízurelu ogu. ²¹ Ọ buru iya bu lẹ ndu Edomu ajika gẹ ndu Ízurelu ta aghatashi. Ephe dakobe shia ibiya ọzo.

Anwuhu Erọnu

²² Ndu Ízurelu l'ophu wu-lihu lẹ Kadeshi dzebe; jasụ ephe jerwua l'úbvú Họru. ²³ Ọ buru l'úbvú Họru ono, nọ-kube oke alì Edomu ono

bẹ Chipfu nọ sù Mósísu yẹle Erọnu: ²⁴ “Erọnu bẹ abya anwùhu lapfu ndiche ya phẹ. O too jerwudu alì ono, mu nuru ndu Ízurèlu ono; kèle unu kwefuru ike l'ekemu, mu tũru lẹ kẹ mini Meriba. ²⁵ Duta Erọnu yẹle Eleyaza, bụ nwa iya g'unu nyihu eli úbvú Họru; ²⁶ l'i yeshia Erọnu uwe iya woru yee Eleyaza, bụ nwa iya; noo kèle Erọnu a-nọdu l'ẹka ono nwùhu lapfu ndiche ya phẹ.” ²⁷ Mósísu mee iphe, Chipfu sùru g'o mee. Ndu Ízurèlu nọdu ele phẹ ẹnya; ẹphe nyihu eli úbvú Họru ono. ²⁸ Mósísu yeshia Erọnu uwe iya woru yee Eleyaza, bụ nwa iya. Erọnu nwùhu l'eli úbvú l'ẹka ono. Mósísu yẹle Eleyaza shi l'eli úbvú ono nyizeta. ²⁹ Ndu Ízurèlu l'ophu hụmaepfo lẹ Erọnu bẹ nwùhuwaru nù; iphe, bụ ndu Ízurèlu l'ophu rakọta ẹkwa iya ụkporo abalì l'abalì iri.

21

Ndu Ízurèlu alwụ-kpe ndu Aradu

¹ O be teke onye Kénanu, bụ eze ndu Aradu; mbụ onye ono, bu l'echiegu ndọhali ono nọmaru lẹ ndu Ízurèlu bẹ shi l'uzo Atarimu abya; o je etsoo ndu Ízurèlu ogu; kputa ndu ophu o kputaru lẹ ndzụ. ² Ndu Ízurèlu ribuaru Chipfu nte sù: “Ọ -buru l'ii-woru ndu-a yee anyi l'ẹka bẹ anyi e-woru mkpụkpu phẹ g'ọ ha mebyishikọta.” ³ Chipfu ngaberu ndu Ízurèlu nchị l'olu; bya eworu ndu Kénanu ye phẹ l'ẹka. Ẹphe mee ndu ono; mẹ mkpụkpu phẹ omeliwe; mbụ ẹphe

bukotaru mkpurupyata. Oo ya bu; e kuahaa eka ono Homa, bu iya bu “mkpurupyata”.

Agwo, e meru l'ope

⁴ Ndu Ízurelu bya eshi l'úbvú Hõru tugbua; ephe tsoru uto, laru Eze-enyimu Uswe-uswe; k'ophu ephe e-shi nno jee ali Edõmu mgburugburu. Ephe jenya l'uto ono; ophu ephe aduhedu ike takõta nshi. ⁵ Ephe wata epfutõshi Chileke yele Mõsisu su: “?Bu gunu kparu iphe, unu dufutaru anyi le Ijiputu bya awushi l'echiegu-a g'anyi nwushihu? Eka nri ta adudu! Ophu mini adudu iya! Njo nri-a, anyi tsoru eriphe-a be tuhukwaru anyi ayi!” ⁶ Tõbudu iya bu; Chipfu bya achiru ejo agwo yeru ndu Ízurelu ono. Agwo ono wata phe atagbushi. O tagbua ndu dukpoo igwerigwe. ⁷ Ndu Ízurelu byapfuta Mõsisu bya asu iya: “Anyi mewaru iphe-eji; kele anyi pfutõshiwaru Chipfu; waa gubedua. Pfunuru nu Chipfu; k'ophu oo-wofuru anyi agwo ono.” Oo ya bu; Mõsisu bya eworu opfu ehu ndu Ízurelu ono pfuru nu Chipfu. ⁸ Chipfu su Mõsisu: “Meta ejo agwo dobe l'eli itso lanu; k'ophu bu onye agwo pho -taru eru; l'o lee ya enya; dzuru ndzu.” ⁹ Oo ya bu; Mõsisu gude onyirubvu meta agwo bya atukobe iya l'eli itso lanu. O nodu abujeru; onye agwo taru; o -lewa enya l'agwo ono, e meru l'ope ono; l'oo-dzuru ndzu.

Ndu Ízurelu eje ala Mõwabu

¹⁰ Ndu Ízurelu bya atugbua; rwua Obotu; ephe kpõbe ulo-ekwa phe. ¹¹ Ephe gbẽ le Obotu tugbua; je akpõbe ulo-ekwa phe le Iye-Abarimu

l'echiègu ono, nọ chebe iphu lẹ Mówabu l'uzo ẹnyanwu-awawa ono. ¹² Ẹphe shi l'ẹka ono tųgbua bya erwua nsuda Zẹredu; bya akpọbe ọlọ-ẹkwa phẹ l'ẹka ono. ¹³ Ẹphe shikwaphọ l'ẹka ono tųgbua je akpọbe ọlọ-ẹkwa phẹ l'azọ ẹnyimu Anọnu azọ iya ọphuu; ẹka ono, nọ l'echiègu, nọ kpaa l'oke alị ndu Amọru; noo kele ọọ ẹnyimu Anọnu bu oke alị ndu Mówabu; mbu nọkaharu ndu Mówabu ẹphe lẹ ndu Amọru. ¹⁴ Ọo ya meru g'ọ gude e pfua l'ẹkwo, e deru k'ògù, Chipfu lwuru sụ: “Mkpukpu Wahebu ono, du lẹ Sufa; yele nsuda nsuda ẹnyimu Anọnu; ¹⁵ me lẹ mkpo-ze mkpo-ze ono, du lẹ nsuda nsuda, nọ je akpaa lẹ mkpukpu Aru; bya anọdu nno jasụ l'oke alị ndu Mówabu.”

¹⁶ Ẹphe gbalihu l'ẹka ono kwaseru jerwua Biye, bu iya bu wẹlu ono, Chipfu suru Mosisu: “Chikobe ndu Ízurelu l'ẹka lanu ge mu nu phẹ mini g'ẹphe nua.” ¹⁷ Tọbudu iya bu; ndu Ízurelu gua ebvu-a sụ:

“Nwufuta mini; gube wẹlu!

G'a guru ebvu nu iya.

¹⁸ Ọo ndu-ishi bvuru wẹlu ono;

mbu l'ọọ ndu a maru ẹpha phẹ lẹ Ízurelu be turu iya nu.

Ọ buru mgboro ndu eze; me mgboro ndu a maru ẹpha phẹ

be ẹphe gude bvua ya.”

Tọbudu iya bu; ẹphe shi l'echiègu jeshia Matana; ¹⁹ shi lẹ Matana lufu lẹ Nahalelu; shi lẹ Nahalelu lufu lẹ Bamotu; ²⁰ shi lẹ Bamotu lufu lẹ

nsuda, nọ l'alì Mówabu lẹ mgboru úbvú Pisiga, bu ẹka aagbeje ele alì, dabyiru mgbegere.

*Ízurelu alwu-kpe Sihonu,
bu eze ndu Amoru
(Dit 2:26-37)*

²¹ Tọbodu iya bu; ndu Ízurelu zia ozi g'e je zia Sihonu, bu eze ndu Amoru su: ²² “G'anyi ghatanu l'alì unu. Anyi ta aswibakwa l'egu unu; ophu anyi ta aswibadu l'opfu-vayinu unu. Ophu o dudu welu unu, anyi bya l'e-kuta mini ngua; oo epho oma oji be anyi e-toru jasụ anyi aghatagbua l'alì unu.” ²³ Obenu lẹ Sihonu te ekwedu ge ndu Ízurelu ghata l'alì iya. O chikobe ndu nkiya g'ephe ha; ephe jepfushia ndu Ízurelu ogu l'echiegu. Ephe rwuepho mkpukpu Jiahazu; ephe datso ndu Ízurelu ogu l'eka ono. ²⁴ Ndu Ízurelu gude ogu-echi sua phe pyaapya; nata phe alì phe ono; shita l'enyimu Anonu je akpaa l'enyimu Jiaboku; jeyewaruro l'alì ndu Anonu; oke alì ndu Anonu be a kpuru igbulọ mgburugburu; o shihu ike. ²⁵ Ndu Ízurelu lwutakota mkpukpu ndu Amoru g'o ha; buchikota iya; lwutachaa mkpukpu Heshibonu; me mkpukpu, no-pheru iya mgburugburu. ²⁶ Heshibonu be bu mkpukpu Sihonu, eze ndu Amoru. Yele onye shi buru eze ndu Mówabu lwujeru ogu; Sihonu lwutakota alì iya je akpaa l'enyimu Anonu. ²⁷ Oo ya meru g'o gude ndu akàkà ebvu nodu aguje su: “Bya mkpukpu Heshibonu; g'a kpụ-phu iya azu; mbu g'a kpụ-phu mkpukpu Sihonu azu; kpu ya g'o shihu ike.

28 Noo kele oku shi le Heshibonu kpufu;
mbu l'ire-oku shi le mkpukpu Sihonu kpufu.
O tsuwaru mkpukpu Aru ke ndu Mowabu;
mbu ndu nwe ubvu, dugbaa le mgboru
enyimu Anonu.

29 Nshio unube ndu Mowabu!
E mebyishiwaru unu; unube ndu anoduje agwa
agwa Kemoshi!

Unwegirima unu unwoke be o mewaru;
ephe gbalakota lashia ali ozo.

Unwegirima unu unwanyi be o mewaru;
ephe buwaru ndu a kpuru le ndzu
nu Sihonu, bu eze ndu Amoru.

30 Anyi kwatsuwaru phe.

Mkpukpu Heshibonu buwaa mkpurupyata je
akpaa le mkpukpu Dibonu.

Anyi gwewaru phe arakabya jasu le mkpukpu
Nofa;
mbu je akpaa le mkpukpu Medeba.”

*Ízurelu alwu-kpe Ogu,
bu eze Beshanu
(Dit 3:1-11)*

31 Tobudu iya bu; ndu Ízurelu buru l'ali ndu
Amoru. 32 Mosisu bya ezia ndu e-je anwua ngge
le mkpukpu Jiaza; ephe jechaepho; ndu Ízurelu
je alwua mkpukpu, du iya nu; chikashia ndu
Amoru, shi buru l'eka ono.

33 Oo ya bu; ndu Ízurelu ghakobe shia uzo
ophu shiru jeshia ali Beshanu. Ogu, bu eze ndu
Beshanu chita ndu nkiya g'ephe ha jepfushia phe
ogu le mkpukpu Edereyi.

³⁴ Chipfu sù Mósísu: “Ta tsukwa iya ebvu; noo kele mu wowaru iya ye ngu l'eka; mē ndu nkiya; waa alì iya. Mekwaa ya iphe, i meru Sihonu, bu eze, bu lē Heshibonu buru onye-ishi ndu Amoru.” ³⁵ No iya; ndu Ízurelu gbua Ogu; gbushia unwegirima iya; mē ndu nkiya g'ephe ha; k'ophu bụ l'ọ tọ dudu onye phoduru nù l'ime phe. Ndu Ízurelu nata alì iya nworu.

22

Belaku ezi g'e je ekua Belamu

¹ Ndu Ízurelu bya atugbua jerwua phorokoto alì ndu Mówabu; ephe kpobe ulo-ekwa phe l'aguga enyimu Jiordanu, nọ chebe iphu lē mkpukpu Jieriko.

² Belaku nwa Zipo huma iphemiphe, ndu Ízurelu meru ndu Amoru. ³ Ndzụ-agugu rwuta ndu Mówabu kele ndu Ízurelu dū igwerigwe. Ndzụ ndu Ízurelu gushiahaa ndu Mówabu ike.

⁴ Ndu Mówabu jepfu ndu bụ ogerenya ndu Midiyanu je asụ phe: “Nta bē ikpoto ndu Ízurelu-a a-tuko iphe, bụ ndu gbaru anyi mgburugburu lwukota g'eswi, atukoje eswa, nọ l'egu lwukota-a.” Teke ono bē bụ Belaku nwa Zipo bē bụ eze ndu Mówabu. ⁵ O bya ezia g'e je ekua Belamu nwa Beyo, bụ onye nọ lē mkpukpu Petọ l'alì Amawu, dū lē mgboru enyimu Yufurétisu. Iphe, Belaku ziru iya bụ: “O nweru ndu shi l'alì Ijiputu futa; bya atuko mgboko l'ophu dzuru. Nta-a bē ephe noakwa mu lē mgboru. ⁶ Iphe, mu arwo ngu nta-a bukwa g'i bya atuaru mu ndu ono onu;

noo kele ephe ka mu okpehu. ?A maru; mu alwu-kpe phe; chia phe l'ali-a? Noo kele mu maru l'onye i goru onu-oma nu be buwaa onye a goru onu-oma nu; onye i turu onu buwaru onye a turu onu."

⁷ Oo ya bu; ndu bu ogerenya ndu Mówabu; me ndu bu ogerenya ndu Midiyanu gude ugwo, aapfuje g'a gbaa eja tugbua jepfushia Belamu; je ezia ya ozi, Belaku ziru iya ono. ⁸ Belamu su phe: "Unu kwaa l'eka-a l'enyashi-a k'ophu mu a-karu unu iphe, Chipfu e-pfuru yeru mu." Oo ya bu; Belamu yele ndu-ishi Mówabu ono toko nodu.

⁹ Chileke bya abyapfuta Belamu bya ajia ya su: "?Bu ndu ole be gu l'ephe no ono?"

¹⁰ Belamu su Chileke: "o kwa Belaku nwa Zipo, bu eze ndu Mówabu be ziru phe ozi g'ephe bya asu mu ¹¹ l'o nweru ndu shi l'ali Ijiputu futa bya atuko mgboko l'ophu dzuru. L'oo ge mu bya aturu iya ndu ono onu; g'a maru ?Ya a-lwu-kpee phe? chishia phe l'ali phe."

¹² Chileke su Belamu: "Te etsokwa phe je; ta tukwa ndu ono onu; kele ephe bukwa ndu a goru onu-oma nu."

¹³ O -rwua l'utsu iya; Belamu futa bya epfuaru ndu-ishi ono, ejeru Belaku ozi; su phe: "Unu lashia ali unu le Chipfu te ekwedu ge mu tsoru unu je." ¹⁴ Oo ya bu; ndu-ishi Mówabu ono tugbua lashia je asu Belaku le Belamu jikakwaru le ya te etsoduru phe.

¹⁵ Belaku bya ezikwaa ndu-ishi ozo, kaba igwerigwe; mbu ndu a ka akwabe ubvu eme le ndu ke mbu pho. ¹⁶ Ephe byapfuta Belamu bya asu iya: "Waa iphe, Belaku nwa Zipo pfuru baa:

'Jiko g'ò tọ ɖukwa iphe, ii-kwe g'ò kpòshia ngu abya ibe mu. ¹⁷ Noo kẹle mu a-kwabẹ ngu ùbvù, parù ẹka; bya emeeru ngu iphe, ì sùru gẹ mu meeru ngu. Jiko byanù atọaru mu ndu-a ọnu.' "

¹⁸ Belamu sù ndu-ozi Belaku ono: "O -betakpọ Belaku je a-nù mu ọlo iya ono, mkpọla-ododo waa mkpọla-ọchaa jiru ejiji ono; bẹ mu te emeghatadu iphe, Chipfu, bụ Chileke mu pfuru. Mu te ewofudu iya iphe; ọphu mu te eyekwadu iya iphe. ¹⁹ Jiko unu kwakwaaphọ akwakwa l'ẹka-a l'enyashi-a gẹ mu maru mẹ o -nweru iphe, Chipfu e-pfubaa yeru mu."

²⁰ Chileke bya abyapfuta Belamu l'enyashi bya asù iya: "O -bùru l'ọo oku bẹ ndu-a byaru ngu ekuku; gbalihu tsoru pẹ; ọle ọo iphe, mu sùru g'ì mee bẹ ii-me kpoloko."

Nkapfù-ìgara Belamu epfu opfu

²¹ Belamu bya agbalihu l'utsu dozia nkapfù-ìgara iya tsoru ndu-ishi Mówabu ono; ẹphe tųgbua. ²² Ọle ẹhu ghuru Chileke egbu shii g'ò tųgburu jeshia ono. Ojozi Chipfu je apfuru kwachia ya ọzo. Teke ono bẹ Belamu nọ l'eli nkapfù-ìgara iya agba eje; yẹle ndu-ozi iya ọmadzu labọ swìru. ²³ Nkapfù-ìgara ono hùmaepfo ojozi Chipfu ono g'ò pfuru l'ọzo; mifuta ogu-echi iya gude l'ẹka; ọ haa ọzo swìba l'ẹgbudu. Belamu chiahaa nkapfù-ìgara ono iphe g'ò gọ-zia ya g'ò laphu azù l'ọzo. ²⁴ Ojozi Chipfu ono je apfuru l'owere ọzo, nọ lẹ mgbaka opfu-vayinu labọ, igbulọ nọchaa ibekẹboebo. ²⁵ Tọbudu iya bụ; nkapfù-ìgara ono hùmaepfo ojozi Chipfu ono; o je akwaa onwiya l'igbulọ ono;

woru Belamu ọkpa hua l'igbulọ ono. Belamu chikwaa ya iphe ọzo. ²⁶ Ojozi Chipfu ono bya atugbukwa je apfuru l'ẹka dụ kparagu. Ẹka ono te nwedu ọzo, ee-shi swia ẹkutara; ọzo swia ẹkicha. ²⁷ Nkapfu-igara ono humaepho ojozi Chipfu ono; ọ nmakpuru lẹ mkpula Belamu; ẹhu ghuahaa Belamu eghu; o chiahaa ya mgboro iya. ²⁸ Chipfu kuhaa nkapfu-igara ono ọnu; o pfuru opfu yeru Belamu sụ: “?Bụ gunu bẹ mu meru ngu; meru g'ọ gude i nọdu echi mu ẹgube ono? Ọwaa kweakwa ugbo ẹto, i chiru mu iphe-a?”

²⁹ Belamu sụ nkapfu-igara ono: “Iphe, mu gude echi ngu ẹgube ono bụ l'iime mu sukusuku. Ọ -bụ lẹ mu gude ogu-echi l'ẹka bẹ mu eworu ngu gbua nta-a.”

³⁰ Nkapfu-igara ono sụ Belamu: “?Mu ta abudu nkapfu-igara, i nwe enwenwe tọ? I shi-hawaa gbata mu byasụ ntanụ-a. ?Mu mejewaru ngu ẹgube-a?”

Belamu sụ iya: “Waawaa.”

³¹ Noo ya; Chipfu bya emee g'ẹnya sahu Belamu; ọ huma ojozi Chipfu ono g'ọ pfuru l'uzo; mifuta ogu-echi iya parụ l'ẹka. Belamu phozeta ishi ephozeta; bya adaa kpube iphu l'alị. ³² Ojozi Chipfu ono jia ya sụ: “?Bụ gunu meru iphe, i chiru nkapfu-igara ngu iphe ugbo ẹto-a? Mu byaru gẹ mu kwachia ngu ọzo; noo kele ọzo, i phoberu bẹ dụ gbajogbajogbajo l'ẹnya nkemu. ³³ Ugbo ẹto bẹ nkapfu-igara-a humaru mu; bya agbangochaa mu. Ọ -bụ l'ọ tọ gbango mu; mẹ mu asuwaa ngu pyaapya; haa yẹbedua g'ọ nọdu ndzụ.”

³⁴ Belamu sù ojosi Chipfu ono: “Mu mewaru iphe-eji; kele mu ta amadù l'i pfulu kwachia mu uto. Oo ya bu; o -buru l'o to dudu ngu ree ge mu je; mu a-laphu azu.”

³⁵ Ojosi Chipfu ono sù Belamu: “Tsoruro ndu ono jeshia; ole oo g'o bukwaru iphe, mu suru g'i pfua be ii-pfu kpurumu.” Oo ya bu; Belamu yele ndu-ishi ono, ejeru Belaku ozi ono tugbua; o buru phe ejeje.

Belamu no l'ibe Belaku

³⁶ Belaku numaepho le Belamu abyawaa; o lufu jeshia ya ndzuta le mkpukpu, no l'ali Mowabu l'oke enyimu Anonu; mbu l'ime ime eka oke ali ono beru. ³⁷ Belaku su Belamu: “Mu ziru ozi, du oku-oku g'a bya ekua ngu g'i bya. ? Buhunu gunu meru iphe, i ti byakebeduru? ?Bu le mu ta adudu ike akwabe ngu ubvu to?”

³⁸ Belamu su Belaku: “O du ree; mu byawaru. Ole o bu; ?o dahunuru iphe, mu adu ike epfu; abuedupho opfu, Chileke yeru mu l'onu ge mu pfua.” ³⁹ Oo ya bu; Belamu tsoru Belaku; ephe jeshia Kiriyatu-Huzotu. ⁴⁰ Belaku gbushia eswi me aturu gude gwee ngweja; bya aharu nu Belamu yele ndu-ishi ono, ye ya tuko swiru ono.

Opfu mbu, Belamu nataru l'eka Chipfu

⁴¹ O be l'utsu echele iya; Belaku duta Belamu; ephe tugbua jeshia Bamotu-Belu; Belamu gbé l'eka ono haru huma ndu Izurelu.

23

¹ Belamu sù Belaku: “Kpùaru mu òru-ngweja ọ̀zọ̀ ẹ̀saa. L'ì kpùtaru mu oke-eswi ẹ̀saa; waa ebili ẹ̀saa.”

² Belaku bya emee gẹ̀ Belamu pfuru. Belaku yẹ̀le Belamu gbua oke-eswi; mẹ̀ ebili ono nanù nanù l'òru-ngweja ono. ³ Belamu sù Belaku: “Pfurù lẹ̀ mgboru ngweja-akpọ̀-ọ̀ku ono gẹ̀ mu kpìribeeshikwaru. G'a maru; ?Chipfu abyapfuta mu? Iphe, bukpo iphe, o goshiru mu bẹ̀ mu a-kòru ngu-a.” Ọ̀ tųgbua jeshia l'eli nwubvu, adudu iphe, dų iya nų. ⁴ Chileke byapfuta Belamu. Belamu sù Chileke: “Mu doziwaru òru-ngweja ọ̀zọ̀ ẹ̀saa; mu gbuwa oke-eswi yẹ̀le ebili nanù nanù l'òru-ngweja ono ẹ̀phe n'ẹ̀saa.”

⁵ Tọ̀bodu iya bų; Chipfu ye Belamu opfu l'ònu sù iya: “Laphu azų jepfu Belaku je ezia ya ozi-a.”

⁶ O jepfushia Belaku; bya ahuma iya g'ọ̀ pfuru lẹ̀ mgboru ngweja-akpọ̀-ọ̀ku ono; yẹ̀le ndu-ishi Mówabu g'ẹ̀phe ha.

⁷ Belamu pfuahaa sù:

“Belaku bẹ̀ byaru eduta mu l'alì Arámu.

Eze ndu Mówabu bya eduta mu l'úbvú úbvú ọ̀zọ̀ ẹ̀nyanwu-awawa.

Ọ̀ sùru gẹ̀ mu bya atųaru iya ọ̀nwu Jíékọ̀pu ọ̀nu; gẹ̀ mu bya epfubyia ọ̀nwu Ízurelu.

⁸ ?Dẹ̀nu gẹ̀ mu e-shi bya eworu ọ̀nu tųa ndu Chileke atųduru ọ̀nu?

?Dẹ̀nu gẹ̀ mu e-shi pfubyia ndu Chipfu te epfubyiduru?

⁹ Ọ̀o l'eli eze mkpuma bẹ̀ mu anọ̀duje huma phẹ̀. Ọ̀ bųru l'eli úbvú bẹ̀ mu anọ̀duje ele phẹ̀ ẹ̀nya;

mbu ndu ono, bu iche ono, adudu ndu ephe
l'ephe buru eghirigha ono.

Ephe ta agujeduru onwophe yeru ohozo.

¹⁰ ?Bụ onye bẹ a-dụ ike guta unwu Jiékpọ l'ogu;
mbu ndu ha g'urwuku, nọ l'alì.

Mbụ-a; ?bụ onye a-dụ ike guta nkeru-eno unwu
Ízurelu l'ogu?

Gẹ mu nwuhukwa anwuhu onye pfulerekoto!

Gẹ mu lakwaa gẹ ndu pfulerekoto larụ!"

¹¹ Belaku sụ Belamu: " ?Bụ gụnu bẹ i meru mu
egube ono? Mu sụru ngu g'ì bya atua ndu ohogu
mu onu; o gbẹ buru onu-oma bẹ i goru nụ phẹ!"

¹² Belamu sụ: " ?Bụ gẹ mu te epfushi iphe,
Chipfu yeru mu l'onu gẹ mu pfua?"

Opfu k'ẹbo, Belamu nataru l'eka Chipfu

¹³ Belaku sụ Belamu: "Tsoru mu g'anyi je l'eka
ozo, ii-nodu huma phẹ. Oo ahara bẹ ii-haru phẹ
huma; i tii huma-gbudu phẹ g'ephe ha. Gbẹ
l'eka ono tataru mu phẹ onu." ¹⁴ Belaku duta
Belamu; ephe jeshia l'egu mkpukpu Zofimu, nọ
l'eli úbvú Pisiga; o kpua oru-ngweja uzo esaa.
Ephe gbushia oke-eswi yele ebili nanu nanu
l'oru-ngweja ono.

¹⁵ Belamu sụ Belaku: "Pfulwaru le mgboru
ngweja-akpo-oku ono gẹ mu jepfu Chipfu l'eka
pho."

¹⁶ Chipfu byapfuta Belamu; bya eye iya opfu
l'onu sụ iya: "Jepfu Belaku ozo je ezia ya ozi-
a." ¹⁷ Belamu bya ejepfu Belaku; huma iya
g'o pfuru le mgboru ngweja-akpo-oku ono; yele
ndu-ishi Mówabu, yee ya tuko nodu. Belaku sụ

Belamu: “?Bụ ụ́nu bẹ́ Chipfu pfuru?” ¹⁸ Belamu pfushiahaa sụ:

“Gụbe Belaku; gbalihu agbalihu ngabẹ́ nchị!

Nụma iphe, mu epfu; gụbe nwa Zipo.

¹⁹ Chileke ta abụkwa nemadzu; k’ọ́phu ọ́-bya adzụaha ụ́ka.

Ọ́phu ọ́ bụ́du nwa ndiphe; kẹ́ g’ọ́ gbanwee uche iya.

?O pfujewaru opfu; ọ́phu o medụ́ru g’o pfuru?

?O kwejeru ukwe-iphe; g’o to medzu ukwe-iphe ọ́bu?

²⁰ Sụ-a; ekemu, mu nataru bụ́kwa gẹ́ mu ọ́oru ndu ono ọ́nu-ọ́ma.

Chileke ọ́waru ọ́nu-ọ́ma nụ́ phẹ́.

Ọ́phu mu ta a-dụ́kwa ike agbanwe iya.

²¹ Ọ́ tọ́ dudu ejo-iphe, e levuru l’ẹ́hu ụ́nwu Jiékpọ́.

Ọ́phu ọ́ dudu iphe, ta adudu ree, ọ́ hụ́maru l’ẹ́hu ụ́nwu Ízurelu.

Chipfu, bụ́ Chileke phẹ́ swiru phẹ́ ọ́kpobe eswiru.

Ẹ́phe anọ́duje atụ́ ụ́zu l’ọ́ bụ́ eze phẹ́.

²² Chileke bẹ́ dufutaru phẹ́ l’alị́ Ijiputu; bya emee phẹ́; ẹ́phe nweru ọ́kpẹ́hu g’atsụ́.

²³ A ta abyadu egude oswe keta ụ́nwu Jiékpọ́.

Ọ́phu a byadu e-shi l’ọ́mamanshi mekata ụ́nwu Ízurelu.

Nta-a bẹ́ ee-pfu opfu ẹ́hu ụ́nwu Jiékpọ́;

pfua opfu ẹ́hu ụ́nwu Ízurelu sụ́:

‘Lewarọ́ iphe, Chileke megbaberu!’

²⁴ Sụ-a; ndu Ízurelu angụ́-lihuje gẹ́ ne oduma.

Ẹ́phe anọ́duje ebu nggada g’oduma;

mbụ oduma, ta azejedu azeè jasụ l'ọ
labushia anụ eriri iya;

mbụ jasụ l'ọ ngụ mee-ìphe, o guderu."

²⁵ Ọo ya bụ; Belaku sụ Belamu: "Ta atụekwa
phẹ ọnu ilile; ọphụ ì gọekwaru phẹ ọnu-ọma
ililekpọo!"

²⁶ Belamu sụ Belaku: "?Mu te epfuduru ngu
l'ọ iphe, Chipfu pfuru bẹ mu e-me?"

Opfu k'eto, Belamu nataru l'eka Chipfu

²⁷ Tọbudu iya bụ; Belaku sụ Belamu: "Bya
gẹ mu duru ngu je ẹka ọzo. ?G'a maru ọ-dụ
Chileke ree g'ì gbẹ l'eka ono tųaru mu phẹ ọnu?"

²⁸ Belaku duta Belamu; ephe nyihu ọnonu úbvú
Peyọ; mbụ úbvú ono, nọ chebe iphu l'ali, dabyiru
mgbegere. ²⁹ Belamu sụ Belaku: "Kpųaru mu
ọru-ngweja ọzo ẹsaa l'eka-a; l'ì kpųtaru mu oke-
eswi ẹsaa waa ebili ẹsaa." ³⁰ Belaku mee ya gẹ
Belamu sųru g'o mee ya. Ephe gbua oke-eswi
ono yele ebili ono nanụ nanụ l'ọru-ngweja ono.

24

¹ Belamu bya ahụmaepho l'ìphe, dų Chipfu ree
bụ g'a gọru ọnu-ọma nụ ndu Ízurelu; ọphụ o to
jeeduru l'aji ẹgube oojegehawa. Iphe, o meru
bụ l'o woru iphu ghaa l'uzo echiegu. ² Belamu
bya apalia ẹnya imeli hụma ndu Ízurelu g'ephe
kpọbegbaaru ọlo-ekwa phẹ l'ipfu l'ipfu. Unme
Chileke bya iya l'ẹhu; ³ o pfushiahaa sụ:

"Waa iphe, Belamu nwa Beyọ epfu.

Ọ kwa opfu, onye ono, e meru; ẹnya sahu ono
epfu.

- 4 Opfu, onye anụmaje opfu, shi l'ọnu Chileke epfu;
mbụ onye ono, ahụmaje iphe, Ọkalibe-kangokotaru-nụ egoshi; daa kpurumu kpupyabẹ iphu;
onye ono, e meru; ẹnya dụ sarịmu ono.
- 5 Ẹgube g'ulo-ekwa ngu amabe mma; gube Jiékpọ;
mbụ ẹka gube Ízurelu bukpo ebubu!
- 6 Ọo gẹ nsuda nsuda aduje-a bụ g'ọ sụsaru asusa.
Ọ dụ gẹ mgbabu, a gbaru l'aguga ẹnimu.
Ọ dụ g'oshi alowe, Chipfu yeru l'onwiya;
bya adụ g'oshi sida, bvuru l'aguga ẹnimu.
- 7 Mini e-shije l'ite-mini Ízurelu asoshihu asoshihu.
Oshilokpa phẹ bẹ e-nweru mini nweru k'etsutsu iya.
Eze phẹ bẹ a-ka eze Agagu shii.
Alị-eze phẹ bẹ aa-pali eli.
- 8 Chileke dufutaru phẹ l'alị Ijiputu;
bya emee phẹ; ẹphe nweru okpehu g'atsụ.
Ẹphe a-lwucha ohamoha, ẹphe dụ ashị;
mbụ kupyashia okpu phẹ yogiri yogiri.
Ẹphe e-gude arwa phẹ nmafushia phẹ ẹpho.
- 9 Ízurelu bẹ nmakpuru anmakpuru; bya azẹe l'alị g'oduma.
Ẹphe dụ gẹ ne oduma; ?bụ onye a-dụ ike kpatsu phẹ?
G'iphe, bụ ndu gọru unwu Ízurelu ọnu-oma bukwaru ndu a gọru ọnu-oma nụ.
G'iphe, bụ ndu turu unu ọnu bukwaru ndu a turu ọnu.”

10 Tòbodu iya bụ; Belamu mee; ẹhu ghushiaha Belaku egbu ike. Ọ kua ẹka kpa; bya asu Belamu: “Nta-a bẹ mu kuru ngu g’i bya aturu mu ndu ohogu onu; ọ bụ-chiaru onu-oma bẹ i gocharu nụ phẹ ugbo ẹto-a. 11 Ngwa; keta ọso tughua lashia ibe ngu ẹgwewa! Mu shi ria kẹ gẹ mu kwabẹ ngu ùbvù, paru ẹka; obenu lẹ Chipfu bẹ nafuwaru ngu ùbvù ọbu.”

12 Belamu sụ Belaku: “?Mu te epfuduru iya ndu i ziru g’ephe bya ekua mu sụ: 13 ‘Obetakpo Belaku nụ mu ọlo iya ono, mkpola-ododo mẹ mkpola-ochaa jiru pyimu ono bẹ mu te emeghatakwa iphe, Chipfu suru gẹ mu mee; ọphu mu egudekwa uche k’onwomu eme iphe, dụ ree; ọzoo iphe, dụ ẹji. Ọo ẹpho iphe, Chipfu pfuru bẹ mu e-pfu.’ 14 Nta-a bẹ mu alawa; alapfu ndibe mu. Ọle-a; byakwa gẹ mu nmaaru ngu ọkwa; gẹ mu pfuaru ngu iphe, ndu-a e-mechaa mee ndibe unu lẹ teke dụ l’iphu.”

Opfu k’eno, Belamu nataru l’eka Chipfu

15 Ọo ya bụ; Belamu pfuahaa sụ:
“Waa iphe, Belamu nwa Beyo epfu.
Ọ kwa opfu, onye ono, e meru; ẹnya sahu ono epfu.

16 Opfu, onye anumaje opfu, shi l’onu Chileke epfu;
mbu onye ono, maru iphe, shi Ọkalibe-kakota-shii l’eka;
onye ono, ahumaje iphe, Ọkalibe-kangokotaru-nu egoshi; daa kpurumu kpupyabẹ iphu;
onye ono, e meru; ẹnya dụ sarimu ono.

- 17 Mu hūmaru onye ono; ọle ọ tọ bụdu nta-a.
 Mu ele onye ọbu ọnya; ọle ọ tọ nọdu ntse.
 Kpokpode bẹ e-shi l'ọnulo Jiékpọpu futa.
 Mgboro-eze bẹ a-futa lẹ Ízurelu.
 Mówabu bẹ ọo-tụko egedegge ọnu-iphu gwee
 arakabya.
 L'ọo-tụko unwu Sheti l'ophu mebyishikọta.
- 18 Ndu Edomu bẹ aa-lwuta l'ogu.
 Nokwaphọ g'aa-lwuta ndu Siye, bụ ndu ọhogu
 Ízurelu.
- Obenu lẹ ndu Ízurelu bẹ a-nọdu aka ike eje.
- 19 Onye-ishi bẹ e-shi l'ọnulo Jiékpọpu futa;
 bya emebyishia ndu ọphu phoduru nụ lẹ
 mkpukpu ono.”
- 20 Belamu bya elee ndu Amaleku ọnya bya asụ:
 “Ndu Amaleku bẹ bụ ivuzọ l'echilabọ ọhamoha;
 obenu l'ephe a-buru mkpurupyata l'ikpazu.”
- 21 O bya elee ndu Kenu ọnya bya asụ:
 “Eka unubẹ ndu Kenu bu ebubu bẹ e meru; o
 shihu kẹ dngudungu.
- Nwamkpu, unu turu bẹ unu turu l'eli mkpuma.
- 22 Ọle unubẹ ndu Kenu bẹ aa-lwukwa alwulwu.
 Ndu Asiriya bẹ a-kpuko unu lẹ ndzu.”
- 23 Tọbudu iya bụ; o pfua sụ:
 “Oowaa! ?Bụ onye a-nọdu ndzụ lẹ teke Chileke
 a-nọdu eme iphe ono?”
- 24 Ugbomini e-shi aguga ọnyimu l'alị Kitimu
 bya;
 bya emekpa ndu Asiriya yele ndu Eba ẹhu;
 obenu l'ephebedua bẹ a-bukwarupho
 mkpurupyata.”

²⁵ Tobudu iya bu; Belamu pfuchaa nno bya agbalihu; o buru iya ala ibe iya; Belaku tugbukwapho lashia.

25

Ndu Mówabu eduswe ndu Ízurelu ụzo

¹ A nonyae pho lẹ teke ono, ndu Ízurelu bu lẹ nsuda Shitimu ono; ephe l'unwada ndu Mówabu wata apharwushi onwophe. ² Unwanyi Mówabu ono wata eku ndu Ízurelu ono g'ephe tsoru phe je agwa agwa phe. Ndu Ízurelu nodu erije iphe, e shiru l'agwa ono; bya abaarụ agwa ndu Mówabu ono eja. ³ No iya; ndu Ízurelu woru onwophe tugbabe l'agwa Balụ-Peyo. Eshi nno; ndu Ízurelu kpatsu Chipfu ehu-eghu. ⁴ Chipfu bya asụ Mosisu: "Chitakota ndu-ishi ndu Ízurelu l'ophu megbushia l'atati phu mu; gbaa phe l'anwu; k'ophu mu e-wofu ehu-eghu mu, ata pfupfupfu l'ehu ndu Ízurelu." ⁵ Oo ya bu; Mosisu su ndu ogbo-ikpe ndu Ízurelu: "G'onyenonu lẹ g'unu ha l'ehu l'ehu gbushia ndu nkiya, bu ndu woru onwophe tugbabe l'agwa Balụ-Peyo."

⁶ Ndu Ízurelu dokwaduru-a l'onu ụlo-ekwandzuko aragbaa ekwa. A bya ele enya; onye lanu l'unwu Ízurelu duwaru nwanyị Midiyanu bahu ibe iya l'eka Mosisu phe tukoru ele iya enya; me ndu Ízurelu l'ophu. ⁷ Finehasu nwa Eleyaza; mbu nwanwa Eronu, bu onye uke Chileke humaepho iphe ono; o kwoli hu l'eka ono, igwe-oha ono kuru ono; je aduchata arwa

iya. ⁸ O tsopyabẹ nwoke Ízurelu ono bahu l'ime ụlo iya; je eworu arwa ono nmaa ya l'eli nwanyị ono; o shi l'ẹka a nmaru iya nwoke foo ke nwanyị ono l'ẹpho; nkephẹ bvụ. Oo ya bu; ejo iphememe ono haa ndu Ízurelu. ⁹ Olee ndu ejo iphememe ono gburu egbugbu be du ukporo unu nemadzu ugbo eto.

¹⁰ Chipfu su Mosisu: ¹¹ “Finehasu nwa Eleyaza; mbu nwanwa Eronu, bu onye uke Chileke be mewaru ophu ehu-eghu ndu Ízurelu adueduru mu. Noo kele o wotaru okophoo, mu gege ekoru ndu Ízurelu kooru phe; shi nno mee ophu mu egudeedu okophoo mu ono mee ge ndu Ízurelu laa l'iyi. ¹² Oo ya bu le-a; su iya le mu l'iya nowaa l'ogbandzu ehu-guu. ¹³ Ogbandzu ono a-buru nkiya waa k'awa iya phe, bu ndu ophu etso iya etsotso. Ogbandzu ono be bu l'ephe a-buru uke jaswaruroya; kele o gude iswi ehu Chileke iya koo okophoo; mbu shi nno pfa ugwo iphe-eji, ndu Ízurelu meru.”

¹⁴ Epha nwoke Ízurelu ono, e gburu yele nwanyị Midiyanu ono be bu Zimiri nwa Salu. Nna iya, bu Salu be bu onye-ishi l'enya-unuphu, no l'ipfu Simiyonu. ¹⁵ Epha ke nwanyị Midiyanu ono, e gbukwarupho ono bu Kozubi nwada Zuru. Nna iya, bu Zuru be bu onye-ishi l'enya-unuphu ndu Midiyanu.

¹⁶ Chipfu bya asu Mosisu: ¹⁷ “Buru ohogu ndu Midiyanu; woru phe gbushia. ¹⁸ Noo kele ephe gude eregede buru ohogu unu; deru unu ye l'agwa agwa Balu-Peyo ono; waa le ke Kozubi, bu nwada onye-ishi ndu Midiyanu; mbu nwune ndu

Midiyanu kẹ nwanyi, bu onye ono, e gburu teke ono, kẹ Peyọ meru; ejo iphe-ememe bya ono.”

26

Agu ndu Ízurelu ogu k'ugbo labo

¹ O be g'ejo iphe-ememe ono lachaaru; Chipfu bya epfuru Mósísu yẹle Eleyaza nwa Erọnu, bu onye uke Chileke sụ: ² “Unu gụa ndu Ízurelu l'ophu ogu l'ẹnya-unuphu l'ẹnya-unuphu; e - shi lẹ ndu nọwaru ụkporo apha kwasẹru; mbụ ndu sụwaru eje ogu lẹ Ízurelu.” ³ O buru lẹ baswaa alị Mówabu, nọ l'aguga ẹnyimu Jíódanu lẹ mgboru mkpụkpu Jieriko bẹ Mósísu yẹle Eleyaza, bu onye uke Chileke nọ pfuaru ndu Ízurelu sụ: ⁴ “Unu gụa ndu Ízurelu l'ophu ogu; e - shi lẹ ndu nọwaru ụkporo apha kwasẹru; mbụ ẹgube ono, Chipfu turu iya Mósísu l'ekemu.”

Waa ndu Ízurelu, shi l'alị Ijiputu futa baa:

⁵ Ndu bu oshilọkpa Rúbenu, bu ọkpara Ízurelu bu: Hanọku, onye metaru ipfu Hanọku; mẹ Palu, onye metaru ipfu Palu; ⁶ mẹ Hezuronu, onye metaru ipfu Hezuronu; mẹ Kami, onye metaru ipfu Kami. ⁷ Ipfu ono g'ẹphe ha tukuru buru oshilọkpa Rúbenu. Ndu ophu a guru ogu bẹ dụ ụkporo unu nemadzu ugbo ise l'unu tete l'ụkporo umadzu ishii l'umadzu iri. ⁸ Nwa Palu kẹ nwoke bu Eliyabu. ⁹ Unwu kẹ Eliyabu unwoke buru: Nemelu; mẹ Detanu; waa Abiramu. Oo Detanu waa Abiramu-a bẹ a hotajeru g'ẹphe buru ishi lẹ Ízurelu; ẹphe tsoru ndu kẹ Kora kwefuru Mósísu yẹle Erọnu ike; mbụ teke ono,

ẹphe kwefujeru Chipfu ike phọ. ¹⁰ Alì saa ọnu tũko ẹphe lẹ Kora lwekọta; ndu shi etso iya nũ bẹ nwũshihuru nũ; mbũ lẹ teke ono ọku kegbushijeru ụkporo ụmadzu iri l'ẹbo l'ụmadzu iri phọ. Iphe ono bũru iphe alọ ẹka lẹ nchị.

¹¹ Ọle ụnwu Kora ta anwũshihuduru.

¹² Ndu bũ oshilọkpa Simiyọnu l'ipfu l'ipfu pẹ bũ: Nemelu, onye metaru ipfu Nemelu; mẹ Jiaminu, onye metaru ipfu Jiaminu; mẹ Jiakinu, onye metaru ipfu Jiakinu; ¹³ mẹ Zera, onye metaru ipfu Zera; mẹ Shawulu, onye metaru ipfu Shawulu. ¹⁴ Ipfu ono bẹ tũkoru bũru oshilọkpa Simiyọnu. Ndu ọphu a gũru ọgu bẹ dũ ụkporo ụnu nemadzu ugbo labọ l'ụnu iri l'ise l'ụkporo ụmadzu iri.

¹⁵ Ndu ọphu bũ oshilọkpa Gadu l'ipfu l'ipfu pẹ bũ: Zefonu, onye metaru ipfu Zefonu; mẹ Hagi, onye metaru ipfu Hagi; mẹ Shuni, onye metaru ipfu Shuni; ¹⁶ mẹ Ozuni, onye metaru ipfu Ozuni; mẹ Eri, onye metaru ipfu Eri; ¹⁷ mẹ Arodi, onye metaru ipfu Arodi; waa Areli, onye metaru ipfu Areli. ¹⁸ Ipfu ono bẹ tũkoru bũru oshilọkpa Gadu. Ndu ọphu a gũru ọgu bẹ dũ ụkporo ụnu nemadzu ugbo ise l'ụnu nemadzu; l'ụmadzu ụkporo ise.

¹⁹ Jiuda bẹ nwũtaru unwoke labọ, ẹpha pẹ bũ Ẹru; waa Ọnanu. Ọle ẹphenebo nwũshihuru l'alì Kėnanu. ²⁰ Ndu bũ oshilọkpa Jiuda l'ipfu l'ipfu pẹ bũ: Shela, onye metaru ipfu Shela; mẹ Pėrezu, onye metaru ipfu Pėrezu; mẹ Zera, onye metaru ipfu Zera. ²¹ Ụnwu kẹ Pėrezu bũ: Hẹzuronu, onye metaru ipfu Hẹzuronu; waa Hamulu, onye metaru ipfu Hamulu. ²² Ipfu ono

bẹ tukuru buru oshilokpa Jiuda. Ndu ophu a guru ogu bẹ dụ ukporo unu nemadzu ugbo tete l'unu iri le nanu l'ukporo umadzu ise.

²³ Ndu bu oshilokpa Isaka l'ipfu l'ipfu phe bu: Tola, onye metaru ipfu Tola; me Puwa, onye metaru ipfu Puwa; ²⁴ me Jiashubu, onye metaru ipfu Jiashubu; waa Shimuronu, onye metaru ipfu Shimuronu. ²⁵ Ipfu ono bẹ tukuru buru oshilokpa Isaka. Ndu ophu a guru ogu bẹ dụ ukporo unu nemadzu ugbo esato l'ukporo umadzu iri l'ise.

²⁶ Ndu bu oshilokpa Zebulun l'ipfu l'ipfu phe bu: Seredu, onye metaru ipfu Seredu; me Elonu, onye metaru ipfu Elonu; waa Jiahulelu, onye metaru ipfu Jiahulelu. ²⁷ Ipfu ono bẹ tukuru buru oshilokpa Zebulun. Ndu ophu a guru ogu bẹ dụ ukporo unu nemadzu ugbo esaa l'unu iri le nanu l'ukporo umadzu ise.

²⁸ Ndu bu oshilokpa Jiosesu l'ipfu l'ipfu phe bu: Manase; waa Ifuremu.

²⁹ Unwu ke Manase bu: Makiya, onye metaru ipfu Makiya. Makiya bu nna Giladu. Giladu meta ipfu Giladu. ³⁰ Unwu Giladu bu: Iyeza, onye metaru ipfu Iyeza; me Heleku, onye metaru ipfu Heleku; ³¹ me Asurelu, onye metaru ipfu Asurelu; me Shekemu, onye metaru ipfu Shekemu; ³² me Shemida, onye metaru ipfu Shemida; waa Hefa, onye metaru ipfu Hefa. ³³ Zelofehadu, bu nwa Hefa bẹ ta nwutaduru unwoke. Oo unwanyi bẹ o nwushiru. Epha unwanyi ono, o nwushiru ono bu Mahula; me Nuwa; me Hogula; me Milika; waa Tiza. ³⁴ Ipfu ono tukuru buru oshilokpa Manase. Ndu ophu

a gūru oḡu dū ũkporo ũnu nemadzū ugbo ishii l'ūnu iri lẹ nanū l'ũkporo ũmadzu iri l'ise.

³⁵ Ũnwu ke Ifuremu l'ipfu l'ipfu p̄he b̄u: Shutela, onye metaru ipfu Shutela; m̄e Beka, onye metaru ipfu Beka; waa Tahanu, onye metaru ipfu Tahanu. ³⁶ Ũnwu Shutela b̄u Eranu, onye metaru ipfu Eranu. ³⁷ Ipfu ono b̄e t̄ukoru b̄uru oshil̄okpa Ifuremu. Ndu ōphu a gūru oḡu b̄e dū ũkporo ũnu nemadzū ugbo ẹno l'ūnu nemadzū l'ũkporo ũmadzu ise.

Ndu ono b̄e t̄ukoru b̄uru oshil̄okpa Jiósefu l'ipfu l'ipfu p̄he.

³⁸ Ndu b̄u oshil̄okpa Benjaminu b̄u: Bela, onye metaru ipfu Bela; m̄e Ashibelu, onye metaru ipfu Ashibelu; m̄e Ahiramu, onye metaru ipfu Ahiramu; ³⁹ m̄e Shefufamu, onye metaru ipfu Shefufamu; waa Hufama, onye metaru ipfu Hufamu. ⁴⁰ Ũnwu Bela b̄u: Ar̄udu; m̄e Nemanu. Ar̄udu, b̄u iya metaru ipfu Ar̄udu; Nemanu b̄uru iya metaru ipfu Nemanu. ⁴¹ Ndu ono b̄e t̄ukoru b̄uru oshil̄okpa Benjaminu l'ipfu l'ipfu p̄he. Ndu ōphu a gūru oḡu b̄e dū ũkporo ũnu nemadzū ugbo ise l'ūnu ũmadzu iri l'ẹno.

⁴² Ndu b̄u oshil̄okpa Danu l'ipfu l'ipfu p̄he b̄u: Shuhamu, onye metaru ipfu Shuhamu. Ndu ono b̄e t̄ukoru b̄uru oshil̄okpa Danu l'ipfu l'ipfu p̄he. ⁴³ Ẹphe t̄ukoru b̄uru ipfu Shuhamu. Ndu ōphu a gūru oḡu b̄e dū ũkporo ũnu nemadzū ẹsato l'ūnu nemadzū lanū.

⁴⁴ Ndu b̄u oshil̄okpa Asha b̄u: Imuna, onye metaru ipfu Imuna; m̄e Ishivi, onye metaru

ipfu Ishivi; waa Beraya, onye metaru ipfu Beraya. ⁴⁵ Ụnwu Beraya bụ: Heba, onye metaru ipfu Heba; waa Malukelu, onye metaru ipfu Malukelu. ⁴⁶ Ọ bụru nwa nwanị lanu bẹ Asha nwutaru; epha iya bụ Sera. ⁴⁷ Ndu ono bẹ tukuru bụru oshilokpa Asha. Ndu ophu a guru ogu bẹ du unu ukporo ugbo ishii l'unu iri l'eto l'ukporo umadzu iri.

⁴⁸ Ndu bụ oshilokpa Nafutali l'ipfu l'ipfu phe bụ: Jiahuzelu, onye metaru ipfu Jiahuzelu; me Guni, onye metaru ipfu Guni; ⁴⁹ me Jieza, onye metaru ipfu Jieza; waa Shilemu, onye metaru ipfu Shilemu. ⁵⁰ Ndu ono bẹ tukuru bụru oshilokpa Nafutali l'ipfu l'ipfu phe. Ndu ophu a guru ogu bẹ du ukporo unu nemadzu ugbo ise l'unu iri l'eto l'ukporo umadzu iri.

⁵¹ Noo ya; iphe, ndu Izurelu tukuru du bụru ukporo unu nemadzu ugbo ukporo eto l'ukporo unu ugbo iri l'ise l'unu nemadzu eno l'ukporo umadzu ishii l'umadzu iri.

Ndu Izurelu awa alị ono, ephe eje eburu ono

⁵² Chipfu su Mosisu: ⁵³ “Oo ndu-a bẹ aawashiru alị ono g'ọ bụru okiphe, ephe ketaru. Ndu nonu e-keta oke le g'ephe ha teke a guru phe ogu. ⁵⁴ Ndu ha shii bẹ ii-we alị, ha shii; ndu ophu ha nwanshii; wee phe alị, ha nwanshii. Ndu ophu nonu e-keta oke le g'ephe ha teke a guru phe ogu. ⁵⁵ Alị ono bẹ bu ido bẹ aa-tu gude washia ya. Aa-wa iya l'ipfu l'ipfu; ipfu nonu l'o keta oke iya nkephe. ⁵⁶ Ọ bụru ido bẹ aa-tu gude washiaru ndu ophu ha shii; me ndu ophu ha nwanshii alị ono.”

Agú eri Lívayi ọgu

⁵⁷ Waa oshilọkpa Lívayi baa; waa g'e gude gụa phẹ ọgu l'ipfu l'ipfu: Geshonu, onye metaru ipfu Geshonu; mẹ Kohatu, onye metaru ipfu Kohatu; waa Merari, onye metaru ipfu Merari. ⁵⁸ Ipfu-a bẹ bukwapfo oshilọkpa Lívayi: Ipfu Libuni; mẹ ipfu Hẹburonu; mẹ ipfu Mahuli; mẹ ipfu Mushi; mẹ ipfu Kora. Kohatu bụ nna Amuramu. ⁵⁹ Epha nyee Amaramu bẹ bụ Jiekobedu, bụ nwada Lívayi. Jiokebedu bụ nwa nwanyi, a nwuru Lívayi l'alị Ijiputu. Ndu ọ nwutaru Amuramu bụ Eronu; waa Mosisu; mẹ Miriyamu. Miriyamu buru nwune phẹ kẹ nwanyi. ⁶⁰ Eronu bụ nna Nadabu; mẹ Abihu; mẹ Eleyaza; waa Itama. ⁶¹ Nadabu yẹle Abihu bẹ nwuhuru lẹ teke ephe gude ọku, adudu nsọ kpọoru Chipfu ngweja ọku. ⁶² Ndu a guru ọgu l'eri Lívayi; mbụ unwoke phẹ, nọwaru shita l'ọnwa lanu kwaseru bẹ tukoru du ukporo unu nemadzu ugbo labo; l'unu umadzu iri l'esaa; l'ukporo umadzu iri. Ophu a guduru phẹ teke a guru ndu Izurelu ophuna; kele ephe te ketaduru oke l'echilabo ndu Izurelu.

⁶³ Ndu ono bẹ bụ ndu Mosisu yẹle Eleyaza, bụ onye uke Chileke guru ọgu; mbụ ndu ono, guru ndu Izurelu ọgu lẹ baswaa alị Mowabu l'aguga enyimu Jiordanu lẹ mgboru Jieriko. ⁶⁴ Ndu ono ta adudu g'ephe ha, yi lẹ ndu ophu Mosisu yẹle Eronu, bụ onye uke Chileke gujeru ọgu teke pho, ephe guru ndu Izurelu ọgu l'echiegu Sayinayi pho. ⁶⁵ Noo kele Chipfu suru ndu Izurelu ono l'ephe nwuhufutaje l'echiegu ono. O to dudu g'ọ ka mma l'ọo onye lanu, aphodu nu l'ime

ndu ono; a -gufuepho Kalẹbu nwa Jiefune; yele Jioshuwa nwa Nunu.

27

Oke alì unwada Zelofehadu

(Ógú 36:1-12)

¹ Tọbodu iya bụ; unwada Zelofehadu bya atuko je apfuru l'onu ọlo-ekwa-ndzuko. Zelofehadu l'onwiya bụ nwa Hefa; Hefa buru nwa ke Giladu; Giladu buru nwa ke Makiya; Makiya buru nwa ke Manáse. G'ephe ha bukota os-hilokpa Manáse. Manáse buru nwa ke Jiósefu. Epha unwada Zelofehadu ono bụ: Mahula; me Nuwa; me Hogula; me Milika; waa Tiza.

² Unwada Zelofehadu ono bya apfuru l'ataphu Mosisu; waa l'ataphu Eleyaza, bụ onye uke Chileke; me l'ataphu ndu-ishi; me l'ataphu ndu Ízurelu l'ophu l'onu ọlo-ekwa-ndzuko pfua-haa sụ: ³ “Nna anyi be nwuhuru l'echiegu. O le o to yikwa le ndu ono, chikoberu onwophe tsoo Chipfu opfu ono; mbu ndu ono, tsoru Kora ono. Nna anyi be bukpoephe iphe-eji, o metaru l'onwiya gburu iya; ophu o nwutaduru nwa nwoke. ⁴ ?Ee-gude kele nna anyi ta nwutaduru nwa-nwoke; epha iya echihu l'ipfu iya? G'a hekwa anyi oke l'echilabo ndibe nna anyi.”

⁵ Oo ya bụ; Mosisu wota opfu unwada Zelofehadu ono papfu Chipfu. ⁶ Chipfu sụ Mosisu: ⁷ “Unwada Zelofehadu pfuru iphe, gbaru nu. Unu shi l'oke alì ndu nna phe we phe alì; k'ophu ephe e-keta okiphe nna phe. ⁸ Pfuaru ndu Ízurelu; sụ phe-a: O -buru le nwoke be nwuhuru

nụ; ọphu ọ nwutaduru nwa-nwoke; g'e wotaję okiphe, rwuberu iya nụ woru nụ nwada iya. ⁹ Ọ -bụru l'onye ọbu ta nwutafudaru nwa-nwanyị; g'e wotaję okiphe, rwuberu iya nụ ọbu woru nụ unwune iya kę nwoke g'ọ bụru iphe phę. ¹⁰ Teke ọbu l'o to nwefuda unwune nwoke; g'e woru okiphe ono, rwuberu iya nụ woru nụ nwune nna iya phę kę nwoke g'ọ bụru iphe phę. ¹¹ Ọ -bụru lę nna, nwuru onye ọbu te nwedu unwune nwoke; g'e woru okiphe, rwuberu iya nụ ọbu nụ ndu ęphe l'iya bụ ọkpobe abubu g'ọ bụru iphe phę. Iphe ono bụ omelali, a tọru ọkpa iya doberu ndu Ízurelu; ęgube Chipfu turu iya Mósisu l'ekemu.”

Jioshuwa anọ-chi ęnya Mósisu

(Dit 31:1-8)

¹² Tọbudu iya bụ; Chipfu sụ Mósisu: “Nyihu eli úbvú Abarimu-a je anọdu hụmakota alị ono, mu nuru ndu Ízurelu ono. ¹³ I -hụmachae ya phọ bę ii-nwuhu lapfushia ndibe unu; ęgube ono nwune ngu nwoke, bụ Erọnu nwuhuru. ¹⁴ Iphe, kparu iya nụ bụ l'unu kwefuru ike l'opfu mu lę teke ono, ndu Ízurelu gujeru aphụ lę mgboru mini ono, dụ l'echięgu Zinu ono. Ọphu unu adudu ike dobe mu nsọ l'iphu phę.” (Mini ono bụ mini Meriba, dụ lę Kadęshi lę mgbęgu Zinu.)

¹⁵ Mósisu sụ Chipfu: ¹⁶ “Gę Chipfu; mbụ Chileke ọphu gude ndzụ onyemonye họta nụ onye a-nọdu edu ndu Ízurelu. ¹⁷ Onye e-vutajęru phę ọzo l'ejeje mę l'alwalwa; mbụ onye a-nọdu edu phę eje ejeje alwa alwalwa; gę ndibe gube Chipfu ta adushi g'aturu, te enwedu onye eche iya nụ.”

¹⁸ Ọo ya bụ; Chipfu sụ Mósísu: “Duta Jioshuwa nwa Nunu, bụ onye Unme ke mụbe Chipfu bu l'ẹhu; byabẹ iya ẹka l'ishi. ¹⁹ Duru iya g'o je apfuru l'ataphu Eleyaza, bụ onye uke Chileke; mę l'ataphu ndu Ízurelu l'ophu; g'ị nọdu l'ataphu ndu ono woru ozi ono ye iya l'ẹka. ²⁰ Haru ike nkengu ye iya l'ẹka; k'ophu iphe, bụ Ízurelu l'ophu a-nọduje eme iphe, ọ sụru g'ẹphe mee. ²¹ Ge Jioshuwa pfuru l'ataphu Eleyaza, bụ onye uke Chileke. Eleyaza egude ido, urimu jee l'iphu Chipfu je ajia Chipfu g'ọ maru g'o pfuru opfu ẹhu iya. Ọ bụru iphe, Jioshuwa sụru ge ndu Ízurelu mee be ẹphe a-tụkoje mee. Ọ -sụ ge ndu Ízurelu tųgbua; ẹphe atųgbua; ọ -sụ g'ẹphe bata; yele ẹphe a-tụko bata.”

²² Mósísu mee ge Chipfu pfuru iya. O duta Jioshuwa pfube l'ataphu Eleyaza, bụ onye uke Chileke; mę l'ataphu edzudzu-ọha Ízurelu. ²³ Ọo ya bụ; o byibe Jioshuwa ẹka l'ishi woru ozi ono ye iya l'ẹka bụ iphe, Chipfu shi l'ọnu Mósísu pfua.

28

Ngweja, eegweje mbokumboku (Awu 29:38-46)

¹ Chipfu sụ Mósísu: ² “Turu ekemu nụ ndu Ízurelu; sụ phẹ: Unu leta ẹnya nuje mu ngweja, rwuberu mu nụ; mbụ nri, e gude egweru mu ngweja; mbụ ngweja ono, a kpọru ọku, mkpọ iya dụ mu ree. Unu nuje mu iya le teke bụ orwuberu iya. ³ Sụ phẹ le-a: ‘Waa ngweja, a kpọru ọku,

unu e-gweje nù Chipfu baa: unwu ebili labọ, gbachaaru apha; ophu 'adudu ẹka iphe mebyiru iya. Unu gweje iya mbokumboku; g'ọ buru ngweja-akpo-ọku, unu e-gweje tekenteke. ⁴ Unu gbuje ebili lanu l'utsu; unu egbua ebili lanu l'uzenyashi. ⁵ Unu yeje iya ngweja-nri gwee; mbu uzo lanu l'ime nkweka ukpokutu ereshi, e keru uzo iri; gwọ le manu, a tsuru l'ikwe; manu e-ji eze ekpemu. ⁶ Oo ya bu ngweja-akpo-ọku, eegweje mbokumboku, bu iya bu g'e meru iya dobe l'ubvu Sayinayi; mbu ngweja ono, a kporu oku, mkpo iya du Chipfu ree. ⁷ Unu -gbua ebili lanu; unu yekobe iya ngweja-mee gwee; mbu mee, jiru nkeru-eno otu-lupfu otumu. O buru l'eka-du-nsọ be unu a-gbashjeru Chipfu ngweja-mee ono; mbu mee, shihuru ike. ⁸ Unu egbufua ebili lanu l'uzenyashi; yekobekwa iya pho ngweja-nri; waa ngweja-mee egube ono, o du le k'utsu pho. Unu gwee ngweja ono; g'ọ buru ngweja, a kporu oku, mkpo iya du Chipfu ree.' "

Ngweja, eegweje l'eswe-atuta-unme

⁹ "A -bya l'eswe-atuta-unme; unu gbuje ebili labọ, gbachaaru apha, 'adudu ẹka iphe mebyiru iya; gude gwee ngweja. Unu egude uzo labọ l'ime nkweka ukpokutu ereshi, e keru uzo iri; gwọ le manu; gude gwee ngweja-nri. Unu yekobe iya ngweja-mee, ayijeru iya nu. ¹⁰ Ono bu ngweja-akpo-ọku, unu e-gweje l'eswe-atuta-unme; yekwaru ngweja-akpo-ọku, eegweje mbokumboku pho; ye le ngweja-mee, ayijeru iya nu."

Ngweja, eegweje l'onwa ophuu

11 “Mbọku mbu, ọnwa furu gẹdegede bẹ unu e-gwejeru Chipfu ngweja-akpo-ọku. Unu gudeje unwu oke-eswi labo; waa ebili lanu; me unwu ebili esaa, gbachaaru apha, adudu eka iphe mebyiru iya; gude gwee ngweja ono. 12 Unu -gbua oke-eswi ono nanu bẹ unu e-yekobeje iya ngweja-nri gwee; mbu ọzo eto l'ime nkweka ukpokutu ereshi, e keru ọzo iri; gwoo le manu. Unu -gbua ebili ono; unu yekobe iya ngweja-nri gwee; mbu ọzo labo l'ime nkweka ukpokutu ereshi, e keru ọzo iri; gwoo le manu. 13 Unu -gbua nwa ebili lanu; unu eyekobe iya ngweja-nri gwee; mbu ọzo lanu l'ime nkweka ukpokutu ereshi, e keru ọzo iri; gwoo le manu. Ono bu ngweja-akpo-ọku, mkpo iya du Chipfu ree; mbu ngweja, a kpọru ọku gweeru Chipfu. 14 Ngweja-mee, a-yijeru iya nu bu: unu -gbua oke-eswi; unu eyekobe iya mee, jiru nkeru-ẹbo ọtu-lupfu otumu. O -buru l'oo ebili; unu eyekobe iya mee, jiru nkereto ọtu-lupfu otumu gwee. Unu -gbua nwa ebili; unu eyekobe iya mee, jiru nkeru-eno ọtu-lupfu otumu gwee. Noo ke ngweja-akpo-ọku, unu e-gweje l'onwa l'onwa; mbu l'onwa, dukota l'ime apha. 15 Unu gbuje mkpi lanu gude gwee ngweja-iphe-eji nu Chipfu; a -gufukwa ngweja-akpo-ọku, eegweje mbokumboku; yele ngweja-mee, ayijeru iya nu.”

Ọbo Ojehata
(Uke 23:5-14)

16 Mbọku k'iri l'eno l'onwa mbu bẹ bu ọbo Ojehata ke Chipfu. 17 Mbọku k'iri l'ise l'onwa mbu ono bẹ bu ọbo-iphe. Ujiku esaa l'ophu

bẹ unu a-takọtaje buredi, te koduru ekoko. ¹⁸ Mbọku mbụ, unu wataru ọbo-iphe ono bẹ unu a-noje ndzuko, du nsọ. G'ọ tọ dukwa ozi, unu e-jeje mbọku ono l'ophu. ¹⁹ Sụ-a; unu gweje ngweja-akpo-ọku nu Chipfu. Unu gbua unwu oke-eswi labo; waa ebili lanu; me unwu ebili esaa, gbachaaru apha, adudu eka iphe mebyiru iya; gude gwee ya. ²⁰ Ngweja-nri bẹ unu e-gudeje ukpokutu ereshi, a gworu le manụ gwee. Oke-eswi lanu bu nkweka ukpokutu ereshi, e keru uzi iri bẹ unu e-yeje iya uzi lanu gude gwee ya. Teke o bu ebili ono; unu eworu ụzo labo l'ime nkweka ukpokutu ereshi, e keru ụzo iri; gwoo le manụ. ²¹ O buru ụzo lanu l'ime ụzo iri bẹ unu e-gweje l'ishi nwa ebili ono nanu nanu ephe n'esaa. ²² Unu e-gbukwapho mkpi lanu gude gwee ngweja-iphe-aji; shi nno pfua ugwo iphe-aji, unu meru.

²³ Unu a-tukoje ngweja ono gwekota; yekobe le ngweja-akpo-ọku ono, eegweje l'utsu, bu iya bu ngweja ono, eegweje mbokumboku. ²⁴ O buru egube ono bẹ unu a-noduje egwe ngweja ono mbokumboku abali esaa ono; g'ọ buru ngweja-nri, a kpuru oku; mkpo iya du Chipfu ree. Unu gweje ngweja ono; yekobefua le ngweja-akpo-ọku ono, unu egweje mbokumboku; me ngweja-me, ayijeru iya nu. ²⁵ O -rwua mboku k'esaa; unu anoo ndzuko, du nsọ. G'ọ tọ dukwa ozi, unu e-jeje le mboku ono l'ophu.

²⁶ Ọzo bụ; o -be mbọku, unu abọ ọbo-iphe k'akpuru-iphe-mbụ unu; unu nojee ndzuko, dụ nso. G'ọ tọ dukwa ozi, unu e-jeje mbọku ono l'ophu. Mbọku ono bẹ unu a-gbajẹ l'upfu-ọha k'ọbo Idzu. Ọ bụru mbọku ono bẹ unu a-nuje Chipfu akpuru-iphe ọphúú, unu metaru. ²⁷ Unu gwee ngweja-akpo-ọku; mbụ ngweja, mkpọ iya dụ Chipfu ree. Unu gbuje unwu oke-eswi labọ; waa ebili lanu; mẹ unwu-ebili ẹsaa, gbachaaaru apha; gude gwee ngweja ono. ²⁸ Ngweja-nri, ee-yekọbeje l'oke-eswi lanu bẹ bụ ọzo ẹto l'ime nkweka ukpokutu ereshi, e keru ọzo iri; gwọọ lẹ manụ. Teke ọ bụ ebili; unu yekọbe iya ọzo labọ l'ime nkweka ukpokutu ereshi, e keru ọzo iri; gwọọ lẹ manụ. ²⁹ Ọ bụru ọzo lanu l'ime nkweka ukpokutu ereshi, e keru ọzo iri; gwọọ lẹ manụ bẹ unu e-yekọbeje lẹ nwa ebili nanu nanu gwee ẹphe n'ẹsaa. ³⁰ Unu egbuje mkpi lanu gude pfaa ugwo iphe-ẹji, unu meru. ³¹ Unu tukoje ngweja ono g'ọ ha gwekotaje; yekoberu ngweja-akpo-ọku, unu egweje; mẹ ngweja-nri, ayijeru iya nu; mẹ ngweja-mee, ayijekwaru iya pho nu. Ọle ọo g'unu nwube ẹnya g'ọ tọ dukwa anu ono, a-duru ophu nweru ẹka iphe mebyiru iya.

29

Ọbo Apha-ọphúú (Uke 23:23-25)

¹ “Lẹ mbọku mbụ l'onwa ẹsaa bẹ unu a-noje ndzuko, dụ nso. G'ọ tọ dukwa ozi, unu e-jeje lẹ mbọku ono. Mbọku ono bụ mbọku,

unu e-gbuje opu. ² Unu egwee ngweja-akpo-oku; mbu ngweja, mkpo iya du Chipfu ree. Unu egbua nwa oke-eswi lanu; waa ebili lanu; me unwu-ebili esaa, gbacharu apha, adudu eka iphe mebyiru iya; gude gwee ngweja ono. ³ Ngweja-nri, ayijeru iya nu be bu ukpokutu ereshi, a gworu le manu. Oke-eswi ono be unu e-yekobeje uzo eto l'ime nkweka ukpokutu ereshi, e keru uzo iri gwoo le manu. Ebili ono be unu e-yekobeje uzo labo l'ime nkweka ukpokutu ereshi, e keru uzo iri gwoo le manu. ⁴ A -bya l'unwu-ebili esaa pho; nanu be unu e-yekobeje uzi lanu l'ime nkweka ukpokutu ereshi, e keru uzo iri gwoo le manu. ⁵ Unu egbua mkpi lanu gude gwee ngweja-iphe-eji; shi nno pfua ugwo iphe-eji, unu meshiru. ⁶ Unu a-tukoje ngweja ono g'o ha gwekota; yekoberu ngweja-akpo-oku pho, eegweje l'onwa l'onwa; me mbokumboku; yele ngweja-nri, ayijeru iya nu; me ngweja-mee, ayijekwaru iya pho ya; mbu g'a suru g'e meje iya; mbu ngweja ono, mkpo iya du ree, bu iya bu ngweja, a kporu oku nu Chipfu."

Eswe apfu ugwo iphe-eji
(Uke 16:1-34; 23:26-32)

⁷ "Su-a; le mboku k'iri l'onwa esaa ono be unu a-noje ndzuko, du nso. Mboku ono be unu a-swi egu; g'o to dukwa ozi, unu e-je mboku ono. ⁸ Unu egwee ngweja-akpo-oku nu Chipfu; mbu ngweja, mkpo iya du ree. Unu gbu nwa oke-eswi lanu; waa ebili lanu; me unwu-ebili esaa, gbacharu apha, adudu eka iphe mebyiru iya; gude gwee ngweja ono. ⁹ Ngweja-nri, a-yiru iya

nụ bụ ukpokutu ereshi, a gwọru lẹ manụ bẹ unu e-gudeje gwee ya. Oke-eswi ono bẹ unu e-yekọbeje ọzo ẹto l'ime nkweka ukpokutu ereshi, e keru uzi iri. Ebili ono bẹ unu e-yekọbeje ọzo labọ l'ime nkweka utu-ereshi, e keru ọzo iri. ¹⁰ A -bya l'unwu-ebili ẹsaa phọ; nanụ bẹ unu e-keje nkweka okpokutu ereshi ọzo iri; wota ọzo lanụ gude gwee ya. ¹¹ Unu egbua mkpi lanụ gude gwee ngweja-iphe-ẹji; a -gufukwa ngweja-iphe-ẹji, eegweje gude pfa ụgwọ iphe-ẹji; mẹ ngweja-akpo-ọku ono, eegweje mbokumboku ono; yele ngweja-nri, ayijeru iya nụ; mẹ ngweja-mẹe, ayijekwaru iya phọ nụ.”

Ọbo-Mkpì

(Uke 23:33-43; Dit 16:13-17)

¹² “Lẹ mbọku k'iri l'ise l'onwa ẹsaa bẹ unu a-noje ndzuko, dụ nsọ. G'ọ tọ dukwa ozi, unu e-jeje mbọku ono. Unu bọoru Chipfu ọbo-iphe abali ẹsaa. ¹³ Unu e-gwe ngweja-akpo-ọku; mbụ ngweja, a kporu ọku, mkpo iya dụ Chipfu ree. Unu egbua unwu oke-eswi iri l'ẹto; mẹ ebili labọ; waa unwu ebili iri l'ẹno, gbachaaru apha, adudu ẹka iphe mebyiru iya; gude gwee ngweja ono. ¹⁴ Ngweja-nri, a-yijeru iya nụ bụ ukpokutu ereshi, a gwọru lẹ manụ bẹ unu e-gudeje gwee ya. Unwu oke-eswi ono nanụ nanụ ẹphe n'iri l'ẹto bẹ unu e-yekọbeje ọzo ẹto l'ime nkweka ukpokutu ereshi, e keru ọzo iri; gwọ lẹ manụ. Ebili labọ phọ; nanụ iya bẹ unu e-yekọbeje ọzo labọ l'ime nkweka ukpokutu ereshi, e keru ọzo iri; gwọ lẹ manụ. ¹⁵ Unwu ebili iri l'ẹno phọ; nanụ nanụ bẹ unu e-yekọbeje ọzo lanụ l'ime

nkweka ukpokutu ereshi, e keru ọzo iri; gwoọ lẹ manu. ¹⁶ Unu egbua mkpi lanu gude gwee ngweja-iphe-ẹji; a -gufukwa ngweja-akpo-ọku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

¹⁷ “Su-a; le mboku k’ebo be unu e-gbu unwu oke-eswi iri l’ebo; me ebili labo; waa unwu ebili iri l’eno, gbacharu apha, adudu eka iphe mebyiru iya; gude gwee ngweja ono. ¹⁸ A bya l’unwu oke-eswi ono; yele ebili ono; me unwu ebili ono g’o ha; unu yekobeje iya ngweja-nri, ayijeru iya nu; me ngweja-mee, ayijekwaru iya pho nu; bu g’a suru g’e meje iya. ¹⁹ Unu egbua mkpi lanu gude gwee ngweja-iphe-ẹji; a -gufukwa ngweja-akpo-ọku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

²⁰ “Su-a; le mboku k’eto be unu e-gbu unwu oke-eswi iri le nanu; me ebili labo; me unwu ebili iri l’eno, gbacharu apha, adudu eka iphe mebyiru iya; gude gwee ngweja ono. ²¹ A bya l’unwu oke-eswi ono; yele ebili ono; me unwu ebili ono g’o ha; unu e-yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho nu; bu g’a suru g’e meje iya. ²² Unu egbua mkpi lanu gude gwee ngweja-iphe-ẹji; a -gufukwa ngweja-akpo-ọku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

²³ “Su-a; le mboku k’eno be unu e-gbu unwu oke-eswi iri; me ebili labo; me unwu ebili iri

l'eno, gbachaaru apha, adudu eka iphe mebyiru iya; gude gwee ngweja ono. ²⁴ A bya l'unwu oke-eswi ono; yele ebili ono; me unwu ebili ono g'ọ ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya; bu g'a suru g'e meje iya. ²⁵ Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

²⁶ "Su-a; le mboku k'ise be unu e-gbu unwu oke-eswi tete; me ebili labo; me unwu ebili iri l'eno, gbachaaru apha, adudu eka iphe mebyiru iya; gude gwee ngweja ono. ²⁷ A bya l'unwu oke-eswi ono; yele ebili ono; me unwu ebili ono g'ọ ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya, bu g'a suru g'e meje iya. ²⁸ Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho ya.

²⁹ "Su-a; le mboku k'ishii be unu e-gbu unwu oke-eswi esato; me ebili labo; me unwu ebili iri l'eno, gbachaaru apha, adudu eka iphe mebyiru iya; gude gwee ngweja ono. ³⁰ A bya l'unwu oke-eswi ono; yele ebili ono; me unwu ebili ono g'ọ ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya; bu g'a suru g'e meje iya. ³¹ Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje

mbòkumboku; yẹle ngweja-nri, ayijeru iya nù; mẹ ngweja-mẹe, ayijekwaru iya phọ nù.

³² “Sù-a; lẹ mbòku k'ẹsaa bẹ unu e-gbu unwu oke-eswi ẹsaa; mẹ ebili labọ; mẹ unwu ebili iri l'ẹno, gbachaaru apha, adudu ẹka iphe mebyiru iya; gude gwee ngweja ono. ³³ A bya l'unwu oke-eswi ono; yẹle ebili ono; mẹ unwu ebili ono g'ọ ha; unu yekọbeje iya ngweja-nri, ayijegbaaru iya nù; mẹ ngweja-mẹe, ayijegbakwaaru iya phọ ya, bụ g'a sùru g'e meje iya. ³⁴ Unu egbua mkpì lanù gude gwee ngweja-iphe-ẹji; a -gufukwa ngweja-akpọ-ọku ono, unu egweje mbòkumboku; yẹle ngweja-nri, ayijeru iya nù; mẹ ngweja-mẹe, ayijekwaru iya phọ ya.

³⁵ “Lẹ mbòku k'ẹsato bẹ unu a-noje ndzuko, dù nsọ. G'ọ tọ dukwa ozi, unu e-jeje lẹ mbòku ono. ³⁶ Unu egwee ngweja-akpọ-ọku; mbù ngweja, a kpọru ọku, mkpọ iya dù Chipfu ree. Unu egbua oke-eswi lanù; mẹ ebili lanù; mẹ unwu ebili ẹsaa, gbachaaru apha, adudu ẹka iphe mebyiru iya; gude gwee ngweja ono. ³⁷ A bya l'unwu oke-eswi ono; yẹle ebili ono; mẹ unwu ebili ono g'ọ ha; unu eyekọbeje iya ngweja-nri, ayijegbaaru iya nù; mẹ ngweja-mẹe, ayijegbakwaaru iya phọ nù; bụ g'a sùru g'e meje iya. ³⁸ Unu egbua mkpì lanù gude gwee ngweja-iphe-ẹji; a -gufukwa ngweja-akpọ-ọku ono, unu egweje mbòkumboku; yẹle ngweja-nri, ayijeru iya nù; mẹ ngweja-mẹe, ayijekwaru iya phọ nù.

³⁹ “Ngweja ono g'ọ ha bẹ unu e-gweje nù Chipfu lẹ teke unu abọ ọbo-iphe unu, gechaaru egeru; a -gufukwa iphe, unu kweru Chipfu ukwe

iya; mę iphe, unu tıru obu unu onyo l'unu l'anu Chipfu; mę ngweja-akpo-oku; mę ngweja-nri; mę ngweja-męe; męfua ngweja-ehu-guu.”
⁴⁰ Mósısu bya atuko ekemu ono, Chipfu tıshıru ye iya l'ęka ono pfukotaru ndu Ízurelu.

30

Ekwe Chipfu ukwe-iphe

¹ Mósısu bya epfuaru ndu-ıshi l'ıpfu l'ıpfu ndu Ízurelu; sı phę: “Waa iphe, Chipfu tıru l'ekemu baa: ² Nwoke -kweta Chipfu ukwe-iphe; ozoo l'o nweru iphe, o riburu nte iya lę ya te emedu; gę nwoke obu te emebyikwa opfu, o pfuru. G'o mekotakwa iphemiphe, shı iya l'onu futa.

³ “Teke nwamgboko, bukwadu l'ibe nna iya kweru Chipfu ukwe-iphe; ozoo l'o nweru iphe, o riburu nte iya lę ya te emedu; ⁴ nna iya -numa k'ukwe-iphe ono, o kweru ono; mę k'iphe ono, o riburu nte iya lę ya te emedu ono; ophu o dudu iphe, nna iya ono pfuru yeru iya; oo ya bu l'ukwe-iphe ono, o kweru ono e-keru; iphe ono, o riburu nte iya lę ya te emedu ono ekekwarupho.

⁵ Teke o bu lę nna iya numachaaru l'o kweru ukwe-iphe; bya anodu lę mboku ono, o numaru iya ono jika lę ya te ekwetaduru; oo ya bu l'o to dudu ukwe-iphe ono, o kweru ono; mę iphe ono, o riburu nte lę ya te emedu ono, duru ophu e-keru nu. Sı-a; Chipfu bę a-guru nwamgboko ono nvu; noo kele oo nna iya bę te kwetaduru g'o mee ya.

⁶ “Teke o bu lę nwamgboko ono bę kweaduru ukwe-iphe ono; teme o lua ji; mbu l'o nweru

iphe, o gudewaa ọnu iya ribua nte ẹ ya te emedu; ⁷ ji iya ono -nụma iya; ọphu ọ dudu iphe, o pfuru yeru iya ẹ mbọku ono, ọ nọmaru iya ono; ọo ya bụ l'ukwe-iphe ono, o kweru ono e-keru; iphe ono, o riburu nte ẹ ya te emedu ekekwarupho. ⁸ Ọle ọ -buru ẹ ji iya ono bẹ nụmachaaru l'o kweru ukwe-iphe; bya anọdu ẹ mbọku ono, ọ nọmaru iya ono jika ẹ ya te kwetaduru; ọo ya bụ l'ukwe-iphe ono, o kweru ono; mẹ iphe ono, o gudewa ọnu iya ribua nte ẹ ya te emedu ono te eveeduru ire; Chipfu aguru nwamgboko ono nvu.

⁹ “Nwanyị, ji iya anọedu ndzu; ọzoo nwanyị, ji iya chifuru achifu -kwee Chipfu ukwe-iphe; bẹ o mefutajekwa iphe ono, o kweru ukwe iya ono.

¹⁰ “Ọ -buru l'ọo nwanyị, nọ l'ibe ji iya bẹ kweru Chipfu ukwe-iphe; ọzoo l'o nweru iphe, o riburu nte ẹ ya te emedu; ¹¹ ji iya bya anụma iya; ọphu ọ dudu iphe, o pfuru yeru iya; mbụ ọphu ọ jikaduru; ọo ya bụ l'ukwe-iphe ono, nwanyị ono kweru ono e-keru; iphemiphe, o riru nte ẹ ya te emedu ekekwarupho. ¹² Ọle ọ -bukwanuru ẹ ji iya ono bẹ nọmaru iya nụ; bya anọdu ẹ mbọku ono, ọ nọmaru iya ono jika; sụ g'o to vushiru ire; bẹ iphemiphe, shi nwanyị ono l'ọnu futa l'ukwe-iphe ono, o kweru ono; mękpoo iphe ono, o riru nte ẹ ya te emedu ono te ekeeduru. Chipfu aguru nwanyị ono nvu; kele ọo ji iya bẹ suru g'o to vushiru ire. ¹³ Iphe, bukpo ukwe-iphe, nwanyị ono kweru; mẹ iphemiphe, o riburu nte ẹ ya te emedu bụ ji iya bẹ ọ dọ l'eka. Ji iya -sụ g'o keru; l'o keru; ọ -sụ g'o

to vushiru ire; o too vuduru ire. ¹⁴ O -bùru lẹ̀ jì iya bẹ̀ nùmacharu iya; ọ̀phu ọ̀ dudu iphe, oopfujeru yeru iya mbòkumboku; bẹ̀ ukwe, o kweru g'ò ha e-keru; iphemiphe, o riru nte lẹ̀ ya te emedu e-kekwarùpho. Jì nwanyị̀ onò bẹ̀ sùru g'ò keru; noo kele ọ̀ tọ̀ dudu iphe, o pfuru mbòku, ọ̀ nùmaru iya. ¹⁵ Olee ọ̀ -nùmachaa ya; bya emecha mee g'ò to vushiru ire; bẹ̀ oo-vuru ejo-iphe, nwanyị̀ onò gege evuru.”

¹⁶ Noo iphe, Chipfu tọ̀ru Mòsisu ọ̀kpa iya sù g'e tsoje g'ò dudu nwoke yee nyee ya; dudu nna yee nwa iya nwanyị̀; mbù nwamgbòko, bukwadu l'ibe nna iya.

31

Aagwata ndu Midiyanu ugwo iphe, ephe mejeru ndu Ízurelu

¹ Chipfu bya epfuaru Mòsisu sù: ² “Gwata ndu Midiyanu ugwo iphe onò, ephe mejeru ndu Ízurelu-a. I -gwatachae phe iya pho bẹ̀ ìi-nwuhu lapfu ndibe unu phe.”

³ Oo ya bu; Mòsisu sù ndu Ízurelu: “Unu haru kwaa onwunu ngwogu jepfu ndu Midiyanu ogu je agwataru Chipfu ugwo iphe onò, ephe mejeru ndu Ízurelu onò. ⁴ Ipfu, nonu lẹ̀ Ízurelu bẹ̀ unu a-hotà unu umadzu labo l'umadzu ukporo iri g'ephe je ogu onò.”

⁵ Noo ya; e shi l'ipfu, nonu lẹ̀ Ízurelu hotachaa unu nemadzu ugbo labo l'umadzu ukporo iri. O buru ukporo unu nemadzu l'unu nemadzu iri bẹ̀ bu ndu a hotakotaru; kwaa phe ngwogu. ⁶ Mòsisu zia phe g'ephe jeshia

ogú ono. Ipfu, nonu be hotaru unu nemadzu ugbo labo l'umadzu ukporo iri k'ogu ono. Epe le Finehasu nwa Eleyaza, bu onye uke Chileke swiru. Finehasu gude ivu, shi l'ulo Chipfu; me opu-ogu, eegudeje echi mkpu ogu. ⁷ Epe jepfushia ndu Midiyanu ogu egube Chipfu turu iya Mosisu l'ekemu; tuko iphe, bu unwoke ndu Midiyanu gbushikota. ⁸ Epe gbukwaapho ndu eze ise, bu ndu-ishi ndu Midiyanu; mbu Evi; me Rkemu; me Zuru; me Huru; me Reba; yekwaru ndu ozo, e gbukwarupho egbugbu. Epe gudekwapho ogu-echi gbua Belamu nwa Beyo.

⁹ Ndu Izurelu kpukota unwanyi ndu Midiyanu le ndzu; me unwegirima phe. Epe rwuta eswi phe; me eku phe; bya atuko iphe, epe nweru enwuru kwaa l'okwata; ¹⁰ bya atushia oku le mkpukpu eka ndu Midiyanu bukota; me eka epe kporo ulo-ekwa phe g'o ha. ¹¹ Epe rwutakota iphe, epe kwataru l'okwata; me iphe, epe lwutaru l'ogu; mbu nemadzu; mekpoo iphe-edobe. ¹² Epe chita ndu ono, epe lwutaru l'ogu ono; me ivu ono, epe vutaru; me iphe, epe kwataru l'okwata wolataru Mosisu yele Eleyaza, bu onye uke Chileke; mewaro ndu Izurelu l'ophu l'eka epe kporo ulo-ekwa phe le baswaa ali Mowabu l'aguga enyimu Jiodanu le mgboru mkpukpu Jieriko.

Ekemu, Mosisu turu teke ndu Izurelu shi ogu Midiyanu lwa

¹³ Tobudu iya bu; Mosisu; me Eleyaza, bu onye uke Chileke; me ndu-ishi ndu Izurelu l'ophu

wuru jeshia phẹ ndzuta l'azụ ẹka ono, ẹphe kpọberu ụlo-ẹkwa phẹ ono. ¹⁴ Ndu-ishi ndu ojọgu ono, shi l'ọgu lwa ono; mbụ ndu-ishi unu ndu ojọgu labọ l'ụkporo iri; yẹe ndu-ishi ndu ojọgu ụkporo ise ise; mee; ẹhu ghuahaa Mosisu eghu. ¹⁵ Mosisu sụ phẹ: “?Ọ kwa l'unu hakotaru unwanyi-a g'ẹphe nọdu ndzụ? ¹⁶ ? Tọbudu unwanyi-a bẹ Belamu ziru; ẹphe mee gẹ ndu Ízurelụ meswee Chipfu l'opfu ẹhu agwa, dụ lẹ Peyọ; eshi nno; ẹjo iphe-ememe bya adaa l'echilabọ ndu kẹ Chipfu ono. ¹⁷ Ngwa; unu tuko unwegirima phẹ unwoke gbushikọta g'ẹphe ha; unu egbushikọta iphe, bụ nwanyi, yẹle nwoke kwajewaru l'ime phẹ. ¹⁸ Ndu ophu unu a-harụ onwunu buẹpho unwumgboko, ẹphe lẹ nwoke ta akwajeduru. ¹⁹ A -bya lẹ g'unu ha bụru ndu gburu nemadzụ ono; mẹ ndu denyiru onye e gburu egbugbu ẹka; gẹ ndu ono jekwa l'azụ ẹka ono, a kpọberu ụlo-ẹkwa je anọ abalị ẹsaa. O -rwuepho lẹ mbọku k'eto iya waa mbọku k'ẹsaa ya; g'ẹphe safu onwophe nturwu; safukwapho ndu ono, unu kputaru lẹ ndzụ ono nturwu. ²⁰ Unu mecha uwe unu emecha; unu emecha iphe, e meru l'akpo; mẹ iphe, e meru l'ẹji eghu; mẹ iphe, a pyiru l'oshi.”

²¹ Eleyaza, bụ onye uke Chileke sụ ndu ojọgu ono, jeru ọgu ono: “Waa omelali, dụ l'ekemu ono, Chipfu turu nụ Mosisu baa: ²² Ọo mkpọla-ododo kpoloko; mẹ mkpọla-ọchaa; mẹ onyirubvu; mẹ ígwè; mẹ gbamugbamụ; mẹ ọta-njele; ²³ mbụ l'iphe, ọku te ekepyashiduru bẹ unu a-hụ l'ọku g'ọ dụ ree. Ọle e gudefutaje mini

ono, eegudeje asafu nturwu mechaa ya emecha. Obenu l'iphe, oku e-ke me a -hua ya l'oku be unu e-ye le mini ono gude mee ya g'ọ du ree. ²⁴ Le mboku k'esa a be unu safutaje uwe unu asasa; unu abya adu ree. Unu -mechaa nno; unu abatawaro l'eka ono, a kpoberu ulo-ekwa ono teke ono."

Eekeshi iphe, a lwutaru l'ogu Midiyanu

²⁵ Chipfu su Mosisu: ²⁶ "Ge gubedua; me Eleyaza, bu onye uke Chileke; me ndu-ishi le ndu-unuphu ndu-unuphu ndu Izurelu toko iphemiphe ono, ephe lwutaru l'ogu ono gukota ogu; mbu nemadzu; mekpoo iphe-edobe ono. ²⁷ Unu ekekaha iphe ono, a lwutaru l'ogu ono uzi labo. Unu kekaharu iya ndu ono, jeru ogu ono waa igwe-oha Izurelu. ²⁸ Unu shi l'ime ndu k'ono, unu keru nu ndu ono, jeru ogu ono tutaru Chipfu utu. Onye lanu be unu e-wofuta l'ime unu nemadzu l'ukporo ise; unu ewofuta iphe-edobe lanu l'ime unu iphe-edobe l'ukporo ise; mbu eswi; me nkapfu-igara; me aturu; me egbu. ²⁹ Unu shi l'oke iya nkephe ono wota iya nu Eleyaza, bu onye uke Chileke g'ọ buru iphe, aa-nu Chipfu. ³⁰ Unu eshikwapho l'iphe ono, unu keru nu ndu Izurelu wofutachaa nanu nanu l'ime ukporo labo l'iri; mbu le nemadzu; me l'eswi; me le nkapfu-igara; me l'aturu; me l'egbu; me l'anu ozo. Unu eworu iya nu eri Livayi, bu ndu eleta ulo-ekwa Chipfu enya." ³¹ Oo ya bu; Mosisu yele Eleyaza, bu onye uke Chileke mee ge Chipfu tutu iya Mosisu l'ekemu.

³² Waa iphe, phòduru nù l'iphe ono, ndu ono, jeru oḡu l'wùtaru l'oḡu baa: Aturu, phòduru nù bụ ụkporo unu aturu ugbo ụkporo ẹno l'ụkporo unu ẹno l'unu ẹsaa l'ụkporo iri. ³³ Eswi, phòduru nù bụru ụkporo unu eswi ugbo tete. ³⁴ Nkapfụ-igara, phòduru nù bụru ụkporo unu nkapfụ-igara ugbo ẹsaa l'unu iri l'ẹbo l'ụkporo iri. ³⁵ A -bya lẹ nemadzu; unwanyi, ẹphe lẹ nwoke ta akwajeduru bẹ dụ ụkporo unu unwanyi ugbo ẹno. ³⁶ Waa g'iphe, e keru nù ndu ono, jeru oḡu ono ha baa: Aturu dụ ụkporo unu aturu ugbo ụkporo labọ l'ụkporo unu ugbo labọ l'unu ẹto l'ụkporo iri l'ise. ³⁷ L'ime aturu ono; ophu bụ iya utu, aatụ anụ Chipfu bụ unu aturu l'ụkporo iri l'ẹto l'aturu iri l'ise. ³⁸ Eswi dụ ụkporo unu eswi ugbo ẹno l'unu iri. L'ime eswi ono; ophu bụ iya utu, aatụ anụ Chipfu bụ ụkporo eswi ẹto l'eswi iri l'ẹbo. ³⁹ Nkapfụ-igara dụ ụkporo unu nkapfụ-igara ugbo ẹto l'unu iri l'ishii l'ụkporo ise. L'ime nkapfụ-igara ono; ophu bụ iya utu, aatụ anụ Chipfu dụ ụkporo nkapfụ-igara ẹto lẹ nkapfụ-igara lanụ. ⁴⁰ A bya lẹ nemadzu; iphe, ẹphe dụ bụ ụkporo unu nemadzu ugbo labọ. Iphe, bụ ndu e gude atụ utu anụ Chipfu l'ime phẹ bụ ụkporo umadzu l'umadzu iri l'ẹbo. ⁴¹ Tòbudu iya bụ; Mòsisu bya eworu utu ono, a turu nù Chipfu ono nù Eleyaza, bụ onye uke Chileke g'ọ bụru iphe, aanụ Chipfu. Ono bụru gẹ Chipfu turu iya Mòsisu l'ekemu.

⁴² Waa g'iphe ono, e keru nù ndu Ízurelù ono ha baa; mbụ iphe ono, Mòsisu wofuru l'ophu e keru nù ndu ono, jeru oḡu Midiyanu ono.

⁴³ Iphe, e keru nù igwe-òha Ízurelu ono bẹ aturu dọ ụkporo ọnu aturu ụkporo ugbo labọ l'ụkporo ọnu ugbo labọ l'ọnu ẹto l'ụkporo iri l'ise. ⁴⁴ Eswi dọ iya ụkporo ọnu eswi ugbo ẹno l'ọnu iri. ⁴⁵ Nkapfụ-igara dọ iya ụkporo ọnu nkapfụ-igara ugbo ẹto l'ọnu iri l'ishii l'ụkporo ise. ⁴⁶ Ndu nemadzu, e ketaru nù pẹ dọ ụkporo ọnu nemadzu ugbo labọ. ⁴⁷ Mósisi bya eshi l'iphe ono, e keru nù ndu Ízurelu ono wotachaa iphe nanu nanu l'ime ụkporo labọ l'iri iri; mbụ lẹ nemadzu; mẹ l'iphe-edobe; o woru iya nù eri Lívayi, bụ ndu eleta ọlo-ẹkwa Chipfu ẹnya; bụ gẹ Chipfu turu iya Mósisi l'ekemu.

⁴⁸ Noo ya; ndu-ishi, achi ndu ojogu ono; mbụ ndu-ishi, ọnu ndu ojogu ugbo labọ l'ụkporo iri; mẹ ndu-ishi ndu ojogu ụkporo ise ise wuru byapfutashia Mósisi. ⁴⁹ Ẹpẹ sụ Mósisi: “Anyibe ndu-ozì ngu bẹ guakwaru ndu ojogu ono, anyi chi jee ogu ono ogu; ophu o dudu m'onye lanu, aacho achocho l'ime pẹ. ⁵⁰ Owaa bụ iphe, anyi ewota g'a nù Chipfu. Onyenonu gude iphe, o lwutaru l'ogu ono; mbụ iphe, e meru lẹ mkpọla-ododo, bụ iya bụ iyagba-upfu; mẹ echi mgbalẹka; mẹ echi mkpushi-ẹka; mẹ iphe-nchi; mẹ iyagba-olu. Anyi wotaru iya g'e gude pfa ugwo iphe-ẹji l'iphu Chipfu.”

⁵¹ Mósisi yẹle Eleyaza, bụ onye uke Chileke nata pẹ iphe ono, e meshiru lẹ mkpọla-ododo ono; mbụ iphemiphe, e mekotaru ọna. ⁵² Iphe ono, e meru lẹ mkpọla-ododo ono, ndu-ishi ọnu ndu ojogu ugbo labọ l'ụkporo iri; mẹ ndu-ishi ndu ojogu ụkporo ise ise nuru Chipfu ono bẹ

bụ mkpọla-ododo, ẹrwa iya dụ ụkporo ụnu shẹkelu labọ l'ụnu lanu l'ụkporo shẹkelu iri l'ẹsaa lẹ shẹkelu iri. ⁵³ Ndu ojogu ono l'ẹhu l'ẹhu gudechaa iphe, ẹphe kwataru l'okwata lwa. ⁵⁴ Mosisu yele Eleyaza, bu onye uke Chileke nata iphe ono, e meru lẹ mkpọla-ododo ono l'ẹka ndu-ishi unu ndu ojogu labọ l'ụkporo iri; mẹ l'ẹka ndu-ishi ndu ojogu ụkporo ise ise. Ẹphe nata pẹ iya je edobe l'ulo-ekwa-ndzukọ l'ẹka ọo-ọdu l'atatiphu Chipfu; gẹ ndu Ízurelu e-gudeje iya nyata ọgu ono.

32

*Alì, a nuru okpa-ipfu Rúbenu;
waa okpa-ipfu Gadu
(Dit 3:12-22)*

¹ Ụnwu Rúbenu waa unwu Gadu bẹ nweru iphe-edobe shingushingu. Ẹphe bya ahuma l'alì Jiaza; mẹ alì Giladu bẹ dụ ree g'e dobe iya iphe-edobe. ² Ọo ya bu; unwu Gadu; mẹ unwu Rúbenu ono bya ejepfu Mosisu; waa Eleyaza, bu onye uke Chileke; mẹ ndu-ishi ndu Ízurelu je asu: ³ "Mkpukpu Atarotu; mẹ mkpukpu Dibonu; mẹ mkpukpu Jiaza; mẹ mkpukpu Nimura; mẹ mkpukpu Heshibonu; mẹ mkpukpu Eleyale; mẹ mkpukpu Sebamu; mẹ mkpukpu Nebo; mẹ mkpukpu Beyonu; ⁴ mbu alì ono, Chipfu meru gẹ ndu Ízurelu lwuta bẹ bukwa alì, dụ ree k'edobe iphe-edobe; tẹmanu anyibe ndu-ozì ngu buru ndu nweru iphe-edobe. ⁵ Su-a; ọ -buru l'anyi dụ ngu l'obu; nunu anyibe ndu-ozì nkengu alì ono

g'ò bụwaruro oke alì nkanyi. Unu te edutashìnu anyi dafù azù ẹnìmu Jìódanu azù iya ọphuu.”

⁶ Mòsisu sù unwu Gadu; mę unwu Rúbenu: “? Unwunna unu a-nòdu eje ọgu; unubedua anọ-kirishia l'ẹka-a tọ? ⁷ ?Bụ gụnu meru iphe, unu eme g'obu te shihushi ndu Ízurelu ike g'ẹphe la l'alì ono, Chipfu nuru phẹ ono? ⁸ Ọo ẹgube ono bụ gę nna unu phẹ meru teke mu ziru phẹ g'ẹphe gbẹ lẹ Kadeshi-Baneya je ahuma alì ono; ⁹ kele ẹphe jerwuru nsuda Eshukolu; je ahumabebe alì ono; bya eteyia ndu Ízurelu obu; mee g'ẹphe ta abahu l'alì ono, Chipfu nuru phẹ ono. ¹⁰ Ẹphe shi nno kpatsu Chipfu ẹhu-eghu lẹ mbọku ono. O ribua angụ sù: ¹¹ 'Ọ tọ dudu onye nwoke Ízurelu, shi lẹ Ijiputu futa; shita l'onye nọwaru ụkporo apha kwaseru, bya l'e-gude ẹnya iya huma alì ono; mbụ alì ono, mu riburu lẹ nte lẹ mu l'a-nu Ébirhamu; mę Áyizaku; mę Jíékọpu; noo kele ẹphe te egudedu obu phẹ g'ò ha etso mu; ¹² Gbahaephọ Kalẹbu nwa Jiefune k'eri Kenazu; mę Jioshuwa nwa Nunu; kele ẹphe gude obu phẹ g'ò ha tsoru Chipfu.' ¹³ Chipfu swibenuru ndu Ízurelu ẹhu-eghu iya; o mee phẹ; ẹphe tsoru echięgu ghaphee ụkporo apha labọ; jeye teke ọgbo ono, meru ejo-iphe l'ẹnya Chipfu ono bvụkotaru. ¹⁴ O rwukwaa nta; unubę unwu-a, ndu eme iphe-ẹji nwushiru-a byakwa apfuru l'ọzori nna unu phẹ; g'unu mee g'ẹhu-eghu Chipfu kaba atangirihu l'ẹhu ndu Ízurelu. ¹⁵ Kele-a; unu -gbakuta iya azù sù l'unu te etsohedu iya nta; bę ọo-pakwaru phẹ haa l'echięgu; ọo-buru l'ọo unu bę kpataru gę ndu

Ízureḷu laa l'iyi.”

¹⁶ Tọbudu iya bụ; ụnwu Gadu ono; mę ụnwu Rúbenu ono byapfuta Mósísu bya asụ iya: “Ọo-dụ anyi ree g'anyi meta ẹka iphe-edobe anyi a-nọdu; mę g'anyi kpushia mkpukpu ẹka ụnwegirima anyi phẹ a-nọdu. ¹⁷ Ọle anyi jikobewaru k'achita ngwoḡu vutaru ndu Ízureḷu ụzo jeshia; jeye teke anyi e-durwu phẹ ẹka ono, ẹphe e-buru ono. Ụnwu anyi phẹ bẹ e-buru lẹ mkpukpu-a, a kpuchaaru; o shihu ike-a; gę ndu alị-a te sweta iya. ¹⁸ Anyi ta abyadụ alwa ibe anyi jeye teke ndu Ízureḷu e-ketadzuru oke, rwuberu phẹ nụ g'ẹphe ha. ¹⁹ Ọle anyịbedua te etsoduru phẹ eketa oke l'azụ ẹnyimu Jiódanu azụ iya ophuu; iphe, kparụ iya nụ bụ l'oke k'anyi bẹ nọ l'azụ iya ọwa l'ụzo ẹnyanwu-awawa ẹnyimu Jiódanu.”

²⁰ Ọo ya bụ; Mósísu sụ phẹ: “Ọ -buru l'unu e-me iya ẹgube ono; ọ -buru l'unu a-kwa onwunu ngwoḡu unu l'ataphu Chipfu vuta ụzo k'ọgu ono; ²¹ ọ -buru lẹ g'unu ha bẹ a-chiru ngwoḡu unu daa ẹnyimu Jiódanu l'ataphu Chipfu; lwụa ọgu ono jasụ teke Chipfu chifuru ndu ọhogu iya ono l'ataphu iya. ²² A -lwụa alị ono lwutaru Chipfu; unu alwatashiwaro teke ono; ikpe ta anmaedu unu l'iphu Chipfu; mę l'iphu ndu Ízureḷu l'ophu. Alị ọwa abụwaruro k'unu l'ataphu Chipfu. ²³ Ọle ọ -buru l'unu te emeduru iphe, unu pfuru; ọo ya bụ l'unu meru Chipfu iphe-ẹji; g'o dokwaa unu ẹnya l'iphe-ẹji, unu meru bẹ unu e-je iphe-ẹhuka iya. ²⁴ Unu kpushia mkpukpu, ụnwegirima unu phẹ a-nọdu; unu emeta ẹka

iphe-edobe unu a-nòdu; unu emeèbekpoe ya phọ g'unu pfuru iya.”

²⁵ Ụnwu Gadu ono; mę ụnwu kę Rúbenu sụ Mósísu: “Anyibe ndu-ozí ngu phẹ l'e-me gẹ gube nnajìuphu pfuru anyi. ²⁶ Ụnwegirima anyi phẹ; mę unyomu anyi phẹ; mę iphe-edobe anyi bẹ a-nòdu lẹ mkpụkpu lẹ mkpụkpu, dụ l'alì Giladu. ²⁷ Ọle anyibedua, bụ ndu-ozí ngu phẹ bẹ a-da ẹnyimu; anyi a-chìgbaaru ngwọgu l'ẹhu l'ẹhu k'ọgu ono l'atatiphu Chipfu ẹgube ono, gube nnajìuphu anyi pfuru anyi.”

²⁸ Noo ya; Mósísu bya atụa ekemu nụ Eleyaza, bụ onye uke Chileke; mę Jioshuwa nwa Nunu; mę ndu-ishi, achìgba ẹnya-unuphu nọnu l'ipfu Ízurelu lẹ k'opfu ẹhu ụnwu Gadu ono; mę k'opfu ẹhu ụnwu Rúbenu. ²⁹ Ọ sụ phẹ: “Ọ -bụru l'ụnwu Gadu; mę ụnwu Rúbenu bẹ chítaru ngwọgu phẹ; tsoru unu daa ẹnyimu Jíọdanu; bya etsoru unu nòdu l'iphu Chipfu lwụa ọgu ono lwụta; unu l'ẹphe -lwutachaephe alì ono; unu nụkwaa phẹ alì Giladu g'ọ bụru oke alì phẹ. ³⁰ Ọle ọ -bụru l'ẹphe ta achítaduru ngwọgu tsoru unu daa ẹnyimu; ẹphe etsoru unu keta oke l'alì Kénanu.”

³¹ Ụnwu Gadu; mę ụnwu Rúbenu ono sụ: “Ọo gẹ Chipfu pfuru anyibe ndu-ozí ngu phẹ bụ g'anyi e-me iya. ³² Anyi a-chìru ngwọgu daa ẹnyimu Jíọdanu bahụ l'alì Kénanu l'atatiphu Chipfu; ọle oké alì anyi bẹ a-dụkota l'azụ ẹnyimu Jíọdanu azụ iya ọwa.”

³³ Tọbudu iya bụ; Mósísu bya eworu alì-eze Sihonu, bụ eze ndu Amọru; mę alì-eze Ọgu, bụ eze ndu Beshanu woru nụ ụnwu Gadu; mę

unwu ke Rúbenu; me nkeru-ẹbo ipfu Manáse, bu nwa Jiósefu. O nuru phe ali ono l'ophu; me mkpukpu, dukota iya nu g'ọ ha; mbukpoo mkpukpu le mkpukpu, no-pheru ali ono mgburugburu. ³⁴ Unwu Gadu kpua mkpukpu Dibonu; me Atarotu; me Arowa; ³⁵ me Atarotu-Shofanu; me Jiaza; me Jiogbeha; ³⁶ me Betu-Nimura; me Betu-Haranu. Ephe kpukotaru mkpukpu ono; o shihuchaa ike; bya emetagbaa eka iphe-edobe phe a-noduje. ³⁷ Unwu ke Rúbenu kpua mkpukpu Heshibonu; me Eleyale; me Kiriayatayimu; ³⁸ mekwapho Nebo; me Belu-Meyonu. Ephe kpukwapho mkpukpu Sibuma. Ephe gbanweshikota epha mkpukpu ono g'ọ ha; bya eworu epha ozo gushia mkpukpu le mkpukpu ono, ephe kpushiru ono.

³⁹ Unwu Makiya, bu nwa Manáse jee ogu l'ali Giladu; je alwuta iya; chishia ndu Amoru, bu l'eka ono. ⁴⁰ Oo ya bu; Mosisu woru ali Giladu nu Makiya, bu nwa Manáse; o buru l'eka ono. ⁴¹ Jiayi, bukwapho oshilokpa Manáse lwuta unwu mkpukpu le mkpukpu, du iya nu; o gua epha mkpukpu ono Havotu-Jiayi. ⁴² Noba lwuta mkpukpu Kenatu; me nwa mkpukpu, no-pheru iya mgburugburu. O gube mkpukpu ono Noba, bu epha, yebedua aza.

33

Ije ndu Ízurelu e shi le Ijiputu jasu le Mówabu

¹ Qwaa bu ge ndu Ízurelu gude jee ije phe teke ephe futaru l'ali Ijiputu. Ephe dzeberu le mkpa le mkpa; o buru Mosisu yele Eronu be edu phe

nụ. ² O buru Mósísu bẹ deru g'ẹphe gude jee ije ono l'ẹkwo gẹ Chipfu pfuru iya ya. Waa g'ẹphe gude jee ije phe ono baa e shi lẹ Ijiputu:

³ Ndu Ízurelu gbalihuru ije l'onwa mbụ; l'abalị iri l'ise l'onwa mbụ ono. Lẹ mbọku, tsotaru mbọku obo Ojeghata kẹ Chipfu bẹ ẹphe wataru ije phe. Ẹphe shi lẹ mkpukpu Ramesesu wuru goromii wufuta k'ẹhuka tugbua. Ndu Ijiputu doru chikafuchaepho ẹnya ele phe; ẹphe nodu awu atugbu. ⁴ Lẹ teke ono bẹ ndu Ijiputu eligbaa odzu ndu bu okpara phe ono, Chipfu chigbushiru l'echilabo phe ono. Chipfu bya ekpekwa pho agwa phe ikpe.

⁵ Noo ya; ndu Ízurelu shi lẹ Ramesesu wuru tugbua. Ẹphe rwua Sukotu; bya akpobe ulo-ekwa phe. ⁶ Ẹphe gbeshi lẹ Sukotu je akpobe ulo-ekwa phe lẹ Etamu, no l'aguga echiegu. ⁷ Ẹphe gbeshi lẹ Etamu; bya adakobe laphu azu lẹ Pi-Hahirotu, no l'uzo ẹnyanwu-awawa Belu-Zefonu; ẹphe kpobe ulo-ekwa phe lẹ mgboru Migudolu. ⁸ Ẹphe gbeshi lẹ Pi-Hahirotu; bya adaa eze-ẹnyimu bahu l'echiegu. Ẹphe jee ije abali ẹto lẹ mgbegu Etamu; bya erwua Mara; ẹphe kpobe ulo-ekwa phe. ⁹ Ẹphe gbeshi lẹ Mara; bya ejerwua Elimu. Elimu bẹ nweru ẹnya-obvu mini iri l'ẹbo, no iya nu; mpfu ukporo ẹto l'iri nodu iya; ẹphe kpobe ulo-ekwa phe l'eka ono.

¹⁰ Ẹphe gbeshi lẹ Elimu bya erwua aguga Eze-ẹnyimu Uswe-uswe; ẹphe kpobe ulo-ekwa phe. ¹¹ Ẹphe gbeshi lẹ Eze-ẹnyimu Uswe-uswe bya eje akpobe ulo-ekwa phe l'echiegu Sinu. ¹² Ẹphe gbeshi l'echiegu Sinu je akpobe ulo-ekwa phe lẹ

Dofuka. ¹³ Ẹphe gbẹshi lẹ Dofuka je akpọbe ọlo-ẹkwa phẹ lẹ Alushi. ¹⁴ Ẹphe gbẹshi lẹ Alushi je akpọbe ọlo-ẹkwa phẹ lẹ Refidimu. Ẹka ono be mini ta adudu ge ndu Ízurelu ngua.

¹⁵ Ẹphe gbẹshi lẹ Refidimu je akpọbe ọlo-ẹkwa phẹ l'echiegu Sayinayi. ¹⁶ Ẹphe gbẹshi l'echiegu Sayinayi je akpọbe ọlo-ẹkwa phẹ lẹ Kiburotu-Hatava. ¹⁷ Ẹphe gbẹshi lẹ Kiburotu-Hatava je akpọbe ọlo-ẹkwa phẹ lẹ Hazerotu. ¹⁸ Ẹphe gbẹshi lẹ Hazerotu je akpọbe ọlo-ẹkwa phẹ lẹ Ritima. ¹⁹ Ẹphe gbẹshi lẹ Ritima je akpọbe ọlo-ẹkwa phẹ lẹ Rimonu-Pérezu. ²⁰ Ẹphe gbẹshi lẹ Rimonu-Pérezu je akpọbe ọlo-ẹkwa phẹ lẹ Libuna. ²¹ Ẹphe gbẹshi lẹ Libuna je akpọbe ọlo-ẹkwa phẹ lẹ Risa. ²² Ẹphe gbẹshi lẹ Risa je akpọbe ọlo-ẹkwa phẹ lẹ Kehelata. ²³ Ẹphe gbẹshi lẹ Kehelata je akpọbe ọlo-ẹkwa phẹ l'úbvú Shefa. ²⁴ Ẹphe gbẹshi l'úbvú Shefa je akpọbe ọlo-ẹkwa phẹ lẹ Harada. ²⁵ Ẹphe gbẹshi lẹ Harada je akpọbe ọlo-ẹkwa phẹ lẹ Makelotu.

²⁶ Ẹphe gbẹshi lẹ Makelotu je akpọbe ọlo-ẹkwa phẹ lẹ Tahatu. ²⁷ Ẹphe gbẹshi lẹ Tahatu je akpọbe ọlo-ẹkwa phẹ lẹ Tera. ²⁸ Ẹphe gbẹshi lẹ Tera je akpọbe ọlo-ẹkwa phẹ lẹ Mitika. ²⁹ Ẹphe gbẹshi lẹ Mitika je akpọbe ọlo-ẹkwa phẹ lẹ Hashimona. ³⁰ Ẹphe gbẹshi lẹ Hashimona je akpọbe ọlo-ẹkwa phẹ lẹ Moserotu. ³¹ Ẹphe gbẹshi lẹ Moserotu je akpọbe ọlo-ẹkwa phẹ lẹ Bene-Jiakanu. ³² Ẹphe gbẹshi lẹ Bene-Jiakanu je akpọbe ọlo-ẹkwa phẹ lẹ Horu-Hagidigadu. ³³ Ẹphe gbẹshi lẹ Horu-Hagidigadu je akpọbe ọlo-ẹkwa phẹ lẹ Jiọtubata. ³⁴ Ẹphe gbẹshi lẹ

Jiɔtubata je akpɔbe ɔlo-ɛkwa phɛ lɛ Aburona. ³⁵ Ẹphe gbɛshi lɛ Aburona je akpɔbe ɔlo-ɛkwa phɛ lɛ Eziyɔnu-Geba. ³⁶ Ẹphe gbɛshi lɛ Eziyɔnu-Geba je akpɔbe ɔlo-ɛkwa phɛ lɛ Kadɛshi, nɔ l'echiegu Zinu. ³⁷ Ẹphe gbɛshi lɛ Kadɛshi je akpɔbe ɔlo-ɛkwa phɛ l'úbvú Hɔru, nɔ l'oke alì ndu Edomu.

³⁸ Ọ bɔru l'ɛka ono bɛ ɛphe nɔ; Chipfu sɔ Erɔnu, bɔ onye uke Chileke g'o nyihu elì úbvú Hɔru ono. Erɔnu nyihu úbvú ono nɔdu iya nwuhu; lɛ mboku mbu l'ɔnwa ise l'apha, kwe ndu Ízurelu ɔkporo apha labo, ɛphe shi l'alì Ijiputu lufuta. ³⁹ Erɔnu bɛ nɔwaru ɔkporo apha ishii l'apha ɛto lɛ teke ọ nwuhuru l'úbvú Hɔru.

⁴⁰ Onye Kɛnanu, bɔ eze ndu Aradu; bu l'echiegu ndohali l'alì Kɛnanu ono; numa lɛ ndu Ízurelu l'awu abya.

⁴¹ Ndu Ízurelu gbɛshi l'úbvú Hɔru je akpɔbe ɔlo-ɛkwa phɛ lɛ Zalumona. ⁴² Ẹphe gbɛshi lɛ Zalumona je akpɔbe ɔlo-ɛkwa phɛ lɛ Punonu. ⁴³ Ẹphe gbɛshi lɛ Punonu je akpɔbe ɔlo-ɛkwa phɛ lɛ Obotu. ⁴⁴ Ẹphe gbɛshi lɛ Obotu je akpɔbe ɔlo-ɛkwa phɛ lɛ Iye-Abarimu, nɔ l'oke alì Mówabu. ⁴⁵ Ẹphe gbɛshi lɛ Iye-Abarimu je akpɔbe ɔlo-ɛkwa phɛ lɛ Dibonu-Gadu. ⁴⁶ Ẹphe gbɛshi lɛ Dibonu-Gadu je akpɔbe ɔlo-ɛkwa phɛ lɛ Alumonu-Dibulatayimu. ⁴⁷ Ẹphe gbɛshi lɛ Alumonu-Dibulatayimu je akpɔbe ɔlo-ɛkwa phɛ l'úbvú úbvú Abarimu; l'atatiphu úbvú Nebo. ⁴⁸ Ẹphe gbɛshi l'úbvú úbvú Abarimu je akpɔbe ɔlo-ɛkwa phɛ lɛ baswaa alì ndu Mówabu; l'aguga ɛnyimu Jiódanu lɛ mgboru mkpukpu

Jieriko. ⁴⁹ Èphe kpòbe ọ̀lo-ẹ̀kwa phẹ́ l'agugu ẹ̀nyimu Jiódanu; e -shi ẹ́ Bẹ̀tu-Jieshimọ̀tu je ak-paa ẹ́ Abẹ̀lu-Shitimu ẹ́ baswaa alì ndu Mówabu ono.

⁵⁰ Ọ̀ bụru ẹ́ baswaa alì ndu Mówabu ono, nọ́ l'aguga ẹ̀nyimu Jiódanu ẹ́ mgboru Jieriko ono bẹ́ Chipfu pfuru yeru Mósìsù sù: ⁵¹ “Pfiaru ndu Ízurelu sù phẹ́-a: Unu -daẹpho ẹ̀nyimu Jiódanu bahù l'alì Kénanu; ⁵² unu tuko ndu bu l'alì ono g'ẹ́phe ha chífukota. Unu emebyishikọ́ta mkpuma, ẹ́phe pyìru apyìpyi; mebyishia iphe, bụ́ ntẹ́kpe, ẹ́phe kpùshìru doberu onwophẹ́. Unu atuko iphe, bukpoọ́ ẹ́ka ẹ́phe agwajẹ́ iphe nwukpọ́shia. ⁵³ Unu anata phẹ́ alì ono buru; kẹ́le mu nwaru iya unu g'ọ́ bụru k'unu. ⁵⁴ Unu a-tù ido washia alì ono l'ipfu l'ipfu. Ipfu ọ́phu ha shii; unu awẹ́e phẹ́ alì, ha shii; ipfu ọ́phu ha nwanshii; unu awẹ́e phẹ́ alì, ha nwanshii. Ẹ́ka a turu ido; ọ́ dabaru ndu ọ́phu ọ́ dabaru; ẹ́phe enworu ẹ́ka ọ́bu. Onyenonu a-wata oke alì nkiya l'ipfu nna iya. ⁵⁵ Ọ́le ọ́ -bùru l'unu ta achífuduru ndu bu l'alì ono l'ataphu unu bẹ́ ndu ono, unu haru ono e-mechakwaa buri mkpọ́ kpọ́ahaa unu l'ẹ́nya; buri obvu dzuahaa unu ẹ́ mgbureku. Èphe a-nọ́duepho akpa unu ẹ́hu l'alì ono, unu e-buru ono. ⁵⁶ Teke ono; mu emee unu iphe, mu kwakọ́beru gẹ́ mu mee phẹ́.”

34

Oke alì Kénanu

¹ Chipfu sù Mósìsù: ² “Pfiaru ndu Ízurelu sù phẹ́-a: Teke unu bahuru l'alì Kénanu, bụ́ alì ono,

unu eje eketa g'ò buru oke alì unu ono; bu g'oke alì ono a-du bu owana: ³ Ụzo ndohali unu be e-shi l'echiegu Zinu; no-tsoru oke ndu Edomu ogologo. L'uzo enyanwu-awawa be oke alì ụzo ndohali unu a-wata l'ishi eka Eze-enyimu Unu jeberu. ⁴ Oke alì unu ono e-shi l'uzo ndohali gojia futu l'elikoro Akurabimu; shi l'eka ono jee je afuta le mgbegu Zinu. L'o bya ejee nno futu l'uzo ndohali Kadeshi-Baneya; shikwapho nno lufuta le Hazarada; ghabua eka ono rwua Azumonu. ⁵ Oke alì ụzo ndohali unu ono e-shi le Azumonu gojia futu le nggele Ijiputu. Eka oo-jeberu; mbu oke alì ono bu l'eze-enyimu.

⁶ “A bya l'oke alì ụzo enyanwu-ariba; oke iya a-buru l'oke-enyimu. Noo eka a-buru oke alì ụzo enyanwu-ariba unu bu ono.

⁷ “A bya l'oke alì ụzo isheli unu; unu shi l'oke-enyimu kpaa oke alì ono jeye l'ubvu Horu. ⁸ Unu eshi l'ubvu Horu kpaa oke alì ono jeye l'eka eeshije abahu Hamatu. Eka oke alì ono e-beru bu le Zedadu. ⁹ L'o shi l'eka ono noo jeye le Zifuronu. Eka oke alì ụzo isheli unu ono e-beru aburu le Haza-Enanu. Noo eka a-buru oke alì ụzo isheli unu bu ono.

¹⁰ “A bya l'oke alì ụzo enyanwu-awawa unu; unu shi le Haza-Enanu kpaa oke alì ono jeye le Shefamu. ¹¹ Oke alì ono e-shikwapho le ndohali Shefamu lufuta le Ribula; l'uzo enyanwu-awawa Ayinu. O -rwua eka ono l'o tsoerupho ụzo ndohali ono futu l'ubvu ubvu, du l'uzo enyanwu-awawa eze-enyimu Kineretu. ¹² L'o kwaseru;

mbụ oke alì ọbu jasụ l'enyimu Jíódanu. Ẹka oo-beru aburu lẹ Eze-enyimu Únú.

“Noo ẹka a-buru alì unu bụ ono; mę oke iya mgburugburu.”

¹³ Mósísu bya epfuaru ndu Ízurelu sụ phẹ: “Noo alì, unu a-tụ ido gude washĩa g'ọ bụru oke alì unu ọbu bụ ono. Ọo ya bụ alì ono, Chipfu sụru g'a nụ ipfu tete lẹ nkeru-ẹbo ipfu.

¹⁴ Noo kele ipfu unwu Rúbenu; mę ipfu k'unwu Gadu bẹ natawaru oke alì nkephẹ l'anya-unuphu phẹ l'anya-unuphu phẹ; wkwaphọ nkeru-ẹbo ipfu Manáse. ¹⁵ Ipfu labọ ono; mę nkeru-ẹbo ipfu Manáse ono bẹ nataru oke alì nkephẹ l'uzo ẹnyanwu-awawa l'azu ẹnyimu Jíódanu azu iya ọphuu lẹ mgboru mkpukpu Jieriko l'uzo ẹka ẹnyanwu eshije awata.”

Unwoke, a hotaru g'ephẹ washĩa alì ono

¹⁶ Chipfu sụ Mósísu: ¹⁷ “Waa ẹpha unwoke, a-washì alì ono nụ unu g'ọ bụru oke alì unu baa: Eleyaza, bụ onye uke Chileke; waa Jioshuwa nwa Nunu. ¹⁸ Unu hotachaa onye-ishi lanu l'ipfu l'ipfu g'ephẹ yeta ẹka g'a washĩa alì ono. ¹⁹ Ẹpha unwoke ono bụ: Kalebu nwa Jiefune, bụ onye shi l'ipfu Jiuda; ²⁰ mę Sámelu nwa Amihudu, bụ onye shi l'ipfu Simiyonu; ²¹ mę Elidadu nwa Kisulonu, bụ onye shi l'ipfu Benjiaminu; ²² mę Buki nwa Jioguli; onye-ishi ndu ipfu Danu; ²³ mę Hanelu nwa Efođu; onye-ishi l'ipfu Manáse, bụ nwa Jíósefu; ²⁴ mę Kemelu nwa Shifutanu; onye-ishi l'ipfu Ifuremu, bukwapo nwa Jíósefu; ²⁵ mę Elizafanu nwa Panaku; onye-ishi l'ipfu Zebulonu; ²⁶ mę Palutelu nwa Azanu; onye-ishi

l'ipfu Isaka; ²⁷ mę Ahihudu nwa Shelomi; onye-ishi l'ipfu Asha; ²⁸ mę Pedahęlu nwa Amihudu; onye-ishi l'ipfu Nafutali.”

²⁹ Noo ępha unwoke ọbu Chipfu sụru g'ęphe washia alị ono g'ọ buru oke alị ndu Ízurelu l'alị Kėnanu.

35

Mkpukpu, ipfu Lívayi e-buru

¹ Tọbudu iya bu; Chipfu pfuru yeru Mosisu lę baswaa alị Mówabu l'aguga Jiđdanu l'ęka ono, nọ lę mgboru Jieriko sụ iya: ² “Pfuaru ndu Ízurelu g'ęphe shi l'oke alị, ęphe ketarụ nųgbaa eri Lívayi mkpukpu lę mkpukpu, ęphe e-buru. Unu anųkwapho ndu Lívayi ono alị ęka iphe-edobe phę a-kpaję nri lę mgburugburu mkpukpu lę mkpukpu ono, aa-nų phę ono. ³ Mkpukpu ono g'ọ ha bę a-buru ęka ipfu Lívayi e-buru eburu; alị ono aburu ęka eswi phę; mę ęku phę; mękpoo iphe-edobe phę l'ophu a-nọduje ata nri. ⁴ Alị ęka ono, unu a-nų ipfu Lívayi g'iphe-edobe phę kpaję nri ono bę a-dụ unu ntụ-ọkpa ęto lę ntụ-ọkpa ųkporo iri l'ise. Oo-shi l'azụ igbulọ mkpukpu ono nọdu gbaa mgburugburu.

⁵ “Ụzo ęnyanwu-awawa azụ mkpukpu ono bę unu a-tụta unu ntụ-ọkpa ęsaa lę ntụ-ọkpa ųkporo iri; unu atụta unu ntụ-ọkpa ise l'ụzo ndọhali azụ mkpukpu ono. Unu atụta unu ntụ-ọkpa ise l'ụzo ęnyanwu-arịba azụ mkpukpu ono; tuta unu ntụ-ọkpa ise l'ụzo isheli mkpukpu ono. Mkpukpu phę ono anọdu l'echilabọ. Azụ

mkpukpu ono aburu eka iphe-edobe phe a-taje nri. ⁶ Mkpukpu ishii l'ime mkpukpu ono, unu a-nu ipfu Lívayi ono be a-buru mkpukpu eka aa-noduje ezeru ndzu. Onye gburu ochi; l'o gbaru laa le mkpukpu ono je anodu zeeru ndzu. Unu anufua phe ukporo mkpukpu labo le mkpukpu labo ozo yekoberu phe le mkpukpu ono. ⁷ Mkpukpu, unu a-nu ipfu Lívayi be akpakota du ukporo mkpukpu labo le mkpukpu esato; yeke ali eka iphe-edobe phe a-noduje akpa nri. ⁸ A bya le mkpukpu, unu e-shi l'ali unwu Ízurelu nu ipfu Lívayi ono; unu shikwa l'ipfu ophu ali phe ha shii nu phe mkpukpu, du igwerigwe. Unu eshi l'ipfu ophu ali phe pehuru nu-pete phe mkpukpu. Oo epho g'oke ali ndu nonu habe bu g'aa-nu-beru ipfu Lívayi ono mkpukpu obu.”

*Mkpukpu, onye gburu nemadzu
a-noduje ezeru ndzu
(Dit 4:41-43; 19:1-13; Jios 20:1-9)*

⁹ Chipfu su Mosisu: ¹⁰ “Pfuaru ndu Ízurelu su phe: Unu -daepho enyimu Jiordanu bahu l'ali Kénanu; ¹¹ unu hota mkpukpu, unu a-noduje ezeru ndzu; mbu eka bu: onye -gbua nemadzu; ebe o lekebeduru enya; l'o gbaru laa eka ono. ¹² Mkpukpu ono a-buru unu eka unu a-noduje zeeru ndzu; gbalaaru onye agwata ugwo ochi; g'onye ono, gburu nemadzu ono ta nwuhu jeye teke o-futa bya apfuru l'iphu edzudzu-oha g'e kpee ya ikpe. ¹³ O buru mkpukpu ishii ono, unu a-nu ipfu Lívayi ono a-buru mkpukpu ezeru ndzu obu. ¹⁴ Unu a-nu mkpukpu, ee-zejeru ndzu

ono ẹto l'azu ẹnyimu Jiódanu azu iya owa-a; unu anu ẹto ozo l'alì Kénanu. ¹⁵ Mkpukpu ishii ono be a-buru mkpukpu ẹka ndu Ízurelu; me ndu abudu ndu Ízurelu; me ndu lwaru alwalwa, bu l'echilabo phe a-gbabaje je anodu zeeru ndzu. O buru onye gburu nemadzu; ẹbe o lekebeduru ẹnya; be a-gbajeru laa l'eka ono.

¹⁶ “Obenu le-a; o -buru le nemadzu bu iphe-ígwè be o gude chigbua nemadzu ibiya; be onye obu buakwaa onye gburu ochi. Onye ono, gburu ochi ono lafutajekwa l'ochi, o gburu. ¹⁷ Ozoo o -buru l'o nweru onye turu nemadzu mkpuma tugbua ya; be onye obu buakwaa onye gburu ochi. Onye ono, gburu ochi ono lafutajekwa l'ochi, o gburu. ¹⁸ Ozoo l'o nweru onye wotaru oshi chia nemadzu; woru iya chigbua; be onye obu buakwaa ochi be o gburu. Onye ono, gburu ochi ono lafutajekwa l'ochi, o gburu. ¹⁹ Onye bu iya agwata ugwo ochi ono be ee-gbu onye ono, gburu ochi ono. Mbua-a; g'onye ono, bu iya agwata ugwo ochi ono gbua ya l'eka o jepfukporu iya.

²⁰ “Onye gude kele nemadzu be du iya ashì; o nwutsua ya; o nwuhu; ozoo l'o kwaberu ẹnya tua ya iphe shi nno tugbua ya; ²¹ ozoo gude kele yele onye obu du l'opfu; o je echia ya ẹka chigbua ya; be onye ono, chigburu nemadzu ono be e gbufutajekwa; noo kele o gburu ochi. Onye agwata ugwo ochi ono e-gbu onye ono, gburu ochi ono teke o jepfuru iya.

²² “Ole o -buru l'o nweru onye nwutsuru nemadzu l'otulupfu; o nwuhu; ophu o budu le

yele onye obu du l'opfu; ozoo l'o to lekebeduru enya tua ya iphe; ²³ ozoo l'oo mkpuma, a-du ike tugbua nemadzu be o to humaduru onye ono; o tua ya woru onye ono tugbua; be eshi ophu onye ono, o tu-gburu ono be yele iya ta adudu l'opfu; ophu o gbaduru enya ge ya meka ya iphe; ²⁴ g'edzudzu-oha kpeshiaru iya onye ono, gburu nemadzu ono yele onye ono, agwata ugwo ochi onye ono, o gburu ono. Waa g'ee-gude doshiaru phe iya baa: ²⁵ G'edzudzu-oha nafuta onye ono, gburu nemadzu ono l'eka onye ono, bu iya agwata ugwo ochi onye ono, o gburu ono; ephe eduru iya je edobephu azu le mkpukpu ono, aa-noduje ezeru ndzu ono, bu eka o gbaru laa. O nodu le mkpukpu, aa-noduje ezeru ndzu ono jeye teke onye-ishi ndu-uke Chileke, bu onye ono, a wuru manu, du nsọ l'ishi a-nwuhu. ²⁶ Ole o -buru l'onye ono, gburu ochi ono be nweru teke o nonyaru; o kpoghata oke mkpukpu, o no ezeru ndzu ono; mbu mkpukpu ono, o gbaru je anodu ono; ²⁷ onye ono, bu iya agwata ugwo ochi ono -huma iya l'oke azu mkpukpu, o no ezeru ndzu ono; o -buru l'onye ono, bu iya agwata ugwo ochi ono be gburu iya nu; be ikpe ochi ta anmakwaru iya. ²⁸ Noo kele onye ono, gburu ochi ono nodufutaje le mkpukpu, o no ezeru ndzu ono jeye teke onye-ishi ndu-uke Chileke a-nwuhu. Oo ephe; onye-ishi uke Chileke -nwuhuada teme l'o lawarọ ali iya. ²⁹ Iphe ono a-bukotaru omelali, a toru okpa iya, a-duru ogbomogbo l'eka unu bukotakpoo.

³⁰ "Oo ya bu l'iphe, bu onye gburu nemadzu; be onye ono gburu nemadzu ono be e gbufutaje

egbugbu; m'ò -bùru l'ò dùru ndu agba iya ekebe òchi, o gburu. Òle g'ò tò bükwa ekebe, onye lanù agba bẹ ee-gude gbua nemadzu. ³¹ G'ò tò dükwa iphe, unu a-natajẹ g'e gude gbata ndzu onye gburu òchi, bụ onye ò gbaru g'ò nwùhu anwùhu. E gbufutajẹ iya egbugbu. ³² Onye gbaru laa lẹ mkpukpu, eezejeru ndzu; bya eworu iphe nù l'ugwo g'a haa ya g'ò laa alì phẹ tẹme onye-ishi ndu-uke Chileke anwùhu; unu ta natakwa iya iphe òbu. ³³ Unu te emerwùshikwa alì ono, unu eje eburu ono emerwùshi; noo kẹle mee òchi aturwujekwa alì. Ò tò dùdu g'ee-shi pfula ugwo ejo-iphe alì ẹka e gburu òchi; gbahaephò l'e gburu onye ono gburu òchi ono. ³⁴ Unu ta turwukwa alì ono, unu eje eburu ono; noo kẹle mbèdua, bụ Chipfu bẹ bu l'echilabọ unubẹ ndu Ízurelu.”

36

Òkè alì unwada Zelofehadu (Dit 27:1-11)

¹ Ndu-ishi l'ẹnya-unuphu l'unuphu, nọgbaa l'ipfu Giladu bya abyapfuta Mósisu; mẹ ndu-ishi l'ẹnya-unuphu l'unuphu ndu Ízurelu. Giladu bụ nwa Makiya; Makiya bụru nwa Manáse. Manáse l'onwiya bẹ shi l'ònulo Jiósefu. ² Ẹphe byapfuta phẹ bya asụ: “Chipfu bẹ sùru gẹ gùbe nnajiuphu anyi, bụ Mósisu tụa ido gude washia alì ono keeru ndu Ízurelu g'ò bụru oke alì phẹ. Chipfu sùkwapho gẹ gùbe nnajiuphu anyi woru oke alì òphu rwuberu Zelofehadu, bụ nwune anyi woru nù unwada iya. ³ Òle-a; ò -bùru l'o nweru

onye shi l'ipfu ozo, nọ lẹ Ízurelu; bya aluta phe; ọniya bu l'aa-gufu okiphe phe l'ime okiphe, shi lẹ ndiche anyi phe; je eworu yekobe lẹ k'ipfu ono, epe laru ji ono. Oo ya bu; eeshi nno wofu iphe l'okiphe, anyi ketaru. ⁴ O -rwuepho l'apha-ehu-utso ke ndu Ízurelu; ee-wota okiphe phe yekoberu ipfu ono, epe laru ji ono. Okiphe phe be aa-gufu l'okiphe ipfu nna anyi phe.”

⁵ Tọbudu iya bu; Mosisu bya epfuaru ndu Ízurelu iphe, Chipfu pfuru iya su: “Iphe, ipfu unwu Jiósefu epfu be pfukwaru nhamunha. ⁶ Wakwa iphe, Chipfu pfuru l'opfu ehu unwada Zelofehadu ba. O suru: G'ephe luru onye dukpoo phe ree. O le eka epe a-lu ji bu l'enya-unuphu ipfu nna phe. ⁷ G'okiphe ndu Ízurelu te shikwa l'ipfu dasweru ipfu. Iphe, bu ndu Ízurelu be e-gudeshichaa okiphe, epe ketaru l'ipfu nna phe. ⁸ Iphe, bu nwa nwanyi, ketaru oke l'ipfu Ízurelu be lufutaje ji l'ipfu nna iya; k'ophu eeshi nno g'iphe, bu ndu Ízurelu nwekotaru okiphe nna phe. ⁹ Oo ya bu l'okè-iphe te eshidu l'ipfu adasweru ipfu ozo; noo kele ipfu nonu lẹ Ízurelu be e-gudeshi okè-iphe nkephe.”

¹⁰ O buru iphe ono, Chipfu pfuru Mosisu ono be unwada Zelofehadu meru. ¹¹ Noo kele unwada Zelofehadu ono, epha phe bu Mahula; me Tiza; me Hogula; me Milika; waa Nuwa be bu unwu nwune nna phe luru phe. ¹² A luru phe lubata l'ipfu unwu Manase, bu nwa Jiósefu; okiphe phe nodu g'o nọ l'ipfu nna phe.

¹³ Noo ekemu, Chipfu turu; me omelali, o

gbẹ Mósísu l'ẹka nù ụnwu Ízurelu ẹ baswaa
alì Mówabu; l'aguga ẹnimu Jíódanu ẹ mgboru
Jieriko bụ ono.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d